


Takwane do Novo

Testamento



The New Testament in the Takwane Language of Mozambique

**Takwane do Novo Testamento
The New Testament in the Takwane Language of Mozambique
O Novo Testamento na Linguagem Takwane de Moçambique**

copyright © 2007-2009 Wycliffe Bible Translators, Inc.

Language: Takwane

Translation by: Wycliffe Bible Translators

O utilizador pode copiar e distribuir a obra.

You may copy and distribute the work.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-06-30

PDF generated using Haiola and XeLaTeX on 11 Nov 2022 from source files dated 25 May 2022

587e75ba-a1a5-5144-a06b-c3ffc0dbc8fa

Contents

LUKA	1
----------------	---

MUSELU WAPAMA WA YESU woolebiwa ni Luka

Madhu Wowambeela

Mudhidhi wateene enagaweya ni dhipadhi biili

Vowelenga thalako ela ya Luka, nnokanna yowubuwela wi oliye afuna anone ni madhu aaye ni muneba “odheveliwa wulubale” wi angero enoovuhulela (Luka 2:10). Yego yoofuneya ni olibihedha pama moovolowa vaari va mburo wa luwa ookubanya ni ohujejihedheya, wi ekalege mu odhaarini wa wabure wa aRoma.

Luka onorumeedhela (Luka 1:1-14) wi ohukohakoha mapadduwo majinji odheela wa egumi ya Yesu. Dhowaakwanela dhinatapulela mmirimani wi enavituwa mwa dhipaddi biili dhoobaja, dhinooniha wi oliye aheed-dedda mofuneya ni onamwoona. Kalivo namalaleya mmohi agumanihile dhowaaddeliwa dhijinji. Otapulela wula popwasedha, pole-pole, ni muneba ohagalala dhinowooneyiha niivuru na Luka.

Wa obaliwa wa Yesu, mukalelo ola ohugawa mudhidhi wateene vaari ni vaari. Hiyo vano ninovahedha ebaribari emohi wa dhedho dhatedhene mooleddo wi enalebeliihu nlabo. Muselu wa Luka ononeeddiya mwiilaboni, voobaja wi ehinakale wooniha “wa Kirixtu” ni “mooharela wa Kirixtu.” Oliye ononthukulela omamelelo wa egumi ya Yesu.

Naari peeno dhigavirile yaaka macikwi meenddi, dhowuubusedha okaratela obaliwa wa Yesu bu mwaha woohagalaliha. Vaari va mudhidhi wa Nataliya, nnoja pama, hiyo nnokala owiisasanyedheene vajinji, wiiwa dhoowibela dha Nataliya, nnowoona dhootonyihedha obaliwa wa Yesu, ni wiiba jibo dha Nataliya. Okala weehu wowuubusedha osasenyedhela kuluzi yaaye wi emwadheyne, ni wiira omboni wovooneya mudhidhi wowi Mulugu eyiriliye muthu ni okala elabo elena ya vati.

Yoonihedho ya Niivuru na Luka

1. Wambeela (1:1-4)
2. Thalako ya Ehima ya Yesu (1:5—2:52)
3. Dha ogawanyeya wa mabasa a Zhuwawu Namabathiza (3:1-20)
4. Wambeela wa ogawanyeya wa mabasa a Yesu (3:21—4:13)
 - A. Obathizo (3:21-22)
 - B. Makolo (3:23-38)
 - C. Weehiwa (4:1-13)
5. Yesu o Galileya (4:14—9:50)
 - A. Olaleywa wo Nazarethi (4:14-30)
 - B. Osuuzihiwa ni oyiliha oGalileya (4:31—5:39)
 - C. Sabuddu (6:1-11)
 - D. Osakuliwa wa kumi ni abiili (6:12-16)
 - E. Olaleyiwa wa vamusewasewani (6:17-49)
 - F. Matikiniho oyiliha (7:1-17)
 - G. Dhokoha dha Zhuwawu Namabathiza ni ovuweha waaye (7:18-35)
 - H. Yesu ni ahiana (7:36—8:3)
 - I. Osuuza mwa musibe (8:4-18)
 - J. Meereelo owodha a Yesu (8:18-56)
 - K. Osuuzihiwa wa anamasuuza kumi ni abiili (9:1-50)
 - i. Orumiwa wa kumi ni abiili arumiwi (9:1-9)
 - ii. Ojihowi wootikiniha wa anamwinji (9:10-17)
 - iii. Osuuza ni ohiyanicheya wa kove ya Yesu (9:18-50)
 6. Oleddo wa Yesu wo Galileya ni oZheruzalemi (9:51—19:44)

- A. Dosuuziha dhimohi dha anamasuuza (9:51—10:42)
- B. Olobela (11:1-13)
- C. Muneba wabure (11:14-26)
- D. Mareeliho ni othonga (11:27—13:9)
- E. Osuuzihiwa odheela omwene wa Mulugu (13:10—14:35)
 - i. owodha wa OMwene wa Mulugu (13:10-21)
 - ii. Ovolowa wa OMwene wa Mulugu (13:22-35)
 - iii. Oja wa mahiyu ni Mfarisi mmohi (14:1-24)
 - iv. Osuuziha (14:25-35)
- F. Misibe miraaru odheela oddimelihiwa (epaddi 15)
- G. Osuuziha oddheela korowa ni mabasa (16:1—17:10)
- H. Areddha kumi (17:11-19)
- I. Mwene onadha (17:20—19:10)
 - i. Odha woohulaleyiwa (17:20-37)
 - ii. Musibe odheela olobela (18:1-14)
 - iii. Yesu ni ahima (18:15-17)
 - iv. Muzombwe ooreela (18:18-30)
 - v. Ovuhulela omohi wa okwa ni ovenyihawa wa Yesu (18:31-34)
 - vi. Woonihiwa wa muliba ohoona (18:35-43)
 - vii. Zakeyu (19:1-10)
- J. Musibe wa korowa kumi (19:11-27)
- K. Yesu onovolowa o Zheruzalemi (19:28-44)
- 7. Yesu o Zheruzalemi (19:45—21:38)
 - A. Owomihedhiwa wa nyuba ya Mulugu (19:45-46)
 - B. Osuuziha mu nyuba ya Mulugu (19:47—20:18)
 - C. Okangana (20:19-47)
 - D. Nyuba ya Mulugu ni mwango wa Olivera (epaddi 21)
- 8. Voogomeila (22:1—24:53)
 - A. Opelekiwa wa Yesu (22:1-6)
 - B. Siubi a vadhulu (22:7-38)
 - C. Getsemani (22:39-53)
 - D. Peduru onomukooodda Yesu (22:54-62)
 - E. Othongiwa wa Yesu (22:63—23:25)
 - F. Okomeliwa vamuraddi wa Yesu (23:26-56)
 - G. Ovenyihawa wa Yesu (24:1-49)
 - H. Ogwela wa Yesu (24:50-53)

Madhu Ovolowana

¹ Wa Tiyofilu ooriiheya, athu ajinjeene yahisayela osasanyedha bili ya dhego dheeereyile* vaari va hiyo. ² Aliwa yahileba dhedho dhaddeliwi-su ni athu yonile vameentoni okuma omabeelelo, olaleyaga. ³ Miyo gosayela sayela dhego dhatedhene dhedhi mohariha pama, okuma omam-beeelo guhubuwelela teto, wi giire wulebela we Tiyofilu dhowiireya nda moosasanyedha pama. ⁴ Gihiirana dhedho wi munone wi dhisuuzilinyu sebaribari.

Obaliwa wa Zhuwawu Namabathiza Wahivuhuleliwa

⁵ Mudhidhi oyene Heroddi, agali mwene o oZhudeya, wahikala na-makutha, ndina naaye eeriwa Zakariya. Aali a nikuru na anamakutha a Abiya. Mwihiyana aaye eeriwa Ezabeli, aali a nihimo na Aaroni. ⁶ Aabilene yaali owogoowa murima vameentoni va Mulugu, yohariha mowaakwanelia malamulo ni magano a Nabwiya. ⁷ Kayanna mwaana, vowi Ezabeli kaabala. Aabilene yaali owululeene.

* **1:1** Naari dharumedhiwe ni ebaribari

⁸ Nlabo nimohi, Zakariya ahiddaga mabasa aaye oonamakutha vameentoni va Mulugu. Waali mudhidhi wa nikuru naaye na oonamakutha nowimelela, ⁹ mohariheda mukalelo weewa wonamakutha, ahimoreliwa gari mosakuliwa ovolowa mburo woweela wa Nabwiya, wi apahe dhoonukwela dha mukutho.

¹⁰ Mudhidhi oyene, athu ateene yakala ode olobelaga. ¹¹ Mungero a Nabwiya ahidha vowambeela, wiimela omoononi wooja wibuwani wapahiwa dhoonukwela dha mukutho. ¹² Zakariya agamoonile ahirurumuwaga ni woova. ¹³ Mungero ahimwiirelaga: “Zakariya, kawoove! Vowi malobeloo aawo ehiweya. Mwihiyana aawo Ezabeli oneere ombala mwaana, oyene onamuthwiwe ndina na Zhuwawu. ¹⁴ Oliye onakale ohagalala ni oteyela wa we, ajinji eneere odhiveliwa ni obaliwa waaye. ¹⁵ Vowi oliye onakale mulubale vameentoni va Nabwiya. Kadha ang'wa yoong'wa yolezelihia, onaakale oodhaaliwa Muneba Woweela, naari ahinabaliwe.[†] ¹⁶ Onodha atthwaruse amwaana Ezarayeli ajinjeene wa Nabwiya Mulugu aaye. ¹⁷ Vano oneere okala vasogolo va Nabwiya mmunebani ni kopolo dha Eliyazi, wi atthwaruse murima dha ababiinya wa aaniwa, atthwaruse avuruvuru wi ekanne zelu ya athu oharihamo, asasanyedhe athu wa Nabwiya nlogo nooharihamo.”

¹⁸ Nuwindo Zakariya ahimukoha mungero: “Ginanone addi dhendo, vowi miyo ni mwihiyana nihuluvala?”

¹⁹ Mungero ahimwaakulaga wiira: “Miyo gili Gabiriyeli, gineemelela vameentoni va Mulugu. Ogirumile duliyeene wi giwoge niwe ni wudhelana muselu wapama. ²⁰ Woone vowi kuroromele madhu aaga, oneere okala ohuwoga ofiyedha nlabo nenddo dhineereye nda.”

²¹ Athu yomujehaga Zakariya, etikinaga ni mwaha woribeliwa munyuba ya Mulugu. ²² Agakumile kaakwanihile wawogana. Aliwa ononelamo wi ohooneyeliwa omburoni woweela. Zakariya awoga ni madada, baahi. Kaanda okumiha madhu.

²³ Dhahipadduwa egaakwanile malabo a mabasa aaye ahiwelela vade. ²⁴ Nuwindo egavirile malabo ayene Ezabeli ahikanna wari, ofiyedha mweeri mitanu kavanya vade. ²⁵ Ezabeli ahiira: “Ndala Nabwiya ohirana wa miyo, ohudhiveliwa ni miyo, ohumaaliha manyazo aaga, yanna miyo vaari va athu.”

Obaliwa wa Yesu Wahiyuhuleliwa

²⁶ Vigavirile mweeri mitanu na mmohi Ezabeli aganna wari, mungero Gabiriyeli ahirumiwa ni Mulugu murudda wa elabo ya oGalileya nluwa no oNazareti. Wewo wadhowiliye omfwanya namwali, eeriwa Mariya.

²⁷ Oyene ahamunonile mulobwana. Attomeliwe ni mulobwana, eeriwa Zhuuze, aali a nlogo na mwene Davidi. ²⁸ Mungero agafiyile, ahimulojelaga, wiira: “We ohukanna mahala! Nabwiya Oli ni we.”

²⁹ Mariya ageewile ahisimwelaga vajinjivene, wubuwelaga: “Olojela wula onatapulela ddi?” ³⁰ Mungero ola omwiirela:

“Mariya, kawoove.

Wevo ohufwanya mahala a Mulugu.

³¹ Oneere okalana wari.

Onombala mwaana pongwe,
oyene oneere omuthwa ndina na Yesu.

³² Onaakale mulubale, akopolo.

[†] **1:15** Naari okumela mbaani mwa amaaye

Oneethaniwege Mwaana a Mudhulu-dhulu.
Nabwiya Mulugu oneere omvaha
othonga wa babaye Davidi.

³³ Oneerege othonga nlogo na Yakobo malabo ni malabo.
Omwene waayee kudha omala.”

³⁴ Mariya ahiwoga: “Dhinandeye addi vowi miyo kagimunonile mulob-wana?”

³⁵ Mungero ahimwaakula, wiira: “Muneba Woweela oneere wukitela kopolo dha Mudhulu-dhulu dhinowukuneela ni murinti waaye. Vowi Oweela onabaliwe mwa we oneeriwege Mwaana a Mulugu.”³⁶ Woone, mmudhi aawo Ezabeli nuliyeene ohukanna wari. Onomujejihia mwaana pongwe, ola bu mwieri wa neetanu na mmohi. Oliye agali owuluvaleene, oyene athu ateene yamwiiriwa muliba ohubala.”³⁷ Vowi ni Mulugu kilivo ehinandeya.”

³⁸ Vano Mariya omwaakula, wiira: “Gili va, mwiimeleli a Nabwiya. Dhireye wa miyo dhatedhene mooligana ni madhu eenyu.” Vano mungero ovenyavo vemeliligiye.

Mariya Onomweddeda Ezabeli

³⁹ Malabo alene Mariya ahivenya mowaaguva odhowa nluwa no oZhudeya murudda wo mwaangoni. ⁴⁰ Ovolowa mba mwa Zakariya, omulojela Ezabeli. ⁴¹ Ezabeli ageewile olojela wa Mariya, mwaanaya ahikahinyaga mbaani mwa amaaye. Ezabeli teto ahidhaaleliwa Muneba Woweela. ⁴² Ahiwogaga ni ndhu notaama, wiira:

“Oreelihiwa di nyo
vaari va ahiyana,
yoreelihiwa si yoovaha ya
mbaani mweenyu!

⁴³ Asaa! Dhandeyile a ddi wi amaaye a Nabwiya aaga, egeeddele miyo?

⁴⁴ Vowi viwilimi olojela wa weenyu, mwaana ohiikahinya volubalevene ni ohagalala mbaani mwaaga. ⁴⁵ Muli oorelihiwa mwaha wororomela wi Nabwiya dhuwaaddeliyi, dhineere wiireya!”

Jibo ya Mariya

⁴⁶ Nuwindo, Mariya ahiira:

“Egumi yaaga enomuriha
Nabwiya,

⁴⁷ Muneba waaga onohagalala
mwa Mulugu,

Mvulumusi aaga.

⁴⁸ Vowi uhoona
wiiyeviha
wa mwiimeleli aaye.

Okuma dhiinova ni
anamabaliwelamo ateene
enagiirege oreelihiwa,

⁴⁹ mwaha wi oowodha ohugiirela
dhego dhulubale.

[†] **1:35** Naari vowi oweela onabaliwe oneeriwege Mwaana a Mulugu.

Oweela thili ndina naaye.

⁵⁰ Thagaraga dhaaye dhinowaafiyedha anamabaliwelamo ateene,
alene enamuriha.

⁵¹ Ohabalalesa ni moono waaye owiithukula,
ni moobuwelelo eewa oovirigana.

⁵² ohakithia mamwene
mudhittenguni dheewa,
waagweliha owiiyeviha.

⁵³ ohaarubaliha ni dhapama
aliba dala,
waapaganya ehinna yego oreela.

⁵⁴ Ohumukamihedha Ezarayeli mwiimeleli aaye,
kaddiwalele
thagaraga dhaaye

⁵⁵ wa Abarahamu
ni anamabaliwelamo aaye malabo mateene,
woona aroromelihye makolo eehu.”

⁵⁶ Mariya ahikala ni Ezabeli mweeri dhowaakkhana miraaru. Vano ow-elela vade vaaye.

Obaliwa wa Zhuwawu Namabathiza

⁵⁷ Mudhidhi ogaakwanile wowi Ezabeli abale, ahimbala mwaana mulob-wana. ⁵⁸ Amwaaddamani ni amudhi aaye egeewile wi Nabwiya ohumwed-diwela thagaraga volubalevene, yahihagalala ni oliye.

⁵⁹ Vigavirile malabo matanu na maraaru yahimudhowana mwaana wi eeneliwe yafunaga emutwe ndina na babaye, Zakariya. ⁶⁰ Amaaye ya-haakula, wiira: “Naari! Eeriwege Zhuwawu.” ⁶¹ Yahimwiirelaga: “Amudhi aawo kalivo winna ndina nenddo.”

⁶² Omukoha baba a mwaana ni madada wi ki mwaana ola eeriwege aani.

⁶³ Ahilobaga ntabwa olebavo: “Ndina naaye di Zhuwawu.” ⁶⁴ Mowaaguva mulomo waaye wahifuguwaga, niumi otapuwa, owogaga, amutamalaga Mulugu. ⁶⁵ Wahikala woova wa amwaaddamani ateene a Zakariya, ni murudda dhatedhene dho mwangoni wa oZhudeya, dhowogiwa dhowiireya nde. ⁶⁶ Ateeene yeewile nde yoologolela mmurimani, yiiraga: “Mwaana ola onaakale aani?” Mwaha wi kopolo dha Mulugu dhaali ni oliye.

Jibo ya Zakariya

⁶⁷ Zakariya, babaye Zhuwawu, ahidhaaliwa Muneba Woweeela Wambeela ovuhulela, eeraga:

⁶⁸ “Otamaaliwa akale Nabwiya,

Mulugu a Ezarayeli,

vowi oheeddelu ni woobola nlogo naaye.

⁶⁹ Ohunivenyihedha
ovulumuwa wa kopolo,

odheela vade va Davidi, mwiimeleli aaye.

⁷⁰ (Woona Mulugu mwawogeliyi odheela vamulomoni vanamavuhulela
oweeela

okuma wale-wale.)

⁷¹ Wi eere onoobola
wa amwiiddani eehu
mmadadani mwa ateene

alene enanaaba.

⁷² Ohooneyiha thagaraga dhaaye wa makolo eehu,
wubuwelela wandana wopanganelwa woweela,

⁷³ Olibela wamwiireliye
baba eehu Abarahamu:

⁷⁴ Wi eere onivulumusa mmadadanwa amwiiddanwa eehu,
wi nimwebedhege nihoovaga,

⁷⁵ moweela murima ni wiiwelela
vameentoni vaaye
malabo mateene a egumi yeehu.

⁷⁶ We mwaanaga, oneerege wiithaniwa namavuhulela a Mudhulu-dhulu.
Vowi oneere odhowa vasogolo va Nabwiya
wi osasanyedhe dila yaaye.

⁷⁷ Ni waalaleyela athu a Mulugu,
ovulumusiwa weewa
odheela mooleveleliwa
dhoothega dheeewa,

⁷⁸ vowi Mulugu eehu dathagaraga,
ohuneeddela okumela odhulu
woona ofuwa wa nduwa,

⁷⁹ wi naamoneyele ale
eneedda mwipipini
ni murinti wookwa,
wi asogolela manyalo eehu
mundila ya murenddele.”

⁸⁰ Mwaana ole owuunuwa ni oliba mwa muneba, ahikala mwiiddedereni ofiyedha nlabo nenddo neyooneyihiliye wa Ezarayeli woona pogo.

2

Obaliwa wa Yesu
(Mt 1.18-25)

¹ Mudhidhi olene ahikalawo kingi mulubale elabo yateene, eeriwa Aguxitu. Ahivuwiha nlamulo neeriliye wihinano athu ateene elebeliwe. ² (Vano waali olebela wowambeela, Kureniyo aaliye kingi elabo ya oSiriya.) ³ Vano athu ateene yahidhowa muthu-ni-muthu mudhi wobaliwela wi yalebeliwe.

⁴ Mwaha wa ela, Zhuuze ahivenya mudhi wo oNazareti, wo oGalileya. Odhowa nluwa no oBetelemi, oZhudeya, wewo wabaliwe kingi Davidi. Vowi oliye aali a nlogo na Davidi. ⁵ Ahidhowa wihinano alebeliwe ni mwihinaaye Mariya, aganna wari.

⁶ Zhuuze ni Mariya egali oBetelemi wewule, wahifiya mudhidhi wowihina oliye abale. ⁷ Ahimbala mwaana aaye, mwaana pongwe owambeela. Ahimuhuruwedha mwaana aaye ni guwo. Omukonantiha munigulani mwajela aneenyama munikolani mwemo pwagoniwa, mwaha wi suubi a aledo kamwaali mburo.

Anamajiha Mabila ni Angero

⁸ Mmuruddani mule yahikalamo anamajiha mabila. Ayene yaang'anelaga aneenyama eewa ni mahiyu. ⁹ Vano vowaaguva mungero a Nabwiya Mulugu ahifiya vameentoni veewa. Mungero ole agafiyile, waara wa nthithimilo na Nabwiya Mulugu wahamoneyelwa vaaligiisu, aliwa yahirurumuwaga ni woova. ¹⁰ Vano mungero ahiwogaga ni aliwa wiira: “Eee! Kamooove! Guhudhelanani muselu wapama, oyene onavahe odhivelawa wulubale athu

ateene. ¹¹ Vuruwananani, muselu ya buula: Muhubaliweliwa peeno veva, muluwani na Davidi, Mvulumusi, Kirixtu, Muthikitheliwi a Mulugu, Nabwiya. ¹² Yoonihelo ya enaakale ela: muneere omfwanya mwaana agabaliwe ohuruwedhiwe ni guwo, okonanthihiwe munigulani moojela aneenyama.”

¹³ Vano, wowaaguvene, yahifiya angero ajinji a anyakoddo odhulu, yegi omutamala Mulugu ni madhu ala:

¹⁴ “Athithimihiwe Mulugu odhulu wolapelesa,
murenddele elabo ya vati wa athu
alene Mulugu enaadhiveliye.”

¹⁵ Vano, dhahipadduwa angero egavenyile vameentoni va anamajija mabila, odhowa odhulu, yegi owoga mmohi ni mukwaaye: “Kabeni dhiinoveva oBetelemi noone dhendo dhipadduwile dhinoonihile Nabwiya Mulugu.”

¹⁶ Vano yahimaruwa mowaaguva edhwaga oBetelemi. Yahimfwanya Mariya ni Zihuze, egamukonantihile mwaana munigulani. ¹⁷ Vano egamoonile mwaanaya, yahambeelaga olaleya muselu wawaaddelile mungero mwaha wa mwaana ole. ¹⁸ Vano athu ateene yeewaga dhende, dhalaleyaga anamajija mabila, yahitkinaga. ¹⁹ Vano Mariya nda ologoleлага mmurimani apimaga, asayelaga ononelamo. ²⁰ Vano anamajija mabila ale yahimaruwaga owelela mundduli. Edhowaga mundila yegi omuthithimihia emutamalaga Mulugu, mwaha wa dhatedhene dhendo dhewiliwiwa, woona mwaaddeliwiisu.

Yesu Onodhowiwana Nyuba ya Mulugu

²¹ Egavirile malabo matanu ni maraaru mwanaya ahineliwa moligana mmalamuloni a Mozezi. Ageeneliwe yahimuthwa ndina na “Yesu,” woona mwawogele mungero Mariya ahinakanne wari.

²² Egaakwanile malabo oweenlihiwa, woona malamulo a Mozezi yahimuthukulela mwaanaya oZheruzalemi wi oonihiwe wa Nabwiya, ²³ (Woona mulebeliwiwa mmalamuloni a Nabwiya: “Anapongwe ateene owambeela eneerege oveleeliwa wa Nabwiya.”*) ²⁴ ni nvahi wa mukutho, woona dhilebiwe mmalamuloni wa Nabwiya: “paara emohi maziya naari kanganjiwa biili dhing'onong'ono.”†

²⁵ OZheruzalemi wahikala mulobwana oyene eeriwa Sumeyawu. Oliye aali ohariha, omoova Mulugu. Oojejihedha wooboliwa wa Ezarayeli. Muneba Woweela waali ni oliye ²⁶ Wahimvuhulela Muneba Woweela whina kanaakwe ahimoonile Kirixtu a Nabwiya. ²⁷ Moosogoleliwa ni Muneba Woweela ahivolowa nyuba ya Mulugu. Ababiinya a mwaana yahimudhowana Yesu wi yaakwanelihe dhatedhene dhilebiwe mmalamuloni dholigana ni mwaana abaliwa. ²⁸ Egamfiyilena wule, Sumeyawu ahimuthuku-laga mwaana mmadadani mwaaye, omutamalela Mulugu eeraga:

²⁹ “Vano, Nabwiya,
gipaganyeni ni murenddele
miyo, mwiimeleli eenu,
woona mwagiroromelihe nyo.
³⁰ Mwaha wi dhiinova meento aaga
ehoona ovulumusa weenyu,
³¹ wewo osasanyedhe nyo
vameentoni va athu ateene,

* ^{2:23} Ex 13.2, Ex 13.12 † ^{2:24} Lv 12.8

32 waara wi wamooneyela
athu a milogo dhimohi‡
dinavaha nthithimiho wa nlogo neenyu Ezarayeli.”

33 Babaye ni amaaye a Yesu yotikinaga dhawogaga Sumeyawu dha mwaanaya. **34** Sumeyawu ahareeliha, wiira wa Mariya, amaaye a Yesu: “Mwaanaola ohusakuliwa wi akale totela yotongwa naari ovenya wa athu ajinji a Ezarayeli, onakale etonyihedho yovanyihana. **35** Oliye onodha oneey-ihe mobuwelo a mmirimani mwa athu ajinjeene. Nyo mmani okubanya onodha olate murima weenyu woona supadda.”

36 Wahikala namavuhulela mmohi a mwihiyana eeriwa Anna mwaana a Fanuweli a nlogo na Aseri. Aali owuluvaleene agateliwe akalile yaaka tanu nabiili. **37** Nuwindo okala maamukwele yaaka makumi matanu namararu ni yaaka nayi. Kaavenyamo munyuba ya Mulugu, mbwenye owebedha mahiyu ni mutana ni othuga. **38** Vano mudhidhi mmohive olene ahimutamalelaga Mulugu, awogaga dha nriihon a mwaanaya wa ale ateene yajejihedha wooboliwa wa Zheruzalemi.

39 Egamatilie oharihamo dhawoga malamulo a Nabwiya yahiwelela o Galileya oluwanee weewa, oNazareti. **40** Mwaanaya owuunuwa ni odhaliwa ononelamo, mahala a Mulugu yaali ni oliye.

Muzombwe Yesu Munyuba ya Mulugu

41 Yaaka ni yaaka ababiinya a mwaana yodhowesa oZheruzalemi, omath-angani a Paxkwa. **42** Yesu agaakwanihile yaaka kumi ni biili, aliwa yahidhowa oZheruzalemi omathangani, woona molemeelela. **43** Egamatilie malabo a mathanga, ewelagawo, Yesu ahihalaga oZheruzalemi, ababiinya ehnionaga. **44** Yubuwelaga wi oli ni akwaaye a mulenddoni, yaheeddaga nlabo nateenene nuwindo wambeela omusayela mwa amudhi eewa ni mwa ale yamunonile, **45** yahamfwanyiligiya yahiwelelaga oZheruzalemi wi yamusayelege. **46** Vigavirile malabo maraaru yahimfwanyaga munyuba ya Mulugu agakaratilie vaari va anamasuuziha a malamulo avuruwanaga ako-haga. **47** Ateene alene yamwiwaga yotikinaga vajinjivene ni zelu yaaye ni maakulelo aaye. **48** Mowaaguva ababiinya egamoonile yaaligi otikiniheya, amaaye yahimwiirelaga: “Mwaanaga, wiiriliwe ela ni hiyo ddi? Ababo ni miyo nahisimwela ni wusayela.”

49 Oliye ahawaakulaga, wiira: “Mwahaya bwaddi mwagisayeleinu? Kamunonile wi eli yoofuneya wi nkalege vade va ababa?” **50** Mbwenye aliwa kayeewelelagamo yawaaddeligiye.

51 Omaruwa vamohi ni aliwa odhowaga oNazareti. Amaaye yoologolela dhego dhatedhene dhedhi mmirimani. **52** Yesu owuunuwa ni ononelamo, ni mahala, vameentoni va Mulugu ni va athu.

3

Zhuwawu Namabathiza Onosasanyedha Dila (Mt 3:1-12; Mr 1:2-8)

1 Vowaakwana yaaka kumi ni tanu dha omwene wa Tibeeriyo Sezari, Pontiyo Pilatu agali kuminadori* oZhudeya, Heroddi agali namathonga a elabo ya oGalileya, ddibile Filipi aali namathonga a elabo yo Etureya ni

‡ **2:32** Ala baayene yahaali a aZhudewu. * **3:1** Naari tetararaka Kuminadori eriiriwa tetararaka, athonga epaddi ya nannayi ya murudda mmohi; teto moone, verisikulu 19.

Tarakoniti, Lusaniya aali namathonga a elabo yo Abilene; ² Annasi ni Kayifa yaali apogo a anamakutha. Mudhidhi oyene yahidha madhu a Mulugu wa Zhuwawu, mwaana a Zakariya, agali mwiiddeddereni. ³ Zhuwawu aheddedda mirudda dhatedhene dha nikome na mwihinje Zhorodawu alaleyaga wi ebathiziwe ethwaruwaga, wi eleveleliwe mwa dhoothega. ⁴ Woona mwalebeliwiwa muniivuruni na madhu a namavuhulela Ezaya:

“Ndhu nnakuwa mwiiddeddereni:

‘Sasanyedhani rampa a Nabwiya,
moogolele dila yaaye.

⁵ Maddiba mateene evuheleliwe,
mwango dhatedhene ni thuthuma dhiliganelihiwe
dila dhokoromana dhineere woogoliwa.
Muli magologodha muliganelihiwe.

⁶ Athu ateene eneere woona ovulumusa wa Mulugu!” †

⁷ Anamwinji yodhowa wi yabathiziwe. Zhuwawu oowoga, eeraga: “Nyo mulogo wa dhivili! Wuwaaddelileni ottawa owali wa Mulugu onafuna odha baani? ⁸ Mvahe dhoovaha dhebaribari dhowoneyiha otthwaruwa. Muhambeele owoga wekiinyu: ‘Nihikanna baba eehu Abarahamu.’ Miyo ginowuwaaddelani wi Mulugu onowanda, osaddula mabwe alena wi ekale ahima a Abarahamu. ⁹ Vano badho ehimala osasanyedhiwa, eli vati va mithanko. Mithanko dhatedhene dhihinavaha dhoovaha dhabama dhi-neere okakathiwi wi dhivokedhiwe omunddoni.”

¹⁰ Nuwindo anamwinji yahimukohaga, yiiraga: “Nneere hiyo ddi?”

¹¹ Zhuwawu ahawaakulaga, eeraga: “Ole winna malaya meenddi, amvahe nimohi ole ohinna. Ole winna yooja, eerena emodha-modhave.”

¹² Yahifiyaga anamakoha-musoko† wi ebathiziwe. Yomukohaga, yiiraga: “Namasuuziha, ki nneerege ddi?”

¹³ Ahawaakulaga, eeraga: “Naari kamwenjedhedhe okwaranyiha mwaaddeleliwinyu.”

¹⁴ Teto anyakkoddo yahimukohaga, yiiraga: “Ki hiyo, nneerege ddi?”

Oliye ahawaakulaga: “Kammwakege muthu korowa dhaaye momuthusa, kammurathelenge muthu. Mudhiveliwege ni yoliveliliwa yeenyu.”

¹⁵ Mudhidhi oyene athu yomujejihedha Muthikitheliwi, yowikoha weekiwa akala Zhuwawuya daali Muthikitheliwi. ¹⁶ Zhuwawu ahawaakulaga ateene: “Miyo, epaddi yaaga, ginowubathizani ni mahinje, mbwenye onodha oowodha onagikwaranya miyo naari kagifwanele otapula migoyi dha sapatho dhaaye. Oliye Oneerege wubathizani ni Muneba Woweela ni munddo. ¹⁷ Etelo yaaye eli immadani amvethena tirigu wi amuhele vatatanii, makataya aapahe ni munddo wohuthima.”

¹⁸ Nuwindo, oolaleya muselu wapama alibihaga ni madhu majnjene.

¹⁹ Vano Zhuwawu agamusumulule namathonga a murudda, Heroddi ole mwaha womutela Heroddiya, mwadha ddibile ni dhabure dhimohi dheeriliyena, ²⁰ Heroddi ahenjedhedha dhabure dhimohi vomuhela Zhuwawu mukaambura.

*Obathiziwa, ni Makolo a Yesu
(Mt 3.13-17; Mt 1.1-17; Mr 1.9-11)*

† **3:6** Es 40.3-5 † **3:12** Naari publikanos Anamakoha-musoko yanna mukalelo wabure vameentoni va athu; teto moone mu Lk 5.27 ;Lk 5.29 ;Lk 5.30; Lk 7.29 ;Lk 7.34; Lk 15.1; Lk 18.10 ;Lk 18.11 ;Lk 18.13 e Lk 19.2.

²¹ Dhahipadduwa athu ateene ebathiziwaga, teto ahibathiziwa Yesu. Alobelaga odhulu wahithuleya. ²² Muneba Woweela wahikitela va Oliye ni mooneyelo a kangayiya. Vano wahiiweya ndhu odhulu neerilege: "We Oli Mwaanaga; odhivela aaga, mwa we ginodhiveliwa."

²³ Yesu, aganna yaaka dhowaakwana makumi maraaru, ahambeela mabasa aaye. Aali, woona mweerelisu, mwaana a Zhuuze,

mwaana a Heli, ²⁴ Heli mwaana a Mathati,
Mathati mwaana a Levi, Levi mwaana a Meliki,
ola di mwaana a Yannayi, mwaana a Zhuuze,

²⁵ Zhuuze mwaana a Matathiya,
Matathiya mwaana a Amosi,

Amosi mwaana a Nahumu,
ola di mwaana a Esili, mwaana a Nagayi,

²⁶ Nagayi mwaana a Maathi,
Maathi mwaana a Matathiya,
Matathiya mwaana a Semeyini,

ola di mwaana a Yoseki, mwaana a Yoda,
²⁷ Yoda mwaana a Yowanane,

Yowanane mwaana a Resa,
Resa mwaana a Zorobabeli,
ola di mwaana a Salatiyeli, mwaana a Neri,

²⁸ Neri mwaana a Meliki,
Meliki mwaana a Addi,
Addi mwaana a Kosamu,

ola di mwaana a Elemadamu, mwaana a Eri,

²⁹ Eri mwaana a Zhoxuwe,
Zhoxuwe mwaana a Eliyeeziri,
Eliyeeziri mwaana a Yorimu,

ola di mwaana a Mathati, mwaana a Levi,

³⁰ Levi mwaana a Sumeyawu,
Sumeyawu mwaana a Zhuda,
Zhuda mwaana a Zhuuze,

ola di mwaana a Yonamu, mwaana a Eliyakimu,

³¹ Eliyakimu mwaana a Meleya,
Meleya mwaana a Menna,

Menna mwaana a Matatha,
ola di mwaana a Nathani, mwaana a Davidi,

³² Davidi mwaana a Yese,
Yese mwaana a Obeddi,
Obeddi mwaana a Bowazi,

ola di mwaana a Sala, mwaana a Naaxoni,

³³ Naaxoni mwaana a Aminaddabe,
Aminaddabe mwaana a Adimini,

Adimini mwaana a Arini,
Arini mwaana a Hesiromo,

ola di mwaana a Perezi, mwaana a Zhuda,

³⁴ Zhuda mwaana a Yakobo,
Yakobo mwaana a Ezaaki,

Ezaaki mwaana a Abarahamu,
ola di mwaana a Teera, mwaana a Nakori,

³⁵ Nakori mwaana a Seruge,
Seruge mwaana a Ragawu,

Ragawu mwaana a Pelege,

ola di mwaana a Eberi, mwaana a Sala,
 36 Sala mwaana a Kayinani,
 Kayinani mwaana a Arifaxadi,
 Arifaxadi mwaana a Semu,
 ola di mwaana a Nowe, mwaana a Lameki,
 37 Lameki mwaana a Methuzela,
 Methuzela mwaana a Enoki,
 Enoki mwaana a Zharedi,
 ola di mwaana a Mahalaleyeele, mwaana a Kayinani,
 38 Kayinani mwaana a Enoosi,
 Enoosi mwaana a Sethi,
 vano ola, di mwaana a Adamu,
 mwaana a Mulugu.

4

Weehiwa wa Yesu

(Mt 4.1-11; Mr 1.12; Mr 1.13)

¹ Yesu, agawelilewo omwihinjeni Zhorodawu, ahidhaaleliwa ni Muneba Woweela. Muneba mmohive wahimuthukulela mwiiddeddereni,
² mowaakwana malabo makumi manayi, wewule ehiiwaga ni Sathana. Kaaya yego malabo alene. Omamalelowa ahivoliwa dala.

³ Vano, Sathana ahimwiirela: “Akala Oli Mwaana a Mulugu, wiirele nibwe ndda nsadduve okale mukaathe.”

⁴ Mbwenye Yesu ahaakulaga, wiira: “Dhihilebiwa: ‘Kahuwo mukaattheve onamukalihana muthu egumi.’* ”

⁵ Vano, Sathana ahimuthukulelaga vootaama, omooniha mowaaguva omwene wateene wa mwiilaboni. ⁶ Sathana ahimwiirelaga: “Gineere wuvaha othonga wula wateene ni nthithimihio neewa, vowi gihivahiwa, vano ginoovaha wa oyene ginamfunimina. ⁷ Wagikokorela, ogeebedha, dhatedhene dhinakala dhaawo.”

⁸ Yesu ahimwaakulaga, wiira: “Dhihilebiwa: ‘Omwebbedhe Nabwiya Mulugu aawo, omwiimelela Olyieneve, baahi.’† ”

⁹ Nuwindo Sathana ahimuthukula, omudhowana oZheruzalemi, omug-weliha vadhulu vanyuba ya Mulugu, omwiirela: “Akala Muli Mwaana a Mulugu, mulupele vati, ¹⁰ vowi dhihilebiwa:

“Mulugu oneere waaruma angero aaye
 wi yuwing’aneleni;

¹¹ vano, aliwa eneere wuhiddeelani ni madada eewa,
 wi manyalo eenyu enadha eporeye ni mabwe.”‡ ”

¹² Yesu ahaakulaga, wiira: “Nda dhihiwogiwa: ‘Ohumweehe Nabwiya Mulugu aawo.’§ ”

¹³ Sathana vagomeliwiye omweeha, ahimwihiyaga ajejihedhaga ofiya mudhidhi wofwaneelela.

Yesu Onokooddiwa oNazareti

* 4:4 Dt 8.3 † 4:8 Dt 6.13 ‡ 4:11 Sal 91.11, Sal 91.1, 12 § 4:12 Dt 6.16

¹⁴ Vano Yesu ahiwelela oGalileya ni owodha wa Muneba Woweela, bili yaaye yahiweya, okumela wewule ni mirudda dhatedhene dhowaad-damana. ¹⁵ Oosuuziha wewule munyuba dha malobelio dha aZhudewu, athu ateene yomutamaala.

¹⁶ Nuwindo Yesu ahidhowa oNazareti wewo waleliwiye. Nlabo na Sabuddu woona molemeelela, ahivolowaga nyuba ya malobelio. Ahiimelaga wi eelenge wewule. ¹⁷ Yahimwinkaga niivuru na namavuhulela Ezaya. Oliye ofugula,* ofwanya valebiwe madhu ala:

¹⁸ “Muneba wa Mulugu
ohugikitela.
Ohugithikithela
wi gaalaleyele muselu wapama
aliba orabula.

Ogirumile
wi gilaleyele wooboliwa
wa athu eli mukaambura,
aliba ohoona
wi yoonege,
ni watapula ale yinna goyi,
¹⁹ wi gilaleyele yaaka ya mahala
a Mulugu.†”

²⁰ Ageelengile, ahifugaga niivuru ndde, omwinka mwiimeleli, okaraati. Vevale, meento a athu ateene yaaligi va Oliye, yegi omusugwa. ²¹ Vano, Yesu ahambeelaga owoga, wiira: “Peeno veva, dhatedhene mwiwiliinyu odheela Maleba Otaleleya, gelengilimi dhihaakwanela.”

²² Ateene yomwiirelaga onamoona ni otikina mwa madhu aaye amahala, yadheela vamulomoni vaaye. Yookohanaga, yiiraga: “Olaya kahuwo mwaana a Zhuuze?”

²³ Yesu ahawaaddela, wiira: “Mohanganyedha munodha mugiwogelege nigano: ‘Nowi we oli ng’anga, wiyilihe wekaawo! Dhatedhene mwiwiliihu mwiirilinyuna oKafaranawu, Mwiirena owaninyu wuno.’”

²⁴ Yesu ahiwogagave, eeraga: “Ebaribareene Ginowuwaaddelani: Kalivo namavuhulela naari mmohi, onaakeliwa ni nriihoo veelaboni vaaye.

²⁵ Ebaribareene Ginowuwaaddelani wi mudhidhi wa Eliyazi wahikala amaamukwele ajinjeene muEzarayeli. Wahikala yuumi yaaka thaaru ni mweeri mitanu na mmohi, muzongwe ahiirubwaga yahikalawo dala yulubale elabo yateeene. ²⁶ Eliyazi karumiwe naari wa amaamukwele ale, arumiwe wa maamukwele oSarapita, baahi, akala waaddamela oSidoni.

²⁷ Mudhidhi wa Elizewu, muEzarayeli mwahikala aliba maredda‡ gwee, kaavo naari mmohi eelihiiwe – aali Naaman, baahi, muSiriya.”

²⁸ Athu ateene yaaligi munyuba ya malobelio yewaligiwa, yahitakaleli-waga vajinji. ²⁹ Yahimukumihaga Yesu muluwani, omudhowana vadhulu va mwango wootaama wewo wamagiliwa nluwa neewa, ni efunelo yowi yamvokedhe musiddo mooddiha. ³⁰ Mbwenye Yesu ahiviraga vaari veewa, ovenyavo.

* ^{4:17} Naari otapula † ^{4:19} Es 58.6, Es 61.1-2 ‡ ^{4:27} Muwogelo wa eGeregu, kunatonyihedha mareddave, mbwenye teto dhiredda dhoziyana-hiyana dha nikupa.

*Yesu Ahigara Muneba Wootakala
(Mr 1.21-28)*

³¹ Vano Yesu ahikitelaga oKafaranawu, mudhi mulubale wa oGalileya. Nlabo na Sabuddu egi wasuuza athu munyuba ya malobel. ³² Athu yotikinaga masuuziho aaye, vowi yaali madhu othonga.

³³ Ahikalagavo mulobwana mmohi ahiddiwe ni muneba wabure. Ahikuwaga ni ndhu notaama, wiira: ³⁴ “Iii! Ninna ddi hiyo ni nyo,[§] Yesu a oNazareti? Mudheele ontolosa? Miyo guhuunonani wi Muli Oweela a Mulugu!”

³⁵ Yesu ahimusumululaga, wiira: “Kamaalawo! Okume mwa muthu oyo!” Vano muneba wabure ole wahimutongihedha vati vameentoni va athu ateene, okumamo mwa muthu ole, kuwamporosege.

³⁶ Ateene yegi otikina valubalevene. Ewogaga muthu ni mukwaaye: “Alaya madhu baani? Enathonga ni kopolo mineba dhootakala wi dhivenyemo; dhivenyamo.” ³⁷ Bili ya Yesu yoovuwa mirudda dhatedhene dhowaaddamela.

*Owodha wa Yesu mwa Mineba Dhootakala ni Dhireda
(Mt 8.14-17; Mr 1.29-34)*

³⁸ Yesu ahimaruwaga nyuba ya malobel, odhowa vade va Simawu. Omfwanya mbogohi a Simawu ahikalagana goyi mwaha wa nipaddawe nulubale. Anaamudhi aaye yahimulobaga wi amuyilihe. ³⁹ Ahisusedhaga vaaligi muredda, ageemelile, ahithonga wi nipaddawe nimwihiye; omwihiya, oyila. Mowaaguva ovenya, wambeela waakamihedha aliwa.

⁴⁰ Ociguwoni, athu ateene yegi waadhana wa Yesu alene yannaga dhiredda dhoziyana-hiyana. Egi waayiliha, vowaahela madada mmohi ni mmohi. ⁴¹ Vaaligi, mineba dhabure dhagi okuma mwa athu ajinji. Dhigakumile, dhookuwaga, dhiiraga: “Nyo Muli Mwaana a Mulugu!” Yesu oonihaga wi dhihiwoge vowi dhahinona wi Oliye di Kirixtu.

⁴² Ode ogasile, Yesu ahidhowaga mburo mmoheenee yeekawo. Anamwinji yoomusayelaga, egamfwanyile yahimuwaadelalaga wi ahidhowe. ⁴³ Mbwenye Oliye ahawaaddelaga, wiira: “Eli yofuneya wi gaalaleyele Muselu Wapama wa Omwene wa Mulugu teto mmaluwanii amohi, vowi si dhendo Girumeliwiimi.” ⁴⁴ Nuwindo, oolaleyela munyuba dha malobel dha oZhudeya.*

5

*Wiithaniwa wa Anamasuuza Owambeela
(Mt 4.18-22; Mr 1.16-20; Zhu 1.35-42)*

¹ Nlabo nimohi Yesu ahimelaga seresere ya nyaza yo oGenazareti,* athu ajinji yegi ompinyaminya wi yiwe madhu a Mulugu. ² Oliye ahoonaga mwanddeya miindi seresere ya nyaza, anamatotaya yahikitagamo, yaahuwaga mathavi eewa. ³ Yesu ahigwelaga mmwanddeyanii mmohi, waaligi wa Simawu, ahimulobaga wi asusihedhe vang'ono munyaza. Ahikaratigi, wambeela wasuuza anamwinji.

⁴ Agamalile owoga, ahimwirelaga Simawu: “Susihedha wooddiha mwabwinihie mathavi eenyu wi mutote.”

§ 4:34 Muwogelo wa akadda Heberewu onafuna owoge ddi: Munihye mmurenddeleni. * 4:44 Dhooliebiwa ni madada dhimohi dhini: Galileya. * 5:1 Ela sowi Nyaza yo oGalileya.

⁵ Simawu ahaakulaga, wiira: “Namasuuziha, mahiyu mateene nihilaba kanipile yego. Mbwenye, vowi di Nyo munagiruma waabwiniha, miyo gineere orumeedha.”

⁶ Egabwinihile mathavi, yahipaga somba dhijinji mathaviya yahambeelaga otaleya. ⁷ Yahiiraga etonyihedho wa akwiwa yaaligi mmwanddeyani mmohi, wi edhe yaakamihedhe. Aliwa yahidhowaga, odhaaliha mwanddeya dhaamiinddi dhene ofiyedha ohala vang'ono wi dhibwine.

⁸ Simawu Peduru agoonile nde, ahikokoraga vakuukuvi ni Yesu, wiira: “Nabwiyan, mususe wa miyo vowi gili namathea.” ⁹ Simawu ni akwaaye yahitkinaga menjivelo a somba dhapiligiisu. ¹⁰ Tiyago ni Zhuwawu, amwaana a Zebideyo, akwaaye a Simawu, teto yahitkinaga vajnjivene. Yesu ahiiraga Simawu: “Kawoove! Okuma dhiinoveva odhowa osogolo onakale namatota a athu.” ¹¹ Mowindo yahisusihedhaga mwanddeya dheewa ode, ohiya dhatedhene, omuharaga Yesu.

Oyilihiwa wa Muliba Maredda

(Mt 8.1-4; Mr 1.40-45)

¹² Dhahipadduwa ayi, Yesu aaligi nluwa nimohinene, mwahikala mulobwana mmohi anna maredda[†] mumwiilini wateeene. Agamoonile Yesu, ahikokoraga, oworomihedha kove vati, omuloba, wiira: “Nabwiya, Nyo muhukanna owodha, mwafuna, mugeelihe.[‡]”

¹³ Yesu ahimutapulelaga madada omukahinyana, wiira: “Gihifuna. Kala oweela!” Mudhidhi olene maredda yahimmalelaga.

¹⁴ Yesu ahimuthonga: “Onamwaaddele mmohi; mbwenye odhowe wadhoonihedhe wa anamakutha ni oveleela mukutho woweelihwa waawo, woona mwalamulele Mozezi, okale onamoona wa athu ateene.”

¹⁵ Mowindo, bili ya Yesu yoovuweya vajnjivene. Athu ajinji yoodha omvuruwana, ni oyilihiwa dhiredda dheewa. ¹⁶ Yesu oopothowesa, odhowa mburo mmohi vayeeka, olobelaga.

Oyilihiwa wa Muliba Oragala

(Mt 9.1-8; Mr 2.1-12)

¹⁷ Nlabo nimohi Yesu eeraga osuuziha. MaFarizi ni anamasuuziha a malamulo yahikaratigi mwemule, yadheelege mirudda dhatedhene dha oGalileya, dha oZhudeya ni dha oZheruzalemi. Owodha wa Nabwiya waaligi ni Oliye wi aayilihe aredda. ¹⁸ Nuwindo alobwana amo-hiwa yahidhaaga yamuthukulege muliba maredda emuthebaga vanteten. Yoosayelaga vomvolowana wi yamurule vameenton vi Yesu. ¹⁹ Ehoonile vomvolowana ni mwaha wa anamwinji. Yahigwelaga vadhulu va nyuba mwaalig Yesu. Ovenyihavo mapalipali, okitelihavo ntete vaari va athu, vameentonivene va Yesu.

²⁰ Yesu vovoona nrromelo neewa, ahimwiirelaga muliba oragala ole: “Mukwaaga, dhoothega dhaawo dhihileveleliwa.”

²¹ Anamasuuziha a malamulo ni maFarizi yowubuwelaga: “Olaya onanyemula dha Mulugu baani? Onalevelela dhoothega, baani? Muluguve, baahi.”

²² Yesu vonona dhobuweligiisu, ahawiirelaga: “Mmirimani mweenyu munaanganyedhela ddi? ²³ Yoohurusa siivi: wiira, ‘Dhoothega dhaawo dhihileveleliwa,’ naari wiira, ‘Venya weedde?’ ²⁴ Mbwenye wi munone

[†] 5:12 Muwogelo wa akadda eGeregu kunateonyihedha mareddave mbwenye teto dhiredda dho-hi-na-hiyyana dha nikupa [‡] 5:12 Naari mugiyilihe

Mwaana a Muthu ohukanna othongi mwiilaboni ya vati woolevelela dhoothega” — ahimwiireлага muliba oragala ole — “Ginowaaddela: Ovenye, othukula ntete naawo, odhewege vade vaawo.” ²⁵ Mowaaguva ahivenyaga vameentoni veewa, othukula ntete vakonatiligiye, owelela vade, amutamalaga Mulugu. ²⁶ Ateene yahitikiniheyaga ni woova, yomuthithimihaga Mulugu, yiiraga: “Peeno dhoonilihu sotikiniha.”

Wiithaniwa wa Levi (Mt 9.9-13; Mr 2.13-17)

²⁷ Dhigeereyile nde, Yesu ahivenyagavo, omoona namakoha-musoko agakaratilie vowaakela korowa, eeriwa Levi. Omwiirela: “Giharege.” ²⁸ Levi ahivenyaga, ohiya dhatedhene, omuharaga.

²⁹ Vano Levi ahimusasanyedhela Yesu mathanga malubale vade vaaye. Anamakoha-musoko ajinjeene ni athu amohiwa yaaligi vameeza ni aliwa. ³⁰ Mbwenye maFarizi ni anamasuuziha a malamulo yegi wawaaba anamasuza a Yesu. Yahaakohaga, yiiraga: “Munaja, ni ong’wa ni anamakoha-musoko, ni anamathega alubale, mwaha wa ddi?”

³¹ Yesu ahawaakulaga, wiira: “Agumi kinamurabulela ng’anga, mbwenye aredda. ³² Kagidheelee wawiithana athu ooharihamo, mbwenye gadheelee anamathega wi ethwaruwe.”

Yesu Onokohiwa Mwaha Woothuga (Mt 9.14-17; Mr 2.18-22)

³³ Vevale, maFarizi yahiwogaga ni Yesu, wiira: “Anamasuza a Zhuwawu enothuga, elobelaga dila biili-billi. Anamasuza a maFarizi teto enowiirana ndo. Mbwenye aawo enooja, enoong’wa.”

³⁴ Yesu ahawaaddelaga, wiira: “Akwaaye a namatela enothuga agali vevo namatelaya? Kadhinandeya! ³⁵ Mbwenye nneere ofiya nlabo onavenyihiyevi vaari veewa namatelaya; mudhidhi oyene eneerege othuga.”

³⁶ Nuwindo Yesu ahawogela musibe ola, wiira: “Kaliwo muthu onatala ecapa ya yowara exa, acapelana yowara yawale. Eera ndo, enonongeya, yacapeliwana exa, kinafwaneelela ni yawale. ³⁷ Kaliwo onamuhela vinyu muxa mmathumbani a makupa awale. Eera ndo, vinyu muxa onotala mathumbaya; onothathiya vinyuya, mathumbaya enonongeya. ³⁸ Mohiyanaha, vinyu muxa onaheliwa mathumba maxa wi dhatedhene dhilogoleye. ³⁹ Kaliwo onamung’wa vinyu awale, amfunaga muxa, vowi oneerege: ‘Awale dili pama.’”

6

Nabwiya a Sabuddu (Mt 12.1—14; Mr 2.23—Mr 3.6)

¹ Sabuddu mmohi, Yesu aviraga mmiddani mwa tirigu, anamasuza aaye yegi ovulula ni madada mangala a tirigu, othikithaga, otakunaga. ² MaFarizi amohiwa yahimukohaga, yiiraga: “Dhinakooddihiwa nlabo na Sabuddu, muneerelana ddi?”

³ Yesu ahawaakulaga, wiira: “Nyo kamweelengile dheerile Davidi ni akwaaye aganna dala? ⁴ Ahivolowaga nyuba ya Mulugu, othukula mikaathe dhoreelihiiwa, oja. Waavaha ale yannigiyena. Mikaathe nde dhihinarumeedhihiwa ojiwa bure mbwenye anamakutha weekiwa.” ⁵ Yesu ahenedhedhaga, wawaaddela: “Mwana a Muthu dili Nabwiya a Sabuddu.”

⁶ Sabuddu mmohi, ahivolowaga nyuba ya malobelio, egi osuuziha. Vano, mwemule mwahikalaga mulobwana mmohi akwile ndada na moono wooja.

⁷ Anamasuuza a malamulo ni maFarizi yoomusugwaga, esayelaga woona akala amuyilihe muthu nlabo na Sabuddu wi ekalena yomusumelela.

⁸ Mbwenye Yesu aganonile moobuwelelo eewa, ahimwiirelaga mulobwana ole. "Vanya, osusedhe vaari va." Oliye ovenya, okala owimeleene.

⁹ Vano Yesu ahawiirela aliwa: "Ginowukohani, [munoona havi]? Nlabo na Sabuddu dhinarumeedhiwa siivi? Wiira dhabama, naari dhabure? Ovulumusa, naari opa?"

¹⁰ Vano ahasugwaga, yamwapelege, omwiirela mulobwana ole: "Katal-pula ndada naawo." Oliye wiirana ndo, ndada oyila. ¹¹ Mbwenye aliwa yahitakaleliwaga vajinjivene, okanganelaga mwakaleligiisu esayelaga dhoo-funa omwiirana Yesu.

Osakuliwa wa Arumiwi Kumi ni Abiili (Mr 3:13-19)

¹² Nlabo nimohi mwa mudhidhi olene, Yesu ahidhowaga wi alobele omwangoni. Ahivireliwaga mahiyu mateene alobelaga wa Mulugu. ¹³ Vano ogasile, ahawiithanaga anamasuuza aaye, waasakulavo kumi ni abiili, mwa ayene. Waasakulavo, yaavahiliye ndina na arumiwi: ¹⁴ Simawu, amvahiliye ndina na Peduru; ni Andere, ddibilaaye; Tiyago ni Zhuwawu; Filipi ni Bartolomeyo; ¹⁵ Matewuzi; ni Tome; Tiyago, mwaana wa Alifiyu; ni Simawu, eeriwa Muzeloti; ¹⁶ Zhuda, mwaana a Tiyago; ni Zhuda Esikariyothi, ole ampelekile Yesu.

Mareelihi ni Oddilu

¹⁷ Yesu, vamohi ni anamasuuza aaye, yikitaga omwangoni. Ahiimelaga vamusewasewani vatugumanenge anamasuuza ajinjeene, ni muthithi mulubale wa athu amohi, yadheelaga murudda wateene wo oZhudeya, ni oZheruzalemi, ni a seresere ya nyaza yo oTiru ni oSidoni. ¹⁸ Yadheelege omwiilia ni oyilihiwa dhiredda. Ale yarabulihika ni mineba dhabure yooyilihiwa. ¹⁹ Anamwinji ateene yoosayelaga omukahinya, vowi kopolo dhookuma mwa Oliye, wayilihaga ateene.

²⁰ Vano Yesu ahawang'anaga anamasuuza aaye, wawaaddela, wiira:

"Oreelihiwa di nyo,
mwihinna yego,
vowi Omwene wa Mulugu
bweenyu.

²¹ Oreelihiwa di nyo
mwinna dala dhiinova,
vowi muneere orubala.

Oreelihiwa di nyo
munaandda dhiinova,
vowi muneere oteya.

²² Oreelihiwa di nyo
athu yowiiddani,
ekooodda weedda ni nyo, yuruwanagani,
enyemulaga ndina neenyu woona nabure,
mwaha wa Mwaana a Muthu.

²³ "Teyelani nlabo nenddo, agalalani ni olupa mwaha wi yothuviwa yeenyu si yulubale odhulu. Vowi yeere ndo awale-wale eewa ni ana-mavuhulela.

²⁴ "Mbwenye ooddilu di nyo oreela,

vowi muhakela
yowuhagalasani.

²⁵ Ooddilu di nyo
munarubala mudhidhi ola,
vowi munodha mvoliwe.
Ooddilu di nyo munateya dhiinoveva,
vowi munodha mukubanye
ni wuundda.

²⁶ Ooddilu di nyo,
yootamalagani
athu ateene,
vowi awale-wale
eewa yeerile ndo ni
anamavuhulela ooratha.

Waadhivela Amwiiddani (Mt 5.38-48)

²⁷ "Mbwenye Ginowuwaaddelani nyo, munagiiwa: Mwaadhivelege amwiiddani eenyu. Mwawiirelege dhapama ayene enowiiddani.
²⁸ Mwareelihege ayene enowulumelani, mwalobelelege ale enootabusani.
²⁹ Ole onoddwadhanu mbarutuni, mmurugunusedhe kukuru emohi. Onowaakanu kazako, kamukooddihedhe wuwaakanu maleyaya.
³⁰ Mwaavahege ateene enoolobani, ole onathukula eli yeenyu, kammusanye wi owelihedheni. ³¹ Dhatedhene dhinafuniinyu wi athu yuwiirelegeni, nyo mwawiirelege aliwa.

³² "Mwaadhivelega alene enoodhivelani, munadha muthuviwe ddi? Anamathegeene enowaadhivele teto alene enaadhivele aliwa. ³³ Mwawiirelega dhapama alene enowiirlani dhapama, munadha muthuviwe ddi? Anamathegeene teto enowiirana ndo. ³⁴ Mwaabolihaga alene munajeji-hinyu wi yuvelihedheni, munadha muthuviwe ddi? Vowi, ni anamathegeene enobolihihana anamathegave, ejejihedhaga owelihedhiwa yanke. ³⁵ Mbwenye nyo, mwaadhivelege amwiiddani eenyu, mwawiirelege dhapama, ni obolihihua muhujejihedhaga waakela yego. Mweera ndo, yothuviwa yeenyu enaakale yijinji. Vano, munaakale aana a Mudhuludhulu. Vowi Oliye di apama ni alene ehinamatulama ni agongomwa.
³⁶ Kalani athagaraga woona Babiinyu Oli athagaraga.

Omuthonga Mwaddamani (Mt 7.1-6)

³⁷ "Muhuthonge, kamudha muthongiwa. Muukone, kamudha mukoniwa. Mulevelelege wi mudhe muleveleliwe. ³⁸ Mvahege, munodha mvaahiwe mpimo wapama, woopinyedha, woosukuseleya, wootekuma. Moowomeliwa murima muneere ovahiba, vowi ni mpimo oyene munaapiminyuna akwiinyu, munodha mpimiwena."

³⁹ Vano Oliye ahiwelelagu, owoga vevo vaaligi muthithi mwa musibe, wiira: "Dhili dhoofwaneelela wi muliba ohoona amusogolele muliba ohoona mukwaaye? Kinamorele mmuliddini abilene? ⁴⁰ Namasuza kanamukwaranya namasuuziha aaye, mbwenye ateene alene enavirihamo masuuziho, enokala woona anamasuuziha eewa.

⁴¹ "Ononiwe ekata mwiintoni mwa ddibili, wula ohusugwaga emiri eli mwiintoni mwaawo mwaha wa ddi? ⁴² Onanda addi omwiirela ddibili: 'Ddibilaaga, mahi givenyihemo ekata eli mwiintonomo,' ohoonaga emiri eli mwiintoni mwaawo? Namaleketha, vowambeela ovenyihemo ekata eli

mwiintoni mwaawo, vano oneerege woona pama wi ovenyihemo ekata eli mwiintoni mwa ddibilo.”

Muthank ni Dhoovaha Dhiwa

(Mt 7.15-20)

⁴³ “Kuliwo muthank wapama onavaha dhoovaha dhabure, naari muthank wabure onavaha dhoovaha dhapama. ⁴⁴ Muthank oli watee onononeya ni dhoovaha dhiwa. Mwaha wi kinahapiwege makaaju mmingani, naari kadhinahapiwege manga mmurothoni. ⁴⁵ Muthu apama onokumiha dhapama dhoologolela dha mmurimani mwaaye, teto muthu abure onokumiha dhabure dhoologolela dha mmurimani mwaaye. Mwaha wi mulomo onowoga dhidhaalile mmurimani.

Owarala ni Oolodhowa

(Mt 7.24-29)

⁴⁶ “Mwaha wa ddi munagithaniny ‘aNabwiya’ wula muhiiragana dhi-nowaaddelimini? ⁴⁷ Olene onadha wa miyo, eewa madhu aaga, avirihagamo, gineere wuwoonihani onaliganiyen. ⁴⁸ Onaligana ni mulobwana mmohi amagaga nyuba yaaye, ahitiba muliddidha vakothokwani oddihihia osiddela. Vano, mwihinje wahidhaala, mahinje ale yahitekumela ode, yahifwanya nyuba kayathikeyile. Mwaha wi nyubaya yahimageya pama. ⁴⁹ Vano, ole oneewa madhu aaga ahavirihagamo, onaligana woona mulobwana amagile nyuba yaaye ahisiddelile, kaatibele mooddihihia. Vano, mahinje edhaaga, yahitekumela nyuba ele mowaaguva yahitongwa. Ob-wanyuwavo yateene.”

7

Oyilihiwa wa Mwiimeleli a Musogoleli Anyakoddo Zana

(Mt 8.5-13)

¹ Yesu agamalile owoga madhu mateene ale wa nlogo, ahivolowaga oKa-faranawu. ² Mwemule mwahikala musogoleli mmohi a anyakoddo zana a aRoma ahikalana mwiimeleli amudhiveliiye vajinji. Mwiimeleli ole oobulela vajinji ahalile vang'ono wi akwe. ³ Musogoleli ole ageewile dhawogowiwa dha Yesu, ahaaruma apogo amohiwa aZhudewu wa Oliye yamulobe wi adhe, amuyilihe mwiimeleli aaye. ⁴ Egafiyile wa Yesu, yahimulobaga ni ntidi, yiiraga: “Muthu ole dofwaneelela wi mmwiirele dhedhi, ⁵ mwaha wowi onodhivelawa ni nlogo neehu, ohufiyedha onimagela nyuba ya malobel.” ⁶ Yesu ahidhowa ni aliwa. Aaddamelaga vang'ono ofiya vade, musogoleli ole ahaaruma akwaaye wi yeere: “Nabwiyan, kamukukumuwe, kagifwaneelele wi nvolowe mba mwaaga. ⁷ Mwahaya buyeene, gihadhelimi menka goonile yowi naari kagifwaneelele wi giwoge ni nyo. Mbwenye muwoge ndhu nimohive baahi, mwiimeleli aaga onoyila. ⁸ Mwaha wowi ni miyeene ginlothongiwa, teto gihikkanna anyakoddo ginaathongimi. Geera: ‘We, kadhowa,’ oliye onodhowa; wa mmohiwa, ‘We, kadha,’ onodha. Geera mwiimeleli aaga: ‘We, kasasanya ela,’ onosasanya.”

⁹ Yesu ageewile madhu ale, ahitkinaga, orugunuwa wawang'anu ale yamuharaga, wiira: “Ginowuwaaddelani naari muEzarayeli kagifwanyilemo nroromelo nulubale nothabwa woona ndda.” ¹⁰ Vano, aliba orumiwa ewelelaga vade, yamfwanyilege mwiimeleli agayilile.

Yesu Onomvenyiha Mwaana a Maamukwele

¹¹ Vovira mudhidhi vang'ono, Yesu ahidhowaga oluwani neeriwa Nayimi, vamohi ni anamasuuza aaye ni athu ajinjeene. ¹² Aaddamelaga ofiya

vamulago vanluwa vevale,* ahigumanaga ni athu yathukulege muruthu edhowaga omasiye. Aaligi mwaana mmohive a maamukwele. Athu ajinjeene a muluwani mule yaaligi ni maamukwele ole.¹³ Nabwiya agamoonile ahimweddiwelaga thagaraga, wiira: "Kawuundde."

¹⁴ Agafiyile vakukuuve ahikahinyaga ntete ale yathukulege wiimela. Yesu wiira: "Muzombwe, miyo ginothonga, kavanya!"¹⁵ Mwanookwa ahivenyaga, okaraati, wambeela owoga. Vano Yesu omuwelihedha wa ammaaye.

¹⁶ Athu ateene yowoovaga. Yoomutamalaga Mulugu, yiiraga: "Namavuhulela mulubale ohooneya vaari va hiyo, Mulugu oheeddela nlogo naaye wi akamihedhe."¹⁷ Muselu ola, wawoga dha Oliye, wahivuwa oZhudeya ni mirudda dhatedhene dhowaaddamela.

*Zhuwawu Namabathiza Onaaruma Anamasuuza wa Yesu
(Mt 11.1-19)*

¹⁸ Anamasuuza a Zhuwawu yahidhowaga omwaaddela dhego dhated-hene dhende. Zhuwawu ahawiithanaga abiili mwa aliwa,¹⁹ waaruma wa Nabwiya wi yamukohe: "Akala dinyeene eeriwa onodha, naari nimujeji-hege mmohiwa?"

²⁰ Anamasuuza ale egafiyile vaaligi Yesu, yahiiraga: "Zhuwawu Namabathiza ohuniruma wi nuukoheni: 'Akala dinyeene eeriwa onodha naari nimujeji-hege mmohiwa?'"²¹ Mudhidhi olene, Yesu ahayiloha athu ajinji dhiredda, dhabure dhimohi dhaakathamiha, ni okumiha mineba dhabure, ni wawooniha aliba ohoona ajinji.²² Oliye ahawaakulaga: "Dhowani, mwamwaaddele Zhuwawu nde dhoniliinyu ni dhiwiliinyu: aliba ohoona enowoona, aliba otopinya enoweedda, aliba maredda enoweeliiwa, aliba ohiwa enowiwa, anokwa enovenyihiwa, ni oorabula enolaleyeliwa musel wapama.²³ Oreelihiwa duleene ohunookuwa mwaha wa Miyo."

²⁴ Egavenyilevo anamarumiwa a Zhuwawu, Yesu ahambeelaga owoga ni athu mwaha wa Zhuwawu, eeraga: "Mwadhowile mwiiddedereni woona ddi? Bango yothikeya ni pevo?²⁵ Ki-to mwagele woona ddi? Muthu oowara guwo dhofeewa? Ale enawara dhapama enakala mburo dhood-diddilela, enakala mmanyubani o omwene.²⁶ Ki-to mwagele woona ddi? Namavuhulela? Eee, Miyo Ginowuwaaddela wi oliye onomukwaranya namavuhulela.²⁷ Ola di oyene onawogiwa mmalebani:

"Ginowurumihedha vasogolo vameentoni
vaawo murumiwi aaga,
oyene onasasanyedhe dila vasogolo vaawo.†"

²⁸ Miyo Ginowuwaaddelani mwa oobaliwa ni mwihiyana, kaavo oomuk-waranya Zhuwawu, mbwenye mung'ono mu omweneni wa Mulugu, oyo dili omukwaranya oliye."

²⁹ (Vano athu ohiyana-hiyana ateene, ofiyedha anamakoha-musoko, yeewile madhu a Yesu, bayeene yaakwanihile odidela ebaribari ya Mulugu, vowi yahirumeedha obathiziwa ni Zhuwawu.³⁰ Mbwenye maFarizi ni anamatapulela a malamulo kayaakwanihile efunelo ya Mulugu, vowi aliwa kayarumeedhile obathiziwa ni Zhuwawu.)

* ^{7:12} Wale-wale maluwa majinji yowabeliwa cinga nyuba dhatedhene dhakala muwari mwa cinga, yathawihia koddo dhodheela dhilabo dhimohi. † ^{7:27} Mal 3.1

³¹ Yesu ahiwogaga, eeraga: “Ginaaliganuhe ni aani mulogo wa mudhidhi ola. Ki enafwanafwana ni aani? ³² Enafwanafwana ni ahima ekeratile vamusika, nikuru nimohi yaakuwelaga ni amohiwa, yiiraga:

“ ‘Hiyo nuhuwoobelani nvilovilo,
kamwiinile,
nihiiба jibo yathagaraga,
nyo kamunddile.’

³³ Zhuwawu Namabathiza ohudha, ahijaga mukaathe, ahing'waga vinyu, nyo muni: ‘Ohukanna muneba wabure.’ ³⁴ Ohudha Mwaana a Muthu ajaga, ang'waga, nyo muni: ‘Ole muliba nrima, namang'wa vinyu, akwaaye ba anamakoha-musoko ni anamathega’! ³⁵ Mbwenye ale enarumedha ononelamo wa Mulugu, enowooniha wi dila yaaye si yebaribari.”

Mwihiyana Oothega Onoththikittela Makura Manyalo a Yesu.

³⁶ Yesu ahiwobiwa ni mFarisi mmohi wi aje vade vaaye. Agavolowile mba mwa mFarizi, Yesu ahikaratigi vamajelo. ³⁷ Moone, muluwani mule, mwahikalaga mwihiyana mmohi aali oothega. Ageewile dhowi Yesu on-aja mba mwa mFarizi, ahidhaagana garafwa napama mwaaligi makura oonukwela a mutheengo mulubale. ³⁸ Ahiimelaga odduli wa Yesu waad-damela omanyalonai aaye, anddaga, onyethihaga ni mitor manyalo a Yesu ohuhuraga ni nthithi naaye, ombezhari manyalo aaye, amukuthulelaga makura oonukwela.

³⁹ Vano mFarizi ole amuwobile Yesu agoonile nde, ahambeelaga wu-ubuwela mmurimani mwaaye: “Ola ahaakale namavuhulela, eere onona wi omukahinyile baani, mwihiyana ola dowi havi: vowi ‘namathega.’”

⁴⁰ Yesu ahiwogaga ni mFarizi, wiira: “Simawu, Gihikanna madhu wi guwaaddele.”

Oliye ahiiraga: “Namasuuziha, wogani.”

⁴¹ Yesu ahiiraga: “Yahikalawo athu abiili yaifiyaarile korowa wa nاماifiyaariha. Mmohi afiyaarile korowa dhowaakwana mazana matanu, mmohiya makumi matanu. ⁴² Vowi kayaakwaniha oweliha, mwinya ahaalevelela aabileene. Ki wevo mwa abiili ala onamutteteelese muliba ofiyaariha duuvi?”

⁴³ Simawu ahimwaakulaga: “Ginoonelamo aleveleliwe dhijinji.”

Yesu ahimuwegagana, wiira: “Ohaakula pama.”

⁴⁴ Aageere ndo, Yesu ahimurugunuwelaga mwihiyana ole, omwiirela Simawu: “Onomoona mwihiyana ola? Miyo gihivolowa mba mwaawo, kugivahile mahinje oohuwana manyalo, mbwenye ola ohugikuthulela mitor manyalo aaga. ⁴⁵ Ohuhuraga ni mathithi aaye. We kugibezhari, mbwenye ola, givolowileve, kamaalile ogibezhari manyalo aaga. ⁴⁶ Kugikuthulele makura mmuruni mwaaga, mbwenye ola ohugikuthulela manyalo aaga ni makura oonukwela. ⁴⁷ Mwa ela ginowuwaadelani wi dhoothega dhaaye dhijinji dhihileveleliwa; vowi ohooneyiha odhivela wujinji. Mbwenye ole aleveleliwe dhooyeva, onadhivela vang'ono.”

⁴⁸ Nuwindo, ahiwogaga ni mwihiyana ole, wiira: “Dhoothega dhaawo dhihileveleliwa.”

⁴⁹ Ale yaaligi ni Yesu vamajelo; yahambeelaga owogaga wekiwa, yiiraga: “Ki olaya baani onafiyedha alevelela dhoothega?”

⁵⁰ Mbwenye Yesu ahimwaadelaga mwihiyana ole, wiira: “Nuuvulu-musile thi nroromelo naawo; dhowa ni murenddele.”

8

*Musibe wa Namadhala
(Mt 13.1-23; Mr 4.1-20)*

¹ Nuwindo Yesu ahivenya, odhowa weddeedda nluwa ni nluwa, murudda ni murudda, alaleyaga, awaaddelihaga athu Muselu Wapama wa Omwene wa Mulugu. Anamasuuza kumi ni abili yaaligi vamohi ni Oliye, ² teto ni ahiyana amohi ale yaayilihiye mwa mineba dhabure, ni dhiredda dhi-mohi, ahiyanaya baala: Mariya eeriwa Madalina, oyene akumihiiwe mineba dhootakala mitanu namiinddi; ³ ni Zhuwana, mwilihiyanaye Kuza musadoro a nyuba ya Heroddi; Suzana ni ahiyana amohiya ajinjeene. Yamukami-hedha Yesu ni dhookalana dheewa.

⁴ Athu ajinjeene yoothamagelaga wa Yesu, edheelaga mudhi dhoziyana-hiyana. Oliye ahiwogaga musibe ola, wiira: ⁵ "Namadhala ahidhowa odhala. Adhalaga bewu, dhimohi dhamorelege moogomela dila, onyingaleliwa, balame dhahidhaga oddoddavo oja. ⁶ Bewu dhimohi dhamorelege vanibweni, omela dhuunuwaga wuuma, vowi kavaali munyetho. ⁷ Bewu dhimohi dhamorele vamwingani, dhigamelile dhahuunuwa vamohi ni mwingadha, dhahihogeya. ⁸ Vano bewu dhimohi dhamorela theya yapama. Omela wuunuwa ofiyedha ovaha mazana ni mazana, okwaranya bewu dhadhalivege."

Awogagave nda, ahikuwaga, wiira: "Ole winna mabaru owiiwa, eewe!"

⁹ Anamasuuza a Yesu yahimukohaga, wiira: "Musibe ola onatapulela ddi?" ¹⁰ Oliye ahawaakulaga, wiira: "Nyo muhuvahiwa ononelamo dha wiipini dha Omwene wa Mulugu, mbwenye amohiya Ginaawogana mwa misibe, vowi,

"‘yoonaga echoonege;
yiwaga mbwenye ehiwelelegemo.*"

¹¹ "Musibe ola onatapulela ndha. Bewu bi madhu a Mulugu. ¹² Bewu dhamorele moogomela dila, bi ale eneewa madhu a Mulugu, mbwenye adha Sathana aavenyihamo mmirimani mweewa, wi enadhe eroromele, evulumusiwe. ¹³ Bewu dhamorele vanibweni, bi ale eneewa madhu yawaakela ni ohagalala, mbwenye kinakkana misisi. Enaroromele mudhidhi vang'ono, vofiya dhoweeha, enoweleta mundduli. ¹⁴ Bewu dhamorele vamwingani, bi ale eneewa madhu a Mulugu, yawaakela vovira malabo vang'ono, enohogeya ni osanyeyela, dhoreela, ni dhimohi dhoofuna egumi, kinafiyedha ovaha. ¹⁵ Bewu dhamorele theya yapama baale eneewa muupamani ni murima wowogoowa yalogolela madhuya, ofiyedha ovaha furuta ni ovilela.

*Musibe wa Panti
(Mr 4.21-25)*

¹⁶ "Kalivo muthu onahiddiha panti, akuneela ni ebale naari ahela vati vakama. Onahida vovooneyela, wi ateene enavolowegemo yoonege waara. ¹⁷ Vowi kilivo yoowipiteya ehinadha yooneya, naari yoologoheya ehinadha enoniwa ni ovuhuleya. ¹⁸ Pole-pole. Mwiwiwe pama! Ole winna, onoweenjedhedhiwa; ole ohinna, elene enoobuweleliiye wi ohukanna onowaakiwa."

*Amaaye ni Addibilaye a Yesu
(Mt 12.46-50; Mr 3.31-35)*

* **8:10** Es 6.9

19 Amaaye ni addibilaye a Yesu yahidhaaga wi yoonane, ni mwaha wa anamwinji, kiyaakwanihilege ofiya vaaligi Yesu. **20** Vano muthu mmohi ahidhwaga, omwaaddela, wiira: “Mmeenyu ni addibilinyu eli ode wu, enafuna moonane.”

21 Yesu ahawaakulaga: “Amma ni addibilaga bi ale eneewa madhu a Mulugu ni wiirana dhinawoga madhuya.”

Yesu Onomaaliha Nipevo Nulubale (Mt 8.23-27; Mr 4.35-41)

22 Nlabo nimohi, Yesu ahivolowaga mmwanddeyani vamohi ni anamasuuza aaye, ahawiirelaga: “Nilabuwele kobela ya nyaza.” Omaruwa.

23 Yabuwaga, Yesu ahidhaleliwaga kove, ogonaga. Vano, wahidhaaga nipevo nulubale munyaza, mmwanddeyani mwahambeelaga odhaala mahinje, okala yego yowoopiha wa aliwa ohala nena ni obwina.

24 Yahimususedhaga, omvenyiha ekuwaga, yiiraga: “Namasuuziha, Namaskuuziha, ninokwa hiyo!” Yesu ahivenyaga, ohiiha nipevo ni owali wa mahinje; dhatedhene dhahimaalaga, okala murenddtele. **25** Nuwindo, ahakohaga: “Ororomela weenyu oli wuuvi?”

Aliwa owoveene, yootikinaga, ekohanaga vakaleligiis, yiiraga: “Ki olaya baani? Onafiyedha othonga nipevo ni kuluzi, dhimwiwiwelelaga.”

Oyilihiwa wa Mulobwana Mmohi Ahiddiwe ni Muneba Wootakala

26 Yahaabuwelaga elabo yo Zherasa, eli epaddi emohiya ya nyaza yo oGalileya. **27** Yesu akitagawene, ahithamageliwaga ni mulobwana amuluwani mwemule. Oyene ahiddiwe ni muneba wootakala. Mudhidhi mu-

jijenee kaawara, kaakala vade, akalesa mmasiyeni.[†] **28** Vano agamoonile Yesu, ahikokoraga vameentoni vaaye, ahikuwaga, ni ndhu notaama, wiira: “Yesu, Mwaana a Mulugu a Mudhulu-dhulu, miyo ginna ddi ni nyo? Gienowulobani, kamugirabulihe!” **29** Mwaha wi Yesu ahithongaga wi muneba wabure ovenyemo mwa ole. Womwihidda winddi-winddi. Athu yommaga ni fingwi madada ni meddo wi ang'aneliwege, oorunddumula dhatedhene, woomuthamagihedha muneba wabure mukokolani.

30 Yesu ahimukohaga, wiira: “Ndina naawo oli aani?”

Ahimwaakulaga, wiira: “Nili anamwinji.[‡]”

Vowi mineba dhootakala dhijinjihene dhahivolowa mwa oliye.

31 Mineba dhootakala dhahimulobaga Yesu wi ahiigarele omuliddini wooddiha.

32 Vevale voojihiwa nikwedda nulubale na kumba omwangoni. Mineba dhootakala dhahimulobaga wi arumeedhihe dhivolowe mukumbani. Yesu ahirumeedhihaga. **33** Mineba dhootakala dhigakumilemo mwa mulobwana ole, dhahivolowaga mukumbani, kumbadha dhahikitaga dhithamagelaga musiddo, omorela munyaza, okwa.

34 Anamajija kumba egoonile nde dhabadduwilege, yahitthawaga, odhowa olaleyaga muluwani ni mmavade. **35** Athu yahikumaga, odhowa wi yoone dhende dheereyile. Egafiyile vakukuuve vaaligi Yesu, yahimfwanya mulobwana ole akumihiwemo mineba dhabure agakaratilie omayalon a Yesu agawarile, aganna zelu dhobaliwana. Yahikalagana woova.

36 Ale yoonilege nde dhiireyaga yahawaadelihamo teto mwemule mwamuyiliheliye muliba minebaya. **37** Nuwindo, athu ateene yaapelele Zherasa yahimulobaga Yesu wi avenyewo, vowi yahikalagana woova wulubalewene.

[†] **8:27** Masiye a mudhidhi olene yakala woona nikungu. [‡] **8:30** Naari Lezhiyawu.

Vano Yesu ahigwelaga mmwanddeyani dila biili wi adhowege. ³⁸ Mulobwana ole akumihewe mineba dhootakala ahimulobaga wi amuharege. Yesu ahimpaganyaga, omwiirela: ³⁹ “Owelele vade vaawo, wawoge dhatedhene nde dhuwiirele Mulugu.” Nuwindo mulobwana ole ahidhowaga olaleyaga muluwani mwatemwene dhego nde dhatedhene dhamwiirele Yesu.

*Owodha wa Yesu mwa Oredda ni Okwa
(Mt 9.18-26; Mr 5.21-43)*

⁴⁰ Yesu awelagawo, anamwinji yahimwaakelelaga ni ohagalala, mwaha wi ateene yoomujejhaga. ⁴¹ Vevale mulobwana mmohi aali mpogo a nyuba ya malobelero eeriwa, Zhayiro. Ahidhaaga okokora omalyaloni a Yesu, omuloba wi afiye vade vaaye. ⁴² Anna mwaanaye mmohive, mwana-mwihiyana anna yaaka kumi na biili, ahalilege nena ni okwa. Yesu ad-howaga, anamwinji yoompinyaminyaga. ⁴³ Vahikalaga mwihiyana mmohi arabulile yaaka kumi na biili ni oredda wothathila mwazi [ahinoonga dhookalana dhaaye dhatedhene ni anamugu];[§] kaalivo muthu aakwanihile omuyiliha. ⁴⁴ Ahidhaaga odduli wa Yesu, okahinya nipiyo na yoowara yaaye, mowaaguva oredda woothathila mwazi ole wahimalaga.

⁴⁵ Mbwenye Yesu ahiiraga: “Ogikahinyile baani?” Ateene egarunile. Peduru ahiiraga: “Namasuuza, anamwinji ehuaapelelani ni wupinyaminyani vano muni: [‘Ogikahinyile baani?’]*”

⁴⁶ Mwa dhatedhene Yesu ahikalelaga ntidi, eeraga: “Ohukalavo ogikahinyile; mwahaya gihoona wi mwa Miyo owodha ohukumamo.”

⁴⁷ Mwihiyana ole, agoonile wi kadhaandeya wiilogoha, ahaaddamelaga osogolo wa Yesu ni ogurumela. Omwaaddelihamo vameentoni va athu ateene, mwahaya wamukanyiheligiye mowaaguva ayila. ⁴⁸ Nuwindo, Yesu omwiirela: “Mwaanaga, nroromelo naawo nihuyiliha!† Dhowa ni murend-dele.”

⁴⁹ Yesu awogagave, ahifiyaga muthu a vade va Zhayiro, mpogo a nyuba ya malobelero. Omwaaddela, wiira: “Iii, Muhumukukumule Namasuuza, mwaaninyuya ohukwa.”

⁵⁰ Mbwenye Yesu, ageewile nda, ahiiraga: “Kawoove; ororomele baahi, mwaanaawo onovulumuwa.”

⁵¹ Vafiyiligiye vade va Zhayiro, kaamwihiyilege muthu bure ovolowa mba vamohi ni Oliye, mbwenye Peduru, Zhuwawu ni Tiyago, babaye ni amaaye a mwaana ole. ⁵² Athu ateene yowunddaga ekuwaga. Vano, Yesu ahawiirelaga: “Kamundde! Ola kakwile mbwenye onoogona.”

⁵³ Ateene yegi omuteya, vowi yahinonaga pamadhene wi mwaanaya ohukwa. ⁵⁴ Vano, Yesu ahimwihiddelelaga ndada, owoga ni ndhu notaama, wiira: “Mwaana mwihiyana, kavenya!” ⁵⁵ Egumi yahiwelelagamo, ovenya mowaaguva. Yesu ahawiirelaga wi mvaheni yooja. ⁵⁶ Ababiinya yahitikini-heyaga, mbwenye Yesu hasinjeedhaga wi enadha emwaaddele muthu, nde dhapadduwege va.

9

*Yesu Onowaaruma Anamasuuza Kumi ni Abiili
(Mt 10.5-14; Mr 5.7-13)*

§ 8:43 Dhoolebiwa ni madada dhimohi kadhinadhana epaddi ela yowi; “ahinoonga dhaaye dhatedhene ni anamugu.” * **8:45** Dhoolebiwa ni madada dhimohi kadhinadhana epaddi ela yowi: “Ogikahinyile baani?” † **8:48** Naari nihuvulumusa

¹ Nuwindo, Yesu ahawithanelaga vameentoni vaaye anamasuuza kumi ni abiili, ahaavaha owodhia ni othongi wowiigara mineba dhabure dhatedhene ni oyiliha dhiredda. ² Yesu ahaaruma olaleya Omwene wa Mulugu ni oyiliha dhiredda. ³ Ahawiirelaga Kumi ni Abiili: “Kamuthukule yego ya voolendon; naari mukogodho, naari nthumba na voolendon; naari mukaathe, naari korowa, naari kamuthukule malaya meenddi. ⁴ Vade vinafiyedhinyu, mukalege vevo ofiyedha nlabo novenyavo. ⁵ Yahuwaakelani, tatani nthubi na manyalo eenuy mwakumaga muluwani mweewa. Okale onamoona wokoodda weewa.” ⁶ Vano, yahimaruwaga, odhowa mudhi ni mudhi, elaleyaga Muselu Wapama, yaayilihaga athu dhipaddi dhatedhene.

⁷ Kuminadori Heroddi ahiwa dhatedhene dheearya mwiilaboni mwaaye oGalileya, ahisimwela, vowi athu amohi yeera Zhuwawu divenyile muukwani; ⁸ amohi yeera Eliyazi dikumelele; amohi yeera; namavuhulela mmohi awale dhavenyile muukwani. ⁹ Mbwenye Heroddi ahiira: “Zhuwawu dulene miyo gimpadhihilimi nikohi. Ki muthu ola gineewimi dhego nda baani?” Oosayela omoona Yesu.

Wiinjivihiwa Wowambeela wa Mikaathe

(Mt 14.13-21; Mr 6.30-44; Zhu 6.1-15)

¹⁰ Egawelilewo arumiwi ale yahimwaaddelagamo Yesu dhatedhene dhende dheeriliwa. Nuwindo, Yesu ahathukulaga arumiwi, odhowa nlawa nimohi, neeriwa Betisayida; ¹¹ mbwenye anamwinji eganonile, yahimuharaga. Oliye ahawaakelelaga, waawogagana anamwinji dha Omwene wa Mulugu, ni wayiliha alene yafunaga oyilihiwa.

¹² Nduwa nigahalile vang'ono okodhowa, anamasuuza Kumi ni Abiili ale yahimwaaddamelaga Yesu, wiira: “Mwaarumihe anamwinji edhewe mmavade wi yesayebole yooja ni vogona, vowi oliihu wuno bu mburo wa mwiddedereni.”

¹³ Yesu ahawaakulaga: “Mwaavahe nyene yego wi eje.” Aliwa yahiiraga: “Ninna mikaathe mitanu ni somba biili, baahi. Kaahi nidhowe nagule yooja ya anamwinji ateene alena.” ¹⁴ (Vaaligi alobwana owaakwana vakukuuve macikwi matanu.)

Mbwenye Yesu ahawiirelaga anamasuuza aaye: “Waakaratheni anamwinji mmakuruni a makumi matanu.” ¹⁵ Anamasuuza yahiiragana ndo, ateene yahikaratigi. ¹⁶ Yesu ahithukulaga mikaathe mitanu ni somba biili, osugwa odhulu otamala, opadhula moharela, ahawinkaga anamasuuza wi yaagawele athu. ¹⁷ Yahijaga ateene orubala. Anamasuuza yahiddoddelaga dhonyenyeya dhahalilege odhaaliha mittanga kumi na miinddi.

Wisoriha wa Peduru

(Mt 16.13-20; Mr 8.27-30)

¹⁸ Dhahipadduwa ayi, Yesu ahipothowaga odhowa vowi ivale, egi olobela ni anamasuuza aaye egali vakuukuvi. Oliye waakohaga, eeraga: “Athu eni Miyo Gili aani?”

¹⁹ Aliwa omwaakula, wiira: “Amohi eni Muli Zhuwawu Namabathiza, amohi Eliyazi, amohiwa namavuhulela awale ovenyile.” ²⁰ Oliye owelela waakoha:

“Ki nyo, muni Gili aani?”

Peduru ahimwaakulaga, eeraga: “Nyo Muli Kirixtu a Mulugu.” ²¹ Yesu ahakooddihaga vanjinjivene wi enadha emwaaddele muthu. ²² Vano ahenejhaga, wiira: “Enofuneywa wi Mwaana a Muthu arabule vajinji, akooddidiwe mmadadani mwa anamasogolela a azhudewu, ni apogo a anamakutha, ni

ale anamasuuziha a malamulo; ofiyedha opiwa, ni ovenyihwi na nlabo na nethaaru.”

²³ Ahawaaddelaga ateene: “Onafuna odha wa Miyo, ekoodde yeeka, nlabo ni nlabo athukule muraddi waaye, agiharege. ²⁴ Mbwenye ole onafuna ovulumusa egumi yaaye,* oneere oyelela. Ole onayelela egumi mwaha wa miyo, onowivulumusa. ²⁵ Muthu eyugelela dha elabo yateeene voodha erimeeliha ni wiitolosa yeeka aaye, onapura ddi? ²⁶ Vowi muthu onagikalela manyazo Miyo ni madhu aaga, Mwaana a Muthu onodha amukalele manyazo nlabo nnadhiye munthithimihoni naaye na Ababe ni na angero oweela. ²⁷ Ebaribareene Ginowuwaaddelani wi nyeene muli veva kamunafiyedhe okwa muhoonile Omwene wa Mulugu.”

Ohiyaniheya wa Kove ya Yesu (Mt 17.1-13; Mr 9.2-13)

²⁸ Vigavirile malabo matanu na maraaru agawogile madhu ala, Yesu ahimuthukula Peduru, Zhuwawu, ni Tiyago, odhowa omwangoni wi alo-bele. ²⁹ Alobelagave, mooneyelo a kove yaaye yahisadduwaga. Dhoowara dhaaye dhaaligi dheweela mbuu, dhegi ozherimela. ³⁰ Mowaaguva egi owoga ni alobwana abiili. Aaligi Mozezi, ni Eliyazi. ³¹ Alobwana ala mooneyelo eewa yaaligi a nthithimihi. Yawogaga dha okwa waaye weeriye aakwanelihe oZheruzalemi.

³² Peduru ni amohiwa yannigiyena, yahinyemeliwaga ni kove dhulubale. Vano egarurumuwe, yahoonaaga nthithimihi naaye ni alobwana abiili ale.

³³ Evenyagavo vale vaaligiisu ni Yesu, Peduru ahiwogaga: “Namasuuziha, eli yapama wi nikale wewuno. Nimage misasa miraaru; mmohi weenyu, mmohi wa Mozezi, mmohiwa wa Eliyazi.” (Oliye kaanonaga dhawogigiy.)

³⁴ Awogagave, wahidhaaga murabo waakunela, egali mmuraboni mwemule. Anamasuuza yegi woova. ³⁵ Mmuraboni mule mwahikuma ndhu, neeraga: “Ola di Mwaanaga, Gimusakulimi.† Mmwiiwelelege Oliye!”

³⁶ Ndhu nigeeweyile, anamasuuza a Yesu yahimoonaga wi Olivo yeeka. Vano aliwa yahimaalaga okuma malabo alene, kayamwaaddelile muthu dhatedhene dhooniligiwa.

Oyilihiwa wa Mwaana Ahiddiwe ni Muneba Wabure (Mt 17.14-23; Mr 9.14-32)

³⁷ Ode ogasile, yahidhawaga omwangoni, yahidhawaga anamwinji wi yamugumanen Yesu. ³⁸ Mulobwana mmohi vari va anamwinji ahikuwaga ni ndhu notaama, eeraga: “Namasuuziha, ginowulobani wi mugoonele mwaanaga, vowi ginna mmohive. ³⁹ Mowaguva muneba mmohi wamwihidda; muzombwe onokuwa morurumuwa, muneba omuddanddamuwi-haga akumaga nipweru muwano. Kunaaguva omwihiya, onofiyedha omvoreya. ⁴⁰ Gahaloba anamasuuza eenyu wi yigaremo muneba ole, mbwenye kiyaakwanihile.”

⁴¹ Yesu ahaakulaga: “Mulogo wohukanna nroromelo, oovirigana moobuwelelo, ofiyedha alini Gineerimi Givilele ni ny? Mudhena wuno mwanawo.” ⁴² Muzombwe ole amwaaddamelaga Yesu, muneba wootakala wahidhaaga, omvokedha vati oddanddamuwaga. Mbwenye Yesu ahinyanyuwelaga muneba wabure, omuyiliha muzombwe ole, omwinka babaye. ⁴³ Ateene yaaligi otikiniheya ni kopolo dhulubale dha Mulugu.

* ^{9:24} Naari muneba † ^{9:35} Dhoolebiwa ni madada dhijinji dhineera: Oodhivelia.

Mwadhatiedhene nde Yesu dheeriliyena, Oliye ahawiireлага anamasuza aaye: ⁴⁴ “Muvuruwanesese pama dhendo Ginafunimi Guwaaddeleni: Mwaana a Muthu, oneere ogulihwa aveleeliwe mmadani mwa athu.” ⁴⁵ Mbwenye aliwa kayeeewelegamo madhu ale yatapuleligiwa; yaaligi owipiteya wi enadhe yiwelelemo. Yowoovaga omukoha yotapulela ya madhu ale.

Onakale Mpogo Baani?
(Mt 18.1-5; Mr 9.33-41)

⁴⁶ Dhahipadduwa mudhidhi mmohi anamasuza yegi ovaanyihana wi aakale ofuneya mwa aliwa baani. ⁴⁷ Yesu, voonona moobuwelelo eewa, ahimuthukulaga mwaana omwiimeliha vaaligiye. ⁴⁸ Wawiirela: “Olene onamwaakela mwaana ola mu ndina naaga, onagaakela Miyeene. Vano, ole onagaakela, onamwaakela olene ogirumile. Oli mwa ny oneyevihe, oyene dinakale pogo.”

⁴⁹ Zhuwawu ahiiraga: “Namasuuziha, nihimoona muthu mmohi akumiha mineba dhabure ni ndina neenyu, hiyo nihimwihiha, mwaha wi kanili vamohi.” ⁵⁰ Mbwenye, Yesu ahimwiireлага: “Kammwihihe ole, ohunavanyihana ni ny, ola deenyu.”

Yesu Onookooldiwa ni Athu a oSamariya

⁵¹ Nuwindo dhahipadduwa, waaddamelaga mudhidhi wowi Yesu athukuleliwe odhulu, ahilibihedha odhowa oZheruzalemi. ⁵² Oliye ahaaruma aliba muselu vasogolo. Edhowaga aliwa, yahivolowaga murudda wo oSamariya wi emusasanyedhele mburo; ⁵³ mbwenye athu a murudda ole kayamwaakelile Yesu, vowi yahinona wi onadhowa oZheruzalemi. ⁵⁴ Anamasuza Tiyago ni Zhuwawu vovoona nda, yahimukohaga: “Nabwiya, munofuna niithane munddo woodhulu waapahe?” ⁵⁵ Mbwenye Yesu aharugunuwelaga, wasumulula.[‡] ⁵⁶ Vano, yahidhowaga murudda mmohiwa.

Eli Yoorusa Omuhara Yesu!
(Mt 8.19-22)

⁵⁷ Yesu adhowaga mundila ni anamasuza aaye, mulobwana mmohi ahiiraga: “Gineerege wuharani oli watewene onadhowinyu.”

⁵⁸ Yesu ahimwaakulaga: “Akwaddwe ehikanna makungu eewa, balame dho odhulu dhhikanna dhitunji, mbwenye Miyo, Mwaana a Muthu kaginna vosameliha muru.”

⁵⁹ Ahiira wa mulobwana mmohiya: “Giharege.” Mbwenye mulobwana ole ahimwaakulaga: “Nabwiya, gihiyeni vowambeela gamutibele Ababaaga.”

⁶⁰ Yesu ahimwaakulaga, wiira: “Waahiye anookwa etibelanege anookwave. We odhowe walaleyeye Omwene wa Mulugu.”

⁶¹ Muthu mmohiya ahiiraga: “Gineere wuharani, Nabwiyan mbwenye vowambeela mugihiiye gaapaganye anaamudhi.”

⁶² Yesu ahimwaakulaga: “Kalivo muthu oni agahiddelile iba, alimaga aang'anaga mundduli, afwanelela Omwene wa Mulugu.”

10

Yesu Onowaaruma Anamasuza Makumi Matanu Nameenddi ni Abiili

^{‡ 9:55} Dhoolebiwa ni madada dhijinji dhawale dhinowen jedhedha: “Dhiiraga: “Nyo kamunonile musawo wa muneba mwininyuna, vowi Mwaana a Muthu kadhele obwanyula egumi ya athu, mbwenye wi ovulumuse.”

¹ Dhigeereye nde, Nabwiya Yesu ahaasakula anamasuuza amohi, makumi matanu nameenddi ni abiili*, waaruma abiili-abiili, wi esogole edhowe mmaluwani ni mburo mwafuniye odhowa. ² Ahawaaddela, wiira: “Dhohadda dhihinjiva, anamalaba eli vang’ono. Nyo anamasuuza mmulobe Nabwiya mwiinya a dhohadda wi aarume anamalaba omidda waaye. ³ Dhowani dhiinoveva! Miyo Ginowurumi woona mabila vaari va miji ⁴ Muhuthukule thumba na korowa, naari thumba na volenddoni, naari sapatho; muhumuloleje muthu mundila.†

⁵ “Nyuba enavolowinyu, vowambeela muwoge, mwiire: ‘Murenddele okale vade va.’ ⁶ Akalavo muthu a murenddele, murenddele weenu omukitele oliye; ahikalavo, murenddeleya owelele wa nyo. ⁷ Mukalege vade vevo, mujego mung’wege, eyene enovahigisuni, vowi sofuneya namalaba aakele nlivo naaye. Muhenjedhe mookala.

⁸ “Mwafiya valuwani mwaakeliwa pama, mujego eyene enovahigisuni. ⁹ Mwaayilihege aredda enakale muluanimo, mwawaaddelege: ‘Omwene wa Mulugu ohufiya wa nyo.’ ¹⁰ Mbwenye, mwavolowa nluwa nimohiniwa ehuwaakelani, mvenye, mudhowe mmarampani, mweere: ¹¹ ‘Hiyo nihitata nthubi na nluwa neenyu nombuwelihe manyalo eehu wi ekale yoonihedho wa nyo. Mwa nda, munone wi Omwene wa Mulugu ohufiyedhani.’ ¹² Ginowuwaaddelani wi nlabo na muladdu athu oSoddoma enodha evuguleliwe goyi yeewa ohiya athu a nluwa ndde.

¹³ “Ooddilu di we, Korazimi! Ooddilu di we, Betisayida! Vowi matikiniho yiireyle mwa nyo yaheereye oTiru ni oSidoni, athuya mudhidhi olena egatthwaruve mowaaguva, ewaraga masakwi ni wiihela nddora. ¹⁴ Mbwenye mu othongi wa Mulugu onodha avugulele goyi yo oTiru ni Sidoni, ohiyana murudda dha oKorazimi ni Betisayida. ¹⁵ We, Kafaranawu, oneesa oneere ogwelihwa odhowe odhulu? Naari! Onomorihedhiwa mburo wanookwa!”

¹⁶ Yesu ahiwogaga ni anamasuuza aaye makumi matanu nameenddi ni abiili ale, wiira: “Ole onooovuruwanani, onagivuruwana Miyeene; ole onagikoodda Miyo onamukoodda baba aaga Mulugu ogirumile.”

¹⁷ Vano anamasuuza makumi matanu na meenddi ni abiili ale yahiwelaga ni ohagalala wulubale; yiiraga: “Nabwiyan, mwa ndina neenyu mineba dhabure dhihifiyedha oniwelela!”

¹⁸ Mbwenye Oliye ahawiirela: “Miyo Gihimoona Sathana amoraga odhulu woona ozherima. ¹⁹ Onani Miyo guhuvalani owodha woonyingalana nyowa, awalize, ni owodha watewene wa mwiiddani mowindo kilivo enovoreyegeni. ²⁰ Mwa dhatedhene kamuhagalale mwaha wowi mineba dhabure dhinowiwelelani, mbwenye muhagalale vowi mandina eenyu ehilebiwa odhulu.”

²¹ Mudhidhi olene Yesu ahiagalala mwa Muneba Woweela, wiira: “Miyo Ginowutamalani Babani, Nabwiya oodhulu ni elabo ya vati, vowi muhalogohedha dhego nda athu ononelamo ni oosuuza, mwawoonihile ahima. Eee! Babani, wula pufuna weenu.

²² “Dhatedhene Gihivahiwa ni Ababaaga. Kalivo omunonile Mwaana ahili Babe, teto kalivo omunonile Babe ahili Mwaana, ni ayene Enaafuniyena waanoniha.”

* ^{10:1} Dhoolebiwa dhimohidhiwa dhini: 70; teto va verisikulu 17. † ^{10:4} Madhu ala, yatapulela wi ehiseliwe ni dhimohi, ehiyaga dhaarumiwisu.

²³ Vano aharugunuwelaga anamasuuza aaye, wiira: “Oreelihiwa bi meento enoona dhinooninyu. ²⁴ Vowi Miyo Ginowuwaaddelani wi anamavuhulela ajinji ni mamwene yahifunesesa woona dhinooninyu mbwenye kayoonile, wiwa dhinewiinyu mbwenye kayewile.”

Musibe va MuSamariya Apama

²⁵ Nlabo nimohi, namatapulela a malamulo ahivenya wi amweehe Yesu. Omukoha, wiira: “Namasuuziha, wi gikalena egumi yoohimala, gineere ddi?”

²⁶ Yesu ahimwaakulaga, wiira: “Mmalamuloni dhilebiwe avi? Onata-pulela avi?”

²⁷ Oliye ahaakulaga, wiira: “‘Omudhivelege Mulugu aawo ni murima waawo wateeene, ni egumi yaawo yateene, ni kopololo dhaawo dhatedhene, ni moobuwelelo aawo mateene’‡, ‘omudhivelege mwaaddamani aawo woona vineedhiveiliwe wamwiinya.’ §”

²⁸ Yesu ahimwaakulaga, wiira: “Ohaakula pama. Wiiregena dhendo oneere okalawo.”

²⁹ Mbwenye namasuuziha a malamulo ole, afunaga wiyaakwanihela yeekaye, ahiiraga: “Ki mwaaddamani aaga baani?”

³⁰ Yesu ahimwaakulaga, wiira: “Aaligi mulobwana mmohi akitaga oZheruzalemi, adhowaga oZheriko, mundila ahigumana ni mapanga. Omwihidda omwaaka dhoowara dhaaye, omuddwadha omporosa vajin-jivene, omwihiya nенaa ni okwa. ³¹ Mohujejiheya, namakutha mmohi egi odha dila emohive, agamoonile mulobwana ole ahimuwererewera. ³² Dila emohive egi ovira muLevita, agamoonile ni oliyeeene, ahimuwererewera. ³³ Vano muSamariya mmohi adheelaga dila emohive elene, agamoonile, ahifiyaga vakukuuve omweeddiwela thagaraga. ³⁴ Omuhuwa makwaddaya, ohelamo makura ni vinyu ompotha. Vano omuthukula, omugwelilha vamwaneenyamani aaye, omudhowana nyuba ya aleddo, omukamihedhe. ³⁵ Ode ogasile, ahiliva korowa bilii dha gwingwi* wa muliba nyuba yowawaakela aleddo. Oliye wiira: ‘Mmukameele muthu ola, dhinamunoongelinyu dhimohi, gadhaaga ginoliva.’”

³⁶ Vano Yesu ahimukohaga namasuuziha a malamulo: “Moobuwelelo aawo, athu ale araaru, aali mwaaddamani duuvi?”

³⁷ Oliye ahaakula: “Di ole amukamihedhe.”

Yesu ahiira: “Odhewe, weeregena ndo.”

Vade va Marata ni Mariya

³⁸ Yesu eeddaga ni anamasuuza aaye, yahifiyaga murudda mmohi, vano mwihiyana mmohi eeriwa Marata ahimwaakela vade vaaye. ³⁹ Marata ahikalana ddibile mmohi, eeriwa Mariya, akaratilege omayaloni a Yesu, omvuruwanaga dhosuuziha dhaaye. ⁴⁰ Mbwenye Marata aaligi ookathami-heya vajinji ni mabasa. Nuwindo, ahimwaaddamelaga Yesu, omukoha: “Nabwiyan, kamunapwatha wi ddibilaga ogihiyedhe mabasa menka? Mwaaddeleni wi agikamihedhe!”

⁴¹ Yesu ahimwaakulaga: “Marata! Marata! We ohusanyeya, vohumaleyia ni dhego dhijinji, ⁴² mbwenye, yoofuneya si yego emohi, baahi.† Mariya ohusakula yokwarany, ela kalivo onamwaake.”

‡ **10:27** Dt 6.5 § **10:27** Lv 19.18 * **10:35** Naari Denariyo. Yaali korowa ya wale yamukuwa ya gwingwi yaakwana omulivelaa namalaba alaba nlabo nimohi. † **10:42** Dhooolebiwa ni madada dhawale dhimohi dhini: “eng'onong'ono soofuneya naari egali yego emohi.”

11

Yesu Onosuuziha Olobela (Mt 6.5-15; Mt 7.7-12)

¹ Nlabo nimohi Yesu egi olobela mburo mmoheene. Agamarihile, namasuza mmohi ahimulobaga, wiira: “Nabwiyani, munisuuzihe olobela woona Zhuwawu asuuuzihile anamasuza aaye.”

² Vano Oliye wasuuziha: “Mwaalobelaga, mwiirege:

“Baba weehu,
ndina neenyu neelihiw.

Omwene weenyu odhe.*

³ Munivahe yooja yeehu yowaakwana nlabo ni nlabo.

⁴ Munilevelele dhoothega dheehu,
woona hiyo nnalevelela
ateene enanthege.

Kamunihiye omorela
moweehiwani.[†]

⁵ Yesu ahawaaddelagave: “Mofwanafwaniha muthu mmohi a mwa nyovoov akalana mukwaaye, adhowa amusayelaga vaari va mahiyu amwiirela: ‘Mukwaaga gibolihe mikaathe miraaru, ⁶ vowi mukwaaga avolenddoni difiyile vade vaaga, ogisayela, vano kaginna yoomvaha.’

⁷ “Vano mukwaayeya ola aakulaga mba-mba eeraga: ‘Kuginyagule, musiwo bi ofugeene, anaaga ni miyoya nihikonaati. Kaginaakwaniha ovenya wi guuvahe enalobiwe.’ ⁸ Ginowaddelanwi oliye kaafuna wi avenye amvahe mikathe, vano ahivenya omvaha dhatedhene dhafuniye, kamvahelege wi di mukwaye, mbwenye mwaha wa ntidi.

⁹ “Mwa ela Ginowuwaaddelani: Lobani, munovahiwa; sayelani, munofwanya; kokothani, muneere ofuguleliwa. ¹⁰ Vowi ateene enaloba, enovahiwa; onasayela, onofwanya; musiwo onofuguleliwa wa oyene onakokotha.

¹¹ “Baba baani mwa nyovoov oni mwaana aaye amuloba[‡] somba, vamburoniva amvaha nyowa? ¹² Naari amuloba nzayi, onomvaha walize?

¹³ Ki nyo, mugalive abure, munonile waavaha dhego dhpama aninnyu. Kahi ebaribari wi Babiinyu oodhulu oli apama, kanaavahe mookwaranya Muneba Woweela ale enamuloba?”

Osumeliwa wa Yesu (Mt 12.22-32; Mr 3.20-30)

¹⁴ Nlabo nimohi Yesu eegaraga muneba wootakala wohuwoga. Muneba olene ogakumilemo, muliba ohuwoga oowogaga, anamwinji yootikinaga.

¹⁵ Mbwenye amohi mwaaliwa yowiiraga: “Kopolo dhinakumihiyena mineba dhoottakala dhinadheela wa Belezebu, pogo a mineba dhoottakala.”

¹⁶ Amohiwa yoofunaga omweeha, yoomulobaga etonyihedho yoodhulu.

¹⁷ Mbwenye, Yesu aganonile dhowubuwela dheewa, ahawiirelaga: “Omwene oli wateeene wagawaneya mwa wooka onobwanyuwa. Emudhi yagawaneya murala ni murala dhinotongwa. ¹⁸ Akala Sathana

* ^{11:2} Dhoolebiwa ni madada dhijinji dhini: “Omwene. Okwela weenyu wiireyege vati vano woona odhulu.” † ^{11:4} Dhoolebiwa ni madada dhijinji dhini: “moweehiwani, mbwenye munivulumuse wa nambure.” ‡ ^{11:11} Dhoolebiwa ni madada dhijinji dhinowen jedhedha madhu ala: “amuloba mukaathe oneere omvaha nibwe.”

onogawaneya mwa yeeka, omwene waaye onalibe addi? Giwogelege nda mwaha wa nyovo muneera wi Gineegara mineba dhootakala ni Belezebu. ¹⁹ Akala Miyo Gineegara mineba dhootakala mwa Belezebu, ki anamasuuza[§] eenyu eneegara ni ddi? Mowi nda aliwa enodha yuthongeni. ²⁰ Mbwenye, akala Miyo Gineegara mineba dhootakala ni kopololo dha Mulugu, ebaribareene Omwene wa Mulugu ohufiya.

²¹ “Muthu a kopololo winna dhowiying’anelaga vade vaaye, dhookalana dhaaye dhinakala dhoohiddeleya pama. ²² Mbwenye, adhavo mmohiwa a kopololo dhijinji dhoomukwaranya oliye, amugonjiha, onomwaaka dhookalana dhaaye dhatedhene dharoromeliye, onogawaga dhoreela dhaniiyena.

²³ “Muthu ohuneewanana ni Miyo dinavanyihana ni Miyo, olene ohunagikamihedha otugumana ni Miyo onoomwadha.

²⁴ “Muneba wabure wakuma mwa muthu, onoweeddedda mwiddedereni asayelaga voovuma, waahifwanya, onowiiyirela: ‘Ginawelela vade vaaga, vevale vakumilimi.’ ²⁵ Vano afiya onafwanya moozheliwa mwene, moosasanyedha mwene. ²⁶ Endo onodhowa othukula mineba dhimohi mitanu namiinddi dhoomukwaranya ole; ovollowamo, okalaga mwemule. Vano mukalelo wogomihedha wa muthu ole onokala woothabwa okwaranya mukalelo wowambeela.”

²⁷ Vano dhabhipadduwa, Yesu awaaddelaga dhego nda; mwihiyana mmohi a anamwinji ahikuwaga ni ndhu notaama, wiira: “Oreelihiwa di mwihiyana oyene wubalileni, owamwihani.”

²⁸ Mbwenye Yesu ahiiraga: “Mohiyanika, oothabwa oreelihiwa bi ale eneewa madhu a Mulugu ni walogolela.”

Etonyihedho ya Zhonasi (Mt 12.38-42)

²⁹ Vowi anamwinji yootugumanaga, Yesu ahambeelaga wawaaddela: “Ola bu mulogo wabure! Aliwa enaloba etonyihedho yootikiniha, kinavahiwe etonyihedho emohiwa, ehili ya namavuhulela Zhonasi. ³⁰ Mowinda woona Zhonasi aali etonyihedho ya akadda oNinive, Mwaana a Muthu teto on-aakale etonyihedho ya mulogo olena. ³¹ Nlabo noothongiwa wa athu mwene a mwihiyana omadheelo pevo ya kasekase onodha eemelele athonge akone mulogo olena, vowi ahidha okumela ogomele elabo wi eeewo ononelamo wa Salomawu. Moone, oli vameentoni veenu ohumukwaranya Salomawu. ³² Teto athu oNinive enodha yimelele ethonge mulogo ola ni waakona; vowi aliwa ehitthwaruwa vowiwa olaleya wa Zhonasi. Moone, oli vameentoni veenu ohumukwaranya Zhonasi.

Panti ya Mwiili

³³ “Kalivo onahiddiha panti, alogoha wowipiteya, naari vati va ebale. Mbwenye, onahela vovooneyela, wi enavolowegemo yoonage waara. ³⁴ Meento bi panti ya mwiili. Meento aawo yakala apama, mwiili waawo wateene onakala wowaara. Mbwenye yahikala apama, mwiili waawo onakala wa yiiihi. ³⁵ Osugwe pama, waara oli mmwiillini mwaawo ohukale yiiihi. ³⁶ Akala mwiili waawo wateene oli wowaara, wahikalena yiiihi kukuru emohi, onokala wowaara, woona panti yamoneyelaga vaari va we.”

Yesu Onaakona Ooratha wa maFarizi ni Anamanonelamo a Malamulo

³⁷ Yesu agamalile owoga, mFarizi mmohi ahimwiithanaga wi yaje vamohi, vano Yesu ahivolowaga, okaraati vameeza. ³⁸ Mbwenye mFarizi ahitikinaga, agamoonile wi Yesu onaja ahihabilemo.

³⁹ Vano Nabwiya wiira: “Nyo maFarizi munahuwa ode wa katha ni wa muziwo, mbwenye muwari mweenyu muhudhaala dhowaaka ni dhabure.

⁴⁰ Oolodhowa nyo! Ole osasanyile ode kahuwo mmohive osasanyile muwarimwa? ⁴¹ Mbwenye wowambeela mvahe dhamahala wa arabuli ni murima wateene vano dhatedhene dhinakala dhineweelihiwa wa nyo

⁴² “Mbwenye ooddilu di nyo, maFarizi mwaha wi munavaha dhaneekumi dha bewu dhoonukwela, ni bewu dhoodhiva ni dha mataba dhatedhene, vano munanyemula ebaribari ni odhivela wa Mulugu. Yoofuneya mwiregena nda, mwahiihiyaga wiirana dhimohi.

⁴³ “Nyo, maFarizi muneere woona vowi munadhiveliwa dhittengu dhowambeela dha nyuba dha malobelio ni malojelo anriijo mmamisika.

⁴⁴ “Nyo, maFarizi muneere woona, muli woona masiye ehinooneya, athu eneedda vadhluluva ehinoonaga yego.”

⁴⁵ Namatapulela a malamulo mmohi ahimwaakulaga, wiira: “Namasuuziha, mwawogaga nda, munoninyemula ni hiyeene teto.”

⁴⁶ Vano Yesu, wiira: “Muneere woona nyovo teto, anamatapulela a malamulo, munaathukuliha athu sapo dhonyemela dholakwaniha aliwa, dhedho nyo muhunandinyu naari vang'ong'ono okahinya ni embuno yeenyu.

⁴⁷ “Ooddilu di nyo, munamaga masiye anamavuhulela ayene yapiwe ni makolo eenyu. ⁴⁸ Nda dhinooniha wi munorumeedhela mabasa a makolo eenyu. Vowi aliwa yahaapa anamavuhulela. Vano nyo munamaga masiye. ⁴⁹ Mwa ela teto, ononelamo wa Mulugu wiire: ‘Ginodha gaarumihedhele anamavuhulela ni arumiwi, aliwa enodha yaape, amohiwa yaarabulihe.’ ⁵⁰ Vowindo athu a mudhidhi ola enodha ekalena muladdu mwaha wa anamavuhulela ateene, epiwe wambeela omapaddusiwelo wa elabo: ⁵¹ mwazi wa Abeli ofiyedha mwazi wa Zakariya, apeliwe vaari va ebua ni nyuba ya Mulugu. Eee, Ginowuwaaddelani, mulogo ola onodha okohiwe.

⁵² “Ooddilu di nyo, anamatapulela a malamulo, mumvenyihilevo cavi oothulana ttotto dha ononelamo dha Mulugu. Nyo kamuvolowilemo nyooka, mwaathiyelele ale yafuna wi evolowege!”

⁵³ Yesu avenyaga vevale, anamasuuziha a malamulo ni maFarizi yaham-beelaga omusanya valubalevene ni omukoha dhoziyana-hiyana. ⁵⁴ Efunaga omuwaga muwano wi emmagihe.

12

Yesu Onowawaaddela ni Walibiha Anamasuza Aaye

¹ Mudhidhi olene, yahitungumanaga athu macikwi ni macikwi, ofiyedha onyingalanaga mmohi ni mmohiya. Yesu ahambeela wawaaddela anamasuza aaye, wiira: “Pole-pole ni emela ya maFarizi weewa oli oleketha. ² Kilivo yokuneeliwa ehinaadhe yooneya; naari yologohiwa ehinadhe enoneya. ³ Dhatedhene dhinawogelinu wipipini dhinovuweya mutaneene, dhinawogelinu vati-vati mba dhinodha olaleyiwa vathaddo.”

⁴ “Vano nyo, akwaaga, Ginowuwaaddelani: Muhawooeve ale enapa mwiili, mbwenye osogolo kinanda wiirana yego emohiwa. ⁵ Mbwenye Miyo Ginowuwaaddelani ofwaneelela omoova; mmoovege Mulugu, onapa, akalana owotha wovokedha omunddoni. Eee. Mmoovege Oliyeene,

baahi. ⁶ Mwiiwe. Anamanddwii atanu kinaguliihiwa korowa biili?* Vano dhiyevileve Mulugu kanamuddiwala naari mmohi. ⁷ Ofiyedha ni mathiteene a mmuruni mweenyu mateene eheelengiwa. Muhoove, nyo muli oofuneyesesa wakwaranya anamandwi ajinji.

⁸ “Miyo Ginowuwaaddelani wi olene onagirumeedha vameentoni va athu, teto Miyo, Mwaana a Muthu ginodha gimirumedhe vameentoni va angero a Mulugu. ⁹ Mbwenye ole onagikoodde vameentoni va athu Miyo Ginodha Gimukoodde vameentoni va angero a Mulugu. ¹⁰ Ateene alene enamwaaba Mwaana a Muthu enoleveleliwa, mbwenye wa ale enanyemula Muneba Woweela, kidha eleveleliwa.

¹¹ “Mwathukuliwaga munyuba dha malobeloo dha aZhudewu, mudhowiwagana wi mwathongiwe ni anamathonga muladdu, muhukalege ookubanya nnaakule havi, naari nnawoge havi. ¹² Mwaha wi mudhidhi oyene Muneba Woweela onowusuuzihani yowaakula.”

Musibe wa Mureeli Oolodhowa

¹³ Muthu mmohi, vaari va anamwinji ahiira: “Namasuuziha, mmwaad-dele ddibilaaga wi agigaweleo dhoreela dhoothala dha babihu.”

¹⁴ Mbwenye Yesu ahimwaakulaga, wiira: “Mulobwana we, baani ogisakule okala namathonga naari namagawela dhoohala dheenyu?”

¹⁵ Vano ahawiirelaga ateene yaaligi vevale: “Pole-pole! Murabele ogonjiihiwa nrima mwa dhateddhene, vowi egumi yebaribari ya muthu kinahiddeleya ni mwaha wa dhoreela, naari dhinjiveve.”

¹⁶ Vano ahawogela musibe, wiira: “Ahikalawo muthu ooreela. Mudda dhaaye dhahivaha dhojoa dhinjinji. ¹⁷ Nuwindo wambeela wubuwelela mmurimani mwaaye yeeka, eeraga: ‘Giire havi? Vowi kaginna vohela mulimo dhaagi dhi.’”

¹⁸ “Ahenjedhave, wiira: ‘Giire ayi, gibwanyule dhiringwi dhaaga, gimage dhiringwi dhimohi dhulubale, wi gihaddelemo milimo dhaaga, ni dhookalana dhaaga. ¹⁹ Gamala, giyirele miyo menka: ‘We ohukalana dhoreela dhijinji dhologoleleya, dhowaakwana yaaka dhijinjihene; ovume, oje, ong’we, ohagalale!’”

²⁰ “Mbwenye Mulugu omwiirela: ‘We olodhowa! Mahiyu alena onowaakiwa egumi yaawo. Ki dhego dhugeliliwe dhinakale dhawani?’

²¹ “Nda dhinompadduwela ole oneyugelela dhoreela yeeka, kahuwo ooreela ni Mulugu.”

Dhosaneyela dha Egumi

(Mt 6.25-34)

²² Yesu ahiwoga ni anamasuuza aaye, wiira: “Mwa ela Ginowuwaaddelani kamukale osanyeyela egumi yeenyu, mwiiraga: ‘Ninaje ddi, ninaware ddi?’ ²³ Vowi egumi sili yofuneya ohiyana ni yooja, mwiili onokwaranya yowara. ²⁴ Mwawoone anakugu: kinadhala, kinahadda, naari kinakanna eringwi, Mulugu onowaavaha dhojoa; nyo muli ofuneya okwaranya balame! ²⁵ Kalivo muthu akathamiheyaga, onaakwanihe wenjedhedha nlabo nimohi na egumi yaaye. ²⁶ Vano, akala kamunaakwaniha wiirana yego eng’onong’ono munakalela ddi osanyeyela dhimohidha?

²⁷ “Moone todo dha mukokolani, dhinonnuwa havi. Kadhinabala, kadhinasona. Ginowuwaaddelani wi naari mwene Salomawene ni nthithimihonoreela naaye, kaafiyedhe owara oliganaana ni todo nda. ²⁸ Ki akala

* ^{12:6} eGeregu: yaali korowa ya gwingwi eng’onong’ono yeeriwa ‘asses’.

Mulugu onowaawariha manasi a mukokolani, eliwo peenove, mmenseloniwiwa evokedhiwa vamunddoni, kanowariheni ny oyeva nromelo? ²⁹ Muheddege mosanyeya, muubuwelelag: ‘Ninaje ddi? Ninnang’we ddi?’ Kamusanyelete ni nda. ³⁰ Vowi athu a elabo ya vati ehinamuroromela Mulugu, binasanyeyelesesa dhego dhedhi. Mbwenye Babinyu ohununa wi munorabulela dhedhi. ³¹ Vowambeela mwa dhatedhene, musayele Omwene wa Mulugu, vano dhimohi dhiwa muneere wenjedhedhiwa.

³² “Kamoove nyo, nikwedda ning’onong’ono na mabila, vowi Babinyu ohudhiveliwa wuvahani Omwene waaye. ³³ Gulihani dhatedhene dhiininyuna, korowadha mwaavahe oorabula. Mwisayelete mathumba a korowa ehnataleya ni mudhidhi, mudhugelele dhoreela dheenyu dhumala odhulu. Vowi wule owiiya kinafiyawo, naari oswa kunanda okwenya. ³⁴ Vowi vevo vinaakale dhoreela dheenyu, murima weenyu onakale vevo.

Wiimelela wi Olabe

³⁵ “Mukalege owimageene mmwiinuni mweenyu, panti dheenyu dho-hiddadhene. ³⁶ Vano, nyo mukale oofwanafwana ni athu enamujejihedha nabwiya eewa okuma omathangani a matelo. Adhaaga oliye, akokotha, enafugulele mowaaguba. ³⁷ Oreelehiwa bi alene amwiimeleli enafwanyiwe ying’anelaga nabwiya adhaaga. Ebaribareene, Ginowuwaaddelani wi onodha aakaratih vameeza, nabwiyeene agawelaga dhojoja. ³⁸ Akala onaaifiye vaari va mahiyu, naari njijji noomaselo, aafwanya ehigonile, oorelihiwa enakale amwiimeleli alene. ³⁹ Teto munone nda: Muliba vade ahanonege mudhidhi onadha mbava, eerege wing’anel kaamwihiyege wiya vade vaaye. ⁴⁰ Vano, nyovo muwaraale vowi Mwaana a Muthu onadha mudhidhi ohunoobuwelelinyu.”

⁴¹ Peduru ahimukohaga: “Nabwiya, musibe ola munaniwogela hiyo, naari athu ateene?”

⁴² Nabwiya ahiira: “Mwiimeleli ooromeleya, oolageya baani? Ole omuthomile Nabwiya okala pogo ookwaranya, owaagawela dhojoja akwaaye mudhidhiya wafiya? ⁴³ Oorelihiwa di mwiimeleli oyene nabwiya adhaaga onamfwanyiye eeragana dhedhi. ⁴⁴ Ebaribareene ginowuwaaddelani wi nabwiya onomwiira nameeddiha a dhoreela dhaaye dhatedhene. ⁴⁵ Mbwenye mwiimeleli ole onoobuwelela mmurimani mwaaye, ‘Nabwiya onoseliwa kanadhawo,’ ambeela waaddwadha anamalaba anaahiyana, ni anaalobwana, vano ajaga, ang’waga, alezelaga. ⁴⁶ Finafiya nabwiinya a mwiimeleli ole nlabo nahajejihiy naari mudhidhi wohunona. Oliye onomooniha goyi vajinji, amvokedhe vaari va athu oohuroromela.

⁴⁷ “Mwiimeleli ole ononile efunelo ya nabwiya aaye, ahivirihamo efunelo ya nabwiya, onwoonihwa goyi vajinji yowaxuliwa. ⁴⁸ Mwiimeleli ole ohunonile dhinafuna nabwiinya, aviriganinha goyi yaaye enakala vang’ono. Ovahihi dhijinji, onokohiwa dhijinji; ohiyedhiwe dhothabwa, onolobiwa dhothabwa.”

Yesu Kadilena Murenddele, Mbwenye Wiiddaniha

⁴⁹ Vano Yesu ahiira: “Miyo Gidheele ovoka munddo mwilaboni, Gahifuna ogahiddile! ⁵⁰ Enofuneywa wi Gaakele obathizo wa goyi, murima waaga kukarateye ofiyedha wi dhiireye! ⁵¹ Munooobuwelela wi Gidhilena murende-de elabo ya vati? Naari, mohiyanika Ginowuwaaddelani wi Gidheele omwalaniha. ⁵² Wambeela dhiinoveva odhowa osogolo, athu atanu a nyuba emohive eneerege ofiyedha omwalana. Araaru ewanege ni abiili, abiili

ewanegi ni araaru. ⁵³ Baabi oneerege omwalana ni mwaanaye, mwaana oneerege omwalana ni babaye; mmeenya oneerege owana ni mwaanaye a mwaana mwihiyana, mwaana a mwihiyana oneerege owana ni amaaaye; nzala oneerege owana ni nzaliyaaye, vano nzaliye oneerege owana ni nzala aaye.”

Dhitonyihedho dha Mudhidhi

⁵⁴ Yesu ahawiirelaga anamwinji: “Moonaga murabo dhidhelaga on-adhowela nduwa, muni: ‘Muzongwe onoodha,’ nda wiireya. ⁵⁵ Vano, yoobaga pevo ya kasekase, muni: ‘Oneere okala oviha,’ nda wiireya.

⁵⁶ Anamaleketha! Muhunona otapulela mukalelo wa elabo ni odhulu. Muhunonele ddi otapulela mukalelo wa mudhidhi ola wa dhiinova?

⁵⁷ “Ki mwa nyo weekinyu muhunandela ddi onona eli yooharihamo?

⁵⁸ Akala mwiiddani aawo onowudhowana omuthegoni, osayele wiwanana mmarihe muladduya mundila, wi dhinapadduve oothukulele wa namathonga, namathonga odhowena wa namafugela, namafugela oofugele mukaambura. ⁵⁹ Miyo Ginowuwaaddelani wi kunanda okumamo ohulivile korowa yoogomihedha.”

13

Otthwaruwa naari Okwa

¹ Mudhidhi olene, yahikalavo athu amohiya yamwaaddelile Yesu dha aGalileya ayene Pilatu yathongiliye wi epiwe ekuthaga mukutho dha aneenyama wa Mulugu. ² Vano Yesu ahawiirelaga: “Munoobwela wi aGalileya ale yaali othegesesa okwaranya aGalileya amohiwa, mwaha woopiwa ndale? ³ Ginowuwaaddelani nyo wi naari! Mbwenye munoodha munongeye mwateene mooligana ni aliwa, mwahithwaruwa. ⁴ Naari kumi ni atanu ni araaru ale yamoreliwe, sanja yoolapa ya oSilowami, yaapa — munoobuwela wi yaali oothega okwaranya athu ateene ookala muZheruza-lemi? ⁵ Ginowuwaaddelani nyo wi naari! Mbwenye munoodha munongeye mwateene mooligana ni aliwa, mwahithwaruwa.”

Musibe wa Namutambwi Oohuvaha

⁶ Yesu ahjenjedhedhave, owoga musibe ola: “Muthu mmohiwa ahikanna namutambwi aaye amudhaliliye mmiddani mwa mithanko, ahidha wi ahapemo furuta mwemule, mbwenye kafwanyilemo. ⁷ Vano ahimwaaddela namalaba, wiira: ‘Vihivira yaaka thaaru, gidhaaga osayela furuta munamutambwinimu, gihifwanyagamo. Omukakatte! Onanongela ddi ttheya ahivahaga?’

⁸ “Namalaba ahaakulaga, wiira: ‘Nabwiyan, mwihiye yaaka emohi ofiyedha gitibe mowaapeleliha, gihele manyowe. ⁹ Wavaha furuta yaaka elena sapama, mbwenye akala kunavahe, munodha mukakatte.’”

Mwihiyana Mmohi Ayilihiwe Nlabo na Sabuddu

¹⁰ Nlabo nimohi na Sabuddu, Yesu aasuuuzihaga athu mu nyumba ya mal-obelo. ¹¹ Mwemule mwahikala mwihiyana mmohi, anna muneba wabure, wambulelihe yaaka kumi ni tanu nathaaru. Mutana waaye waali wookoroma, kaanda winuuwa. ¹² Vano Yesu agamoonile, ahimwithanaga, omwi-irela: “Mwihiyana, we ohutapuliwa oredda wanniwena.” ¹³ Ahimuhela madada, mwihiyana ole mowaaguva ahoogowaga, omutamalaga Mulugu.

¹⁴ Mpogo a nyuba ya malobel o ahitakaleliwaga vowi Yesu ahiyiliha nlabo na Sabuddu, ahawaaddelaga ateene yaaligi vevale wiira: “Ehikalawo malabo matanu ni nimohi oolaba. Mudheege muyilihiwe malabo ayene, mbwenye Sabuddu, naari.”

¹⁵ Mbwenye Yesu ahimwaakulaga, eeraga: “Anamaleketha nyo! Kalivo muthu onatapula ng’ombe yaaye naari buuru aaye nlabo na Sabuddu, ayana wi dhang’we mahinje? ¹⁶ Ki mwihiyana ola, oli mwaana a Abarahamu, Sathana ammagiliye yaaka kumi ni tanu nathaaru. Kafwaneelele otapuliwa oredda wanniyena nlabo na Sabuddu?”

¹⁷ Vano Yesu agawogile nda, amwiiddani aaye yahikannaga manyazo, mbwenye athu ateene vevale yahidhiveliwaga ni dhego dhotikiniha dheeriye nde.

Musibe wa Bewu ya Mukwani ni Emela

(Mt 13.31-35; Mr 4.30-34)

¹⁸ Moharela Yesu ahiiraga: “Omwene wa Mulugu onaligana ni ddi? Ginalafwanafwanihe ni ddi? ¹⁹ Onaligana ni bewu ya mpeza, eyene muthu yathukuliye akuthela mmiddani mwaaye. Omela okala muthanko mulbale, balame dha odhulu odha omagamo dhitunji mmijiddanimwa.”

²⁰ Ahiiragave: “Ginalafwanafwanihe ni ddi Omwene wa Mulugu?

²¹ Onaligana ni emela eyene mwihiyana athukuliliye otaganyiha ni malanta* maraaru a asambale, ofiyedha onyakuwa naatenene.”

Mulago Woopurana

²² Volenddoni waaye, woodhowa oZheruzalemi, Yesu oweedda mmaluwani ni mmiruddani asuuuzihaga. ²³ Muthu mmohiwa ahimukohaga, wiira: “Nabwiyan, enavuluwa boyeva?” ²⁴ Mbwenye Yesu ahimwaakula, wiira: “Wiilibihedheni wi nvolowe mulago woopurana, Ginowuwaddelani, ajinji enodha esayelege ovolowa, mbwenye kidha yaakwaniha ovolowa. ²⁵ Adha avenya mwiinya a nyuba, afuga omulago, vano nyo munodha mwiimele ode, mukokottege esewo ni owoga, mwiiraga: ‘Nabwiya, nthuleleni hiyo.’

“Oliye onodha owaakuleni: ‘Kagunonileni. Kaginonile onadha nyo, muli awuuvi.’

²⁶ “Vovo munodha mwiirege: ‘Hiyo nooja, noong’wa ni nyo, teto muhusu-uziha mundila dhowanuhu.’

²⁷ “Oliye onodha owiiireleni: ‘Kaginonile onadha nyo, muli awuuvi. Venyavoni vameentoni vaaga, mwaatene owiira dhabure!’

²⁸ “Vovo munoodha mundde ni owurawura meeno, vomoona Abarahamu, Ezaaki, Yakobo ni anamavuhuela ateene mu oMweneni wa Mulugu, mbwenye nyo munodha mutukumedhiwe ode. ²⁹ Athu ajinji enodha edheelege omadheelo wa nduwa ni omadhowelo wa nduwa ni omadheelo wa pevo ya kasekase ni omadhowelo, ekale vamajelo muMweneni wa Mulugu. ³⁰ Mowindo, ehikalawo oogomihedha enaakale owambeela, teto ehikalawo owambeela enaakale oogomihedha.”

Okubanyedha Dhovuhuleliwa Mwaha wa Zheruzalemi

(Mt 23.37-39)

³¹ Mudhidhi mmohive yahidhaaga maFarizi omwaaddela Yesu, wiira: “Venyawoni wuno mwaha wi Heroddi onafuna oopeni.”

* ^{13:21} Muwogelo wa eGerego: 3 satos. Sato waali mpimo, wapimiwana dhego dhowuma dhak-wakwana mohiyana-hiyana vari va manituru matanu nameenddi naari manituru kumi namaraaru.

³² Oliye ahawaakulaga, wiira: “Mudhowe mwamwaaddele kwaddwe oyo, ‘Peeno ni menselo Ginakumiha mineba dhabure ni oyiliha dhiredda, nlabo na nethaaru Ginomariha mabasa aaga.’ ³³ Mbwenye enofuneya Geedde olenddo waaga peeno ni menselo ni muroddo, mwaha wi kadhinarumeedheya namavuhulela akwele ode wa Zheruzalemi!

³⁴ “Zheruzalemi, Zheruzalemi we, onaapa anamavuhulela, onaavonya ni mabwe ale enarumihiwa wa we, aaa! Dila ngaasi Gifunaga waatugumanya anaawo woona nikolo na mwanaku nnaatugumanya anaaye vati va mompelo aaye, we ohufunaga! ³⁵ Onani, nyuba yeenyu enodha ekale nddebe. Ebaribareene Miyo Ginowuwaadelani wi kamudha mugoona ofiyedha mwiire: ‘Oreelihiwa oyene onadha mundina na Nabwiya.’†

14

Yesu Vade va MFarizi Mmohi

¹ Nlabo nimohi na Sabduu, Yesu ahidhowaga vade va mpogo mmohi a maFarizi wi aje mukaathe, athu yaaligi vevale yegi omusugwesesa. ² Vahikalaga mulobwana mmohi annaga eredda yoodhibelana mwiili wateene.* ³ Yesu ahaakohaga maFarizi ni ale yatapulela malamulo, eeraga: “Dhinorumedheya naari kadhinarumeedheya oyiliha Sabduu?” ⁴ Aliwa kayawogilege yego. Vano, ahimwihiddaga, omuyiliha, ompaganya.

⁵ Voharela ahaakohaga: “Baani mwa nyo oni mwaanaye,† naari ng’ombe yaaye, egamorele vaseelani, ahitavulavo mudhidhi oyene nlabo na Sabduu?” ⁶ Mwa ela kayandilege waakula.

Mburo Dhowambeela

⁷ Vano Oliye egi waasugwa aliba wiithaniwa yasakulaga dhittengu dhosogolo, ahawogelaga musibe ola: ⁸ “Muthu eethaneliwa mathanga a matelo, ahikaratelege ettengu yosogolo, vowi dhinodha dhipadduwe ogakaratile, adhe owiithaniwa mmohi othithimiheya oohiyana ni we. ⁹ Adhe ole owiithanile, eerege: ‘We, venya veethenguniva wi akarativo ola.’ Onavenyavo ni manyazo, odhowaga ettengu yoogomihedha. ¹⁰ Mohiyaniba weethaniwa, okaraatigi ettengu yoogomihedha; adha ole owiithanile, eera: ‘Mukwaaga, venya okaraati osogolo wuno.’ Onothithimiheya vameentoni vaaliba wiithaniwa ateene. ¹¹ Vowi ole oneegweliha, onokitihiha; oneekitiha, onogwelihiwa.”

¹² Teto Yesu ahiwogaga ni muliba amwiithanile: “Wafunaga ovaha yooja, naari wiirihedha mathanga, kawawiithanege akwaawo, naari addibilo, naari anaamudhi, naari amwaaddamani oreela, wi dhinadhe dhipadduwe ni aliweene yuwiithane, yuwelihedhe. ¹³ Mbwenye we wafunaga wiirihedha mathanga, wawiithanege oorabula, ootopinya, ooragala, ni ohoona. ¹⁴ Weeraga ndo oneere oreelihiwa, vowi kinaakalena yowuwelihedha; yowelihedhiwa yaawo onaakele omavenyelo wa athu oharihamo”

Musibe wa Mathanga Malubale

(Mt 22,1-14)

¹⁵ Mmohi aaligi vevale ni Oliye vameeza, ageewile nda, ahiiraga: “Oreelihiwa duule onaje mathanga muOmweneni wa Mulugu.”

¹⁶ Yesu ahaakulaga, wiira: “Mulobwana mmohi ahisasanyedha mathanga malubale, wawiithana athu ajinjeene. ¹⁷ Mudhidhi ogafiyile ahimuruma

† ^{13:35} Sal 118.26 * ^{14:2} eGerego: hidropisia † ^{14:5} Dhoolebiwa ni madada dhimohi dhini: “mwanaana a buuru.”

mwiimeleli aaye wi awaaddele yawiithaniliye: ‘Dhaani vowi dhatedhene dhihaakwanela.’

¹⁸ “Mbwenye aliwa yahambeelaga owoga mmohi-mmohi. Owambeela ahiraga: ‘Gihigula mudda, ginafunu gidhowe goone. Ginaloba wi mugilevelele.’

¹⁹ “Mmohiya ahiraga: ‘Gihigula ng’ombe paara tanu.[‡] Ginafunu gaxixe olimanu. Ginaloba wi mugilevelele.’

²⁰ “Mmohiya ahiraga: ‘Gihitela dhiinoveva, kaginayawo.’

²¹ “Mwiimeleli agawelilewo, ahimwaaddelaga nabwiye. Vano, muliba nyuba ahitakaleliwaga, omwaaddela mwiimeleli: ‘Venya mowaaguva, waahare arampa alubale, ni dila dha nluwa, waadhenwa wuno oorabula, ooragala, ohoona ni ootopinya.’

²² “Mwiimeleli ahiraga: ‘Nabwiyanu, gihiirana dhatedhene woona mwawogelinu. Mbwenye mburo ohukalawove.’

²³ “Vano, nabwiye ahimwaakulaga, wiira: ‘Venya wahare arampa, ni dila dha mmavade, waawaddihedhe evolowe athu ateene wi nyuba yaaga edhaale. ²⁴ Ginowuwaaddelani wi ateene alene yeethaniwe vowambeela, kaavo naari mmohi oneere alawihe mathanga aaga.’”

Wisasanyedha Wowaakwanelu Womuhara Yesu

²⁵ Nuwindo, anamwinji yegi omuhara Yesu; ahaarugunuwelaga, wiira:

²⁶ “Akala muthu onofuna odha wa miyo, aadhivela ababe, amaaye, mwihiyanaaye, addibilaaye arogoriye naari egumi yaaye vajinji ogihiya miyo, kanakala namasuua aaga. ²⁷ Ole ohunathukule muraddi waaye wi agiharege, kanaakale namasuua aaga.

²⁸ “Baani mwa nyo, oni afunaga omaga nyuba yulubale, vowambeela ahikarati eelengela korowa dhinafuneyege wi oone akala oneere omariha?

²⁹ Dhinampadduwele agambelile adhe ahimarihe, mwaha wi keelengele korowadha mowakwanelu, ateene enamoonege embeddege, ³⁰ yiirege: ‘Mulobwana ole ahambeela omaga mbwenye kamarihile.’

³¹ “Naari mwene baani, oni adhowaga owana koddo ni mwene mmohiya, vowambeela ahikarati oobuwelela akala ni anyakoddo aaye macikwi kumi onowakwaniha owanana mwene ole onadha ni anyakoddo macikwi makumi meenddi? ³² Akala kanaakwaniha, onomuruma omwiimelela alobe mukalelo wa murenddele, mwene mmohiya agali woolapelawene. ³³ Mowindo mwateene mwa nyo ohunahiye dhinniyena, kanaakale namasuua aaga.

³⁴ “Mwiinyu bwapama; ki wakumuwa, ninawelihedhena ddi?

³⁵ Kunahiddiwana yego, naari okala manyowa, naari vadhuguni; mbwenye onothathiliwa.

“Wiina mabaru owiiwana, eewe.”

15

Musibe wa Nibila Noorimela (Mt 18.12-14)

¹ Anamakoha-musoko ateene ni “anamathega” amohi yoomususedha Yesu wi emwiiwe. ² MaFarizi ni anamasuuza a malamulo yegi omwaaba, yiiraga: “Ola onowawaakela anamathega, ajaga vamohi ni aliwa.”

[‡] **14:19** kumi. Ezarayeli mudhidhi wawale, yalima ni ng’ombe, vano yagulihaga, yagulihaga biili-biili noona bi madhu ala owi paara tanu, otapulela ng’ombe kumi.

³ Vano Yesu ahaawogela musibe ola: ⁴ “Baani mwa nyo, oni aganna mabila zana, nirimeelavo nimohi, kanaahiye mukokolani makumi matanu na manayi nuudhata matanu ni neenayi adhowa asayelaga nrimeelile ofiyedha ofwanya? ⁵ Agafwanyile, onothukula veefuddi ni odhaaliwa ohagalala. ⁶ Vano nuudhowa vade. Ahawiithana akwaaye ni amwaaddamani, awiire-laga: ‘Agalalani ni miyo, mwaha wowi gihifwanya nibila naaga narimeelile.’ ⁷ Ginowuwaaddelani wi ni mukalelo mmohive, onokala ohagalala wulubale odhulu mwaha wa namathega mmohi onatthwaruwa, ohiyana makumi matanu na manayi ni atanu ni anayi ooharihamo ehinafuneya otthwaruwa.

Musibe wa Korowa Yoorimeela

⁸ “Naari mwihiyana baani, oni aganna korowa dha gwingwi kumi, arimeeliha emohi, kanahiddiha panti, azhela mba, asayelaga pama ofiyedha afwanya? ⁹ Vano, agafwanyile, onowaatugumanya akwaaye ni amwaaddamani, eera: ‘Agalalani ni miyo, mwaha wowi gihiddodda korowa yagirimeele.’ ¹⁰ Miyo Ginowuwaaddelani wi ni mukalelo ola, onokala ohagalala vameentoni va angero a Mulugu mwaha wa namathega mmohi otthwaruwile.”

Musibe wa Mwaana Ooholowa

¹¹ Yesu ahiwelelagave: “Mulobwana mmohi anna ahima abiili aalobwana. ¹² Amung’onong’onya mwa aliwa ahimwaaddela babaye, wiira: ‘Babani, mugigawele epaddi ya dhoreela dhigifwaneele.’ Oliye omugawelawo dhoreeladha.

¹³ “Vigavirile malabo oyoyeva, muzombwe ole a mung’onong’onya ahi-tugumanya dhego dhaaye dhatedhene, omaruwa, odhowa elabo emohi-weene yoolapela. Wewo ahinoonga dhookalana dhaaye dhatedhene ni mukalelo wabure woohubuwelana dhoosogolo. ¹⁴ Agamatilie onoonga dhaaye dhatedhene mwiilaboni mule, mwahidha dala yulubale, oliye wambeela okanna goyi. ¹⁵ Vano ahidhowa okala ni mulobwana mmohi a mwiilaboni mwemule, omuruma omidda waaye wi akameelege kumba dhaaye. ¹⁶ Wewule oofuna agarubalile maddeya yaaja kumba, mbwenye kaalivo amvaha maddeyaya.

¹⁷ “Ahubuwelela otthwaruwa, wiyirela yeeka: ‘Anamalaba ababa enoja erubalaga mowaakwanana, miyo wuno gikwaga dala! ¹⁸ Baahi, ginovenya gidhowege wa babaga, gineere wawaaddela: Babani, gihittegela odhulu, ni vameentoni veenyu. ¹⁹ Vano kagifwaneelele wiiriwa mwaaninyu; mu-gaakele woona namalaba eenyu.’ ²⁰ Ahivenyaga odhowa wa babaye.

“Adheelaga wolapelawene, babaye ahimoonaga, omweeddiwela thagaraga. Ahimuthamagelaga, omukubarela, ombezhari.

²¹ “Vano mwaana ahiiraga: ‘Babani, gihittegela odhulu, ni vameentoni veenyu. Vano kagifwaneelele wiiriwa mwaaninyu.’

²² “Babaye ahawaaddelaga anamalaba aaye: ‘Dhaanani mowaaguva yoowara yooriyesesa muwariheni, teto pethe mwimbunoni, sapatho omalyaloni. ²³ Mmudhenia mwana-ng’ombe ooruva, mumpe. Niirena mathanga, nihagalale. ²⁴ Mwaha wowi mwaanaga ola ahikwa vano ohukanna egumi, ahiromeela, ohufwanyeya.’ Vano wambeela ohagalala.

²⁵ “Mwaana a mulubale aaligi omidda. Awelagawo, aaddamelaga vade, eewilege wiiba ni wiina. ²⁶ Omwiithana namalaba mmohi omukoha eneereya ddi. ²⁷ Oliye omwaakula, wiira: ‘Ddibilawo didhiile, ababo waaruma wi epe mwana-ng’ombe yooruva, mwaha wowi ohumwaakela, aganna egumi.’

²⁸ "Mwaana a mulubale otakaleliwa, kaafunaga ovolowa. Babaye ahikumelaga vade ombebeedhaga wi avolowe. ²⁹ Mbwenye oliye ahawaakulaga babaye, wiira: 'Vihivira yaaka dhijinjidhene guwiimelelagani gihilupile malamulo eenu, mbwenye kamunagivahenaaari mbuzi wi giirena mathanga ni akwaaga. ³⁰ Mbwenye mwaninyu ola onoongile dhoreela dheenyu ni ahiyana oraruwa, muhumpela mwana-
ng'ombe ooruva!'

³¹ "Vano babaye ahimwaakulaga: 'Mwaanaga, we mudhidhi wateene onakala ni miyo, dhatedhene dhili dhaaga saawo. ³² Mbwenye yaali yoofuneya wi nihagalale, niteyele, mwaha wi ddibilo ola ahikwa vano ohukanna egumi, ahirimeela vano ohufwanyeya.'

16

Musibe wa Musadoro Oowarala

¹ Yesu ahawaaddelaga anamasuuza aaye: "Wahikala mulobwana mmohiwa oreela; ole anna musadoro olene athu yamusumeliwa vameentoni va nabwiye wi ononoonga dhoreela dhaaye. ² Vano nabwiye, ahimwiithana, omukoha: 'Ginewiimi wa we si ddi? Ogaaddelihemo dha omusadoro waawo, mwaha wi dhiinova kunafwaneelela okala musadoro aaga.'

³ "Musadoro wiira mwa yeeka: 'Gineere ddi? Vowi nabwiya aaga onogigara mu omusadoroni. Olima mmiddani kaginaakwaniha, ofoba teto onogikalihia manyazo... ⁴ Miyo gihinona yowi giire, wihina athu yagaakelele mmavade mweewa geegariwa mu omusadoroni'

⁵ "Ahawiithanihaga mmohi ni mmohi alene yamfiyarele nabwiye. Omukoha owambeela, wiira: 'Mwamfiyaarile nabwiya aaga avi?'

⁶ "Oliye omwaakula: 'Yoofiyaari yaaga si mino* zana dha makura.'

"Nuwindo musadoro wiira: 'Okaraati, othukule karata ya yoofiyaari yaawo olebevo mowaaguva makumi matanu.'

⁷ "Vano, ahimukohaga anabiili: 'Ki we, wafiyaare avi?'

"Oliye omwaakula: 'Masakwi† zana a tirigu.'

"Omwiirela: 'Thukula karata ya yofiyaari yaawo olebevo makumi matanu ni maraaru.'

⁸ "Vano nabwiye a musadoro oonyengetha ole, ahimutamalela mwaha wooxaga waaye wewiliye. Mwaha wi athu a elabo ya vati booxaga okwaranya mulogo weewa oli mowaara. ⁹ Mbwenye Miyo Ginowuwaadde-lani: Mulabihe dhoreela dha elabo yoonyengetha ela, wi akwiinyu dhoreeladha dhomalelani enodha yuwaakeleleni mmisasani dhohumala.

¹⁰ "Ole oli ororomeleya ni dhooyeva, onororomeleya teto ni dhijinji; ole ohunaharihamo ni dhooyeva kanaharihamo ni dhijinji. ¹¹ Vowi, nyo mwahikale eebaribari ni dhoreela dhonyengetha, onororomeleni baani ni oreela wa ebaribari? ¹² Akala muli ohuroromeleya ni weeddiha dhego dha mmoheene, onoovaheni baani weeddiha dhoreela dheenyu?

¹³ "Kalivo mwiimeleli onanda wawiimelela anabwiye abiili; vowi onadha amwiidde mmohi, amwandanena mmohiwa; naari oneerege omwiilelela ola, mmohiwa amunyemulege. Kadhinandeya omwiimelela Mulugu, wiimelela dhoreela.‡"

* ^{16:6} eGerego: 100 batos. Batos waali mpimo wapimiwana dhego menjiveloya dhofiyedha waakwana 20 amohiwa 40 manituru. † ^{16:7} eGerego: 100 koros. Koro waali mpimo wapimiwana dhego menjiveloya dhofiyedha waakwana 200 amohiwa 400 manituru. ‡ ^{16:13} eGerego: mamom.

¹⁴ MaFarizi, ale yaali a nrima, yeewaga dhatedhene dhedhile, yombed-daga. ¹⁵ Yesu ahawiirelaga: “Nyo munowiihelamo woonaa owaakwanelesesa vameentoni va athu, mbwenye Mulugu ohunona mirima dheenyu. Vowi dhinarihedheya vameentoni va athu, vameentoni va Mulugu dhinakala dhonyemuwa.

Malamulo ni Omwene wa Mulugu

¹⁶ “Malamulo ni anamavuhulela yahivuhulela ofiyedha mudhidhi wa Zhuwawu. Okumela vevale odhowa osogolo onolaleyiwa muselu wapama wa Omwene wa Mulugu, vano athu ateene enaakwaniha ovolowa mwemule, ni kopolo, baahi. ¹⁷ Sookweya vajinji ovira odhulu ni elabo ya vati, ohiyana wi omorevo mujebo mmohi wa Malamulo.

¹⁸ “Oli ateene onamwalana ni mwihiyana aaye, amutela mmohi, onomuraruwana; ole onamutela mwihiyana omwalane ni mamune, onomuraruwana.

Musibe wa Mureeli ni Lazaro

¹⁹ “Ahikalawo mulobwana mmohi oreela; awaresa dhoowara dha mutheengo mulubale dha linyu oofewa, ni owiirihedha mathanga malubale, malabo mateene akala ni mukalelo wa athu oreesesa. ²⁰ Ahikalawo teto muliba oolobaloba, eeriwa Lazaro, anna makwadda mwiili wateene. Akalesa vamulago va muliba oreela ole, ²¹ oofunesa oja dhonyenyeaya dhamoresa vameeza a muliba oreela. Vevale anabwa yodheesa, onyangulaga makwadda aaye.

²² “Dhahipadduwa muliba oolobaloba agakwile. Angero yahimuthukula, omudhowana wakala Abarahamu. Teto muliba oreela agakwile yahimud-howana omulogoha. ²³ Arabulaga, azhaga omunddoni, mburo wa athu ookwa, ahisugwa odhulu, omoona Abarahamu ni Lazaro agali nikukuru. ²⁴ Nuwindo, ahikuwaga, wiira: ‘Babani Abarahamu, mugeddiwele thagaraga, mmurume Lazaro anyethihe mmahinjeni otampini wa embuno yaaye adhena addiddilihena nlumi naaga, vowi ginorabula mmunddoni mula.’

²⁵ “Abarahamu ahimwaakulaga, wiira: ‘Mwaanaga, wubuwele wi wa-haakela dhego dhopama dhothagalasa egumi yaawo, wewule Lazaro aake-lile dhorabula. Mbwenye dhiinova, oliye onahagalala wuno, we onorabula.

²⁶ Ohiya dhatedhene, vaari va hiyo ni nyo vihikala jiji, vowi eli wuno enafuna odha wo, kinaakwaniha, naari eli wo, enafuna odha wuno kinaak-waniha.’

²⁷ “Nuwindo, ahikaleлага ntidi, eeraga: ‘Babani, miyo ginowulobani wi mmurume Lazaro adhowe vade va ababa, ²⁸ mwaha wi gihikanna addibi-laga atanu. Awaaddele wi ni aliwene enadhe teto mburo olena wa masoso.’

²⁹ “Abarahamu ahimwaakulaga: ‘Aliwa ehikanna Mozezi ni anamavuhulela, yawiwelelege aliweene.’

³⁰ “Mbwenye oliye ahikaleлага ntidi: ‘Naari, babani Abarahamu, akalavo mmohi ovenyile mwa anookwa adhowa awoga ni aliwa, enothwaruwa.’

³¹ “Abarahamu ahimwaakulaga: ‘Akala aliwa kinamwiwelele Mozezi ni onamavuhulela, nivang’onong’ono kinafunegi ogonjihwa wi ehiye naari muthu mmohi avenye omakwelo.’”

17

Yoothega, Nnrormelo, Oleveleliwa ni Yowiirana

¹ Yesu ahawiirelaga anamasuuza aaye: “Kadhinandeya wi dhoholosa dhihidhe, mbwenye oddilu wa muthu oyene onadhana. ² Yaali yoofwanelela

amageleliwe mukohi nibwe na nsilo, avokedhiwe munyaza, ohiya omukwakwathusa muthu mmohi mwa athu ohuthithimiheya ala.³ Pole-pole.

“Akala ddibilawo ohuthega, omusumulule; atthwaruwa, omulevelele.⁴ Oothegela we dila tanu nabiili vanlaboni, dila tanu nabiili adha wa we, eraga: ‘Gihitthwaruwa,’ omulevelele.”

⁵ Vano, arumiwi yahimwiireлага Nabwiya: “Munenjedhedhe nroromelo neehu!”

⁶ Nabwiya ahawaakulaga, wiira: “Mwakalana nroromelo woona bewu ya mukwani muneerege wiirela muthanko wa amora ola: ‘Wiiddule, weedhale munyaza,’ vano, oneerege wuwiwelelani.

⁷ “Baani wa nyovo, onakanna mwiimeleli aaye alabaga omudda, naari ang’anelaga mabila, voweruwa omudda amwiirela: ‘Odhe mowaaguva okaraati, oje?’⁸ Kuneere nda, onomwaaddela: ‘Osasanyedhe yooja, aware guwo dhimohi, ogiimelele. Vano miyo gamala oja ni ong’wa, we fineeriwe oje, ong’we?’⁹ Munoobuwelela wi oneere omutamalela mwiimeleli ola, mwaha wi ohiirana dharumiwiye?¹⁰ Ndala teto nyo, mweerana dhaaddel-winyu, mwiire: ‘Nili eemeleli ebeweene mwaha wi nihiirana dhafwaneelihiu wiira.’”

Oyilihiwa wa Aliba Maredda Kumi

¹¹ Yesu adhowaga oZheruzalemi, ahivira mmiganoni mwa Samariya ni Galileya. ¹² Avolowagawene mmudhini, athu kumi a maredda yahimuhareлага, wiimela wuddledgewene. ¹³ Egeemelile wuddledde wewule yookuwaga, yiiraga: “Yesu, Namasuuziha, muneeddiwele thagaraga!”

¹⁴ Yesu agawoonile, ahiiraga: “Mudhowe mweyoonihe wa anamakutha.” Dhahipadduwa edhowaga mundila yahiyilihiwaga.

¹⁵ Mmohi wa kumi ale, agoonile wi gihiyilihiwa, ahiweleлага mundduli amutamalaga Mulugu ni ndhu notaama. ¹⁶ Agafiyile vaaligi Yesu, ahikokoraga oworomihedha kove vati va manyalo a Yesu, atamaleлага. Ola aali muSamariya.

¹⁷ Vano, Yesu ahimukohaga: “Kamwaali kumi mweelihive? Ki atanu ni anayi eli waani?¹⁸ Kalivo mmohi owelite wi amuthithimihe Mulugu, ahili mwanaweedda ola?”¹⁹ Omwiirela: “Venya, odhowege nroromelo naawo nuhuyiliha.”*

Odha wa Omwene wa Mulugu

²⁰ Dhahipadduwa ayi, maFarizi yahimukohaga Yesu wi Omwene wa Mulugu onadha alini? Yesu ahawaakulaga, wiira: “Omwene wa Mulugu kunadha ni mukalelo wowooneya ni meento,²¹ athu kidha ewogaga: ‘Oli veva,’ naari ‘Ole oli vale,’ vowi Omwene wa Mulugu oli muwaari mwa nyo.”

²² Yesu ahawaaddela anamasuuza aaye, wiira: “Onofiya mudhidhi ona-funiginyu woona nlabo nimohi na Mwaana a Muthu; mwa malabo alene, kamudha moona.²³ Athu enodha yuwaaddelegen: ‘Oli va!’ naari ‘Oli wule!’ Kamuyewo naari kamwahare.²⁴ Vowi nlabo nnadha Mwaana a Muthu kanidha naanganyedheya onakale woona ozherima, onadheela odhulu omooneyelaga dhipaddi dhatedhene.²⁵ Mbwenye enofuneya wi vowambeela oliye arabulihive mwa dhego dhijinji, akooddiwe ni mulogo ola.

* ^{17:19} Naari nuhuuvulumusa

²⁶ “Dhapadduwile malabo a Nowe, teto sinapadduwe malabo a Mwaana a Muthu. ²⁷ Yooja, yoong'wa, alobwana yootela, ahiyana yooteliwa, ofiyedha nlabo navolowile Nowe mmwanddeyani. Vano odha mutokora waatolosa ateene.

²⁸ “Dhimohive dhedhi dhahipadduwa malabo a Lothi. Yooja, yoong'wa, yoogula, yooguliha, yoodhala, yoomaga nyuba dhijinji. ²⁹ Nlabo nendde Lothi naveyigiyi oSoddoma, odhulu wahirubwaga munddo, ni mabwe oohidda, waatolosa ateene.

³⁰ “Dhinadha dhiireye ndala nlabo noodha wiyooneyiha Mwaana a Muthu. ³¹ Nlabo nddo, onaakale odhulu wa nyuba, onadhe akite wi akumi-hemo dhookalana dhaaye dhili mba. Emodha-modhave onakale omudda, ahiwelele mundduli wi athukule yego. ³² Mbuwelele dha mwadha Lothi! ³³ Ole onafuna wing'anela egumi yaaye, onoyelela, vano ole onayelele onovulumusa. ³⁴ Ginowuwaadelani: Mahiyu ayene abiili enodha ekale vakamani; onodha athukuliwevo mmohi, ahiyiwevo mmohiwa. ³⁵ Ahiyana abiili enodha etidege vamohi, athukuliwevo mmohi, ahiyiwevo mmohiwa.”[†] ³⁶

³⁷ Vano, anamasuuza aaye yahimukohaga: “Dhineereye waani dhedhi, Nabwiyan?”

Yesu ahaakulaga, wiira: “Vevo vinaakale muruthu, fivevo teto vinatugumane mibidha.”[‡]

18

Musibe wa Maamukwele a Nitidi

¹ Yesu ahaawogela anamasuuza aaye musibe mmohiwa, vofuna wawaad-dela wi elobelege mudhidhi wateene ehhigomege. ² Eeraga: “Muluwani nimohi mwahikala namathonga miladdu ahamoova Mulugu, naari kamuri-ihia muthu. ³ Ahikalawo teto, maamukwele mmohi muluwani mwemule; adheesa wa oliye, awogaga, eeraga: ‘Mugithongele muladdu oli vaari va miyo ni mwiiddani aaga.’”

⁴ “Vahivira mudhidhi ahifunaga owoga. Mbwenye vadduliviwa ahiiraga yeeka: ‘Naari gihimoovaga Mulugu, naari gihimuriihaga muthu, ⁵ vowi mwihiyana ola onoginyagula, gineere gimuthongele muladdu waaye, wi onaadhe aginyagulegeve.’”

⁶ Nabwiya ahenjedhagave, eeraga: “Muhiwi madhu a namathonga muladdu gwalagwambi ole. ⁷ Mulugu kanaathongele mweebaribari oosakuliwa aaye, enamwebedha mahiyu ni mutana; naari viviraga malabo majinji ahinawaakule? ⁸ Ginowuwaadelani: Mulugu mowaaguva onodha athonge muladdu weewa. Mwa dhatedhene dhedhi adha adhaaga Mwaana a Muthu, onodha afwanye nroromelo elabo ya vati?”

Musibe wa MFarizi ni Namakoha-Musoko

⁹ Yesu ahenjedhagave, waawogela musibe ale yeeroromela, wi bohari-hamo malamulo a Mulugu, yaabeddaga athu amohiwa. ¹⁰ “Yaaligi alobwana abiili yahivolowaga nyuba ya Mulugu wi yalobele; mmohi aali mFarizi, mmohiya aali namakoha-musoko. ¹¹ MFarizi ageemelile, egi olobela mwa oliye yeeka, eeraga: ‘Mulugu, ginowutamalelani vowi kaginaligana ni

[†] **17:35** Dhoolebowa ni madada dhijinji kanna verisikulu 36 [‡] **17:37** Madhu ala enatapulea wi odha wa Mwaana a Muthu kudha orabuleya. Athu ateene enodha enone, avakuukuvu ni awoolapela enodha etugumanegi odha ogumana ni Oliye. Moone Mt 24:28; Ap 19: 21, 17:32; Gen 19:26.

athu amohi: anameeya, ohuroromeleya, aliba oraruwa, woona namakoha-musoko ola. ¹² Ginothuga dila bili vasumaanani, ginoveleela dhaneekumi mwa dhatedhene dhinapurimi.’

¹³ “Mbwenye namakoha-musoko ahiimelaga, volapelavene, naari kaafunaga othukulela meento aaye odhulu addwadhaga vathimarimani vaaye, eeraga: ‘Eee, Nabwiya Mulugu, mugeeddiwele thagaraga vowi gili namath-ega.’”

¹⁴ Yesu ahiiraga: “Ginowuwaaddelani wi namakoha-musoko ole ahiwele-laga vade vaaye agaleveleliwe dhoothega dhaaye, mmohiwa ole, naari. Ole oneere eyunuwihe onokitihwa, oneeyeviha onowunuwihiwa.”

Yesu ni Ahima

(Mt 19.13-15; Mr 10.13-16)

¹⁵ Athu yegi waadhana ahima ang'onong'ono wa Yesu wi aahidde areelihe. Anamasuuza yawooniligiwa ale, yegi wanyanyuwela.* ¹⁶ Mbwenye Yesu ahawithanelaga vaaligi Oliye anaahimaya, wiira: “Mwaahiyе edhe wa Miyo anaahima. Kamwaahihе, vowi Omwene wa Mulugu anya bi ale enaligana ni aliwa. ¹⁷ Ebaribareene, Ginowuwaaddelani: Ole ohunaakele Omwene wa Mulugu woona mwaana, kadha avolowamo.”

Yesu ni Muthu Ooreela

(Mt 19.16-30; Mr 10.17-31)

¹⁸ Mulobwana mmohiwa aali namathonga ahimukohaga Yesu: “Namasu-uziha apama, gineere ddi wi gikalena egumi yoohumala?”

¹⁹ Yesu ahimwaakulaga: “Onagiirelala ddi apama? Kalivo oli apama, apama di Mulugu, baahi. ²⁰ Ohaanona malamulo: ‘Kuraruve, kupe, kawi-ive, kumuratthele muthu, omurihege babo ni amaayo.’”[†]

²¹ Namathonga ahiiraga: “Wambeela ezombwe yaaga ginowiiresana dhatedhene dhdho.”

²² Yesu ageewile, ahimwiirelaga: “Yego emohi ehuuhaleela, ogulihe dhatedhene dhinniwsa, waavahe oorabula korowa dha, oneere okanna dhoreela odhulu. Vano odhe, ogharege.”

²³ Mbwenye oliye ageewile madhu ale, ahikukumuwaga, mwaha wowi aali oreela vajinji. ²⁴ Yesu agamoonile [wi ohukukumuwa vajinji][‡], ahiiraga: “Dhili dhoorusa vajinji oreela wi evolowe muMweneni wa Mulugu! ²⁵ Eli yookweya kamelo ovira mookupula mwa singano,[‡] ohiyana athu oreela ovolowa muMweneni wa Mulugu.”

²⁶ Ale yeewilege yahiiraga: “Dheera ndo, ki onavulumusiwе baani?”

²⁷ Yesu ahawaakulaga: “Dhihinandeya ni athu, dhinandeya ni Mulugu.”

²⁸ Vano Peduru ahiira: “Hiyo niihiya dhatedhene dhaanihuna wi nuhare-geni!”

²⁹ Yesu ahawaakula, eeraga: “Ebaribareene Ginowuwaaddelani wi kaliwo muthu onahiye nyuba yaaye, mwihiyanaaye, addibilaaye, ababiinya, naari anaaye, mwaha wa Omwene wa Mulugu; ³⁰ ohunaakele dhiinoveva vajin-jivene mookwaranya dhaaniyen;a; vano elabo enadha, egumi yoohimala.”

Yesu Onowelela Owoga dha Okwa Waaye ni Ovencyihiwa

(Mt 20.17-19; Mr 10.32-34)

* ^{18:15} Mukalelo wa aZhudewu omwihiidda muthu enatapulela odhivel.

† ^{18:20} Ex 20.12-16;

Dt 5.16-20 † ^{18:24} Dhoolebiwa nimadada dhimohi, kadhinadhana madhu owi: “ohukukumuwa vajinji.” ‡ ^{18:25} Naari muniintoni mwa singano

³¹ Yesu ahawithanelaga vowihivale kumi na biili, wiira: "Mwiiwe, nnadhowa oZheruzalemi. Wewo onaakwanelihiwe dhatedhene dhilebiwe ni anamavuhulela dhinawoga dha Mwaana a Muthu. ³² Oneere opelekiwa mmadadani mwa athu oode. ³³ Eneere omunyemula, omuruwana, omutaper a mare, ³³ omwaxula, empe. Vano nlabo na nethaaru oneere ovenya muukwani."

³⁴ Anamasuuza ale kayeewelelagamo yego mwa dhatedhene. Dhatapule-laga madhu ala yaaligi oowipiteya, kayanonelagamo dhawogigiy.

Oolabaloba Ohoona Onowelihedhiwa Woona (Mt 20.29-34; Mr 10.46-52)

³⁵ Dhahipadduwa Yesu aaddamelaga oZheriko, wahikala muliba ohoona akaratilege waaddamela mundila, alobaga wa athu yowikamihedhana. ³⁶ Ageewile musiddo wa anamwinji yaviraga, ahikohaga eneereya si ddi. ³⁷ Yahimwaadelaga: "Yesu oNazareti dinavira."

³⁸ Vano oliye ahikuwaga: "Yesu, Mwaana a Davidi, mugeeddiwele thagaraga!"

³⁹ Ale yadhowaga osogolo wa Yesu yomwihihaga wi amaa, mbwenye ookuwagave ni ntidi: "Mwaana a Davidi, mugeeddiwele thagaraga!"

⁴⁰ Vano Yesu ahiimelaga, wawiirela wi emudhowena va Oliye. Agafiyile, Yesu ahimukohaga: ⁴¹ "Onafuna Guwiirele ddi?"

Oliye waakula: "Nabwiyani, ginafuna giwelele woona."

⁴² Yesu ahimwiirelaga: "Woona waawo owelele! Nuyilihile thi nroromelo naawo." ⁴³ Mowaaguva ahambeela woona; omuharaga, amutamalaga Mulugu. Athu ateene egoonile nde, teto yoomitamalaga Mulugu.

19

Zakeyu Namakoha-musoko

¹ Yesu ahifiya oZheriko, aviraga muluwani mule. ² Mwahikala muthu mmohi oreela mmohi eeriwa Zakeyu, mpogo a anamakoha-musoko. ³ Oofunesesaga omoona Yesu baani, mbwenye kaakwanihilege ni winjiva wa athu, vowi aali ookwiva. ⁴ Nuwindo, ahithamagelaga osogolo, ogwela munthazani wi amoone, vowi Yesu aavira vevale vaaligiye.

⁵ Yesu agafiyile mburo olene, ahisugwaga odhulu, omwiirela: "Zakeyu, kita mowaaguva. Vowi soofuneya peeno wi Gikale vade vaawo." ⁶ Oliye ahikitaga mowaaguva, omwaakela ni ohagalala.

⁷ Ateene yoonilege nde, yomwaabaga yiiraga: "Oliye ofiyedhe vade va 'namathega.'"

⁸ Nuwindo Zakeyu ahiimelaga, omwiirela Nabwiya: "Ginogawa vaari dhoreela dhaaga gaavahe oorabula. Akala gihimwiiyela muthu, gino-muwelihedha dila nayi okwaranya dhamwiyyelimi."

⁹ Yesu ahimwiirelaga: "Peeno ovulumusa ohufiya vade va, vowi ola teto di mwaana a Abarahamu. ¹⁰ Vowi, Mwaana a Muthu odheelee wasayela ni wavulumusa orimeela."

Musibe wa Korowa Kumi

¹¹ Yesu ahawogelaga musibe mmohi wa alene yamwiwaga Oliye nde dha-wogigiy, vowi aali vakuukuvi ni oZheruzalemi, mwa ela aliwa yoobuwela wi Omwene wa Mulugu weere ofiya mowaaguva. ¹² Nuwindo Yesu wiira: "Muthu mmohi a nlogo noovuweya ahidhowa elabo emohiya woolapa wi

avahiwe omwene endo awelewo. ¹³ Ahawiithanaga amwiimeleli aaye kumi, waavaha korowa kumi, wiira: ‘Mmwiiregena nagooso ofiyedha ginaweliwo.’

¹⁴ “Mbwenye athu a elabo ele yoomugana, yahaaruma mundduli mwaaye arumiwi wi yamwiirele: ‘Hiyo kannafuna wi anithongege.’

¹⁵ “Vano oliye aweliliyewo, agavahiwe omwene. Ahawiithanaga amwiimeleli alene yaavahiliye korowa, wi anone dhipurilisu.

¹⁶ “Ahidhaaga owambeela, wiira: ‘Nabwiyan, korowa dheenyu nde, gipurilemo dhimohi kumi.’

¹⁷ “Nabwiye ahimwaakulaga, wiira: ‘Dhihikala pama, oli mwiiemeleli apama; mwaha wi ohooneyihia ororomeleya ni dhooyeva, onodha waathonge maluwa kumi.’

¹⁸ “Ahidhaaga mwiiemeleli anabiili, eeraga: ‘Nabwiyan, korowa dheenyu nde, gipurilemo dhimohi tanu.’

¹⁹ “Nabwiye ahimwiirela teto ni olena: ‘Onodha waathonge maluwa matanu.’

²⁰ “Odha vevale mwiiemeleli mmohiwa, eeraga: ‘Nabwiyan, korowa yeenyu ela, galogohiliimi gamagile mu lesoni. ²¹ Miyo gowuwoovani, vowi nyu muli muthu oorusa. Munovenyihavo elene muhuhelilinyovo, ni ohadda nde muhudhalilinyu.’

²² “Nabwiye ahimwaakulaga, wiira: ‘Mwiiemeleli abure! Ni mwaha wa vamulomoni vaawo ginowukona. Wahinona wi miyo gili muthu oorusa, ginovenyihavo gihihelilimivo ni ohadda dhihidhalilimi. ²³ Ki mwahaya bwa ddi odhe ohuhelege obanko korowa yaaga, wi miyo gawelawo gaakele mowenjedhedhuya?’

²⁴ “Vano ahawiirelaga ale yoonelaga: ‘Mwaakeni korowaya mumvahe olene winna kumi.’

²⁵ “Aliwa yahimwaakulaga: ‘Nabwiyan, oliye ohukanna dhimohi kumi!’

²⁶ “Oliye ahimwaakulaga: ‘Miyo Ginowuwaaddelani wi olene winna, onowenjedhedhija; mbwenye ole ohinna, elene yiniyena onowaakiwa.

²⁷ Mbwenye amwiiddani alene yahafunile wi miyo gaathonge aliwa, mwaadhena wuno mwaape vameentoni vaaga!’”

Ovolowa ni Ovuweya

(Mt 21.1-11; Mr 11.1-11; Zhu 12.12-19)

²⁸ Vano Yesu agawogile nde, ahisogolaga odhowa oZheruzalemi.

²⁹ Dhahipadduwa wi yaaddamelaga oBetifazha ni oBetaniya, vakuukuvi ni Mwango wa Olivera, ahaarumaga anamasuuza aaye abiili, ahawiirelaga:

³⁰ “Dhowani mmavade a mmiganoni mwemule, mwavolowaga, munomfwanya buuru agamageleliwe ohunagweliwe ni muthu. Mmutapule, mmudhena. ³¹ Mmohiwa onookoheni, eera: ‘Munamatapulela ddi?’ mmwaakule, mwiire: ‘Nabwiya dinamfuna.’”

³² Vano edhowaga ale yarumiwege, yahimfwanyaga woona mwemule mwawaaddelege Yesu. ³³ Aliwa emutapulaga buuru, anyaya yahiiraga: ‘Munamatapulela ddi?’

³⁴ Aliwa yahawaakulaga, wiira: “Mwaha wi Nabwiya dinamfuna.”

³⁵ Nuwindo yahimudhaagana, otadeela dhoowara vadhulu vabuuru ole, omwiirela Yesu wi amugwele. ³⁶ Yesu adhowaga, athu yootadeelaga dhoowara mundila.

³⁷ Vano aaddamelaga mukitakita wa Mwango wa Olivera, anamwinji ateene, anamasuuza, yoolupaga mohagalala, ni madhu omutamala Mulugu, mwaha wa dhotikiniha dhatedhene nde dhooniliwa, yiiraga:

³⁸ “Oreelihiwa di mwene ole onadha
mu ndina na Nabwiya!¹”

“Murenddele okale odhulu
nthithimihio nikale wa Mulugu Mudhulu-dhulu!”

³⁹ Vevale, maFarizi amohiwa yahimwiireлага vaari va anamwinji: “Nama-suuziha, mwamaalihe anamasuuza eenyu!”

⁴⁰ Mbwenye Yesu ahawaakulaga: “Ginowuwaaddelani wi aliwa yamaala, mabwe binakuwege.”

Yesu Onamunddela Zheruzalemi

⁴¹ Yesu aaddamelaga oZheruzalemi, agoonile nluwa, ahinddaga, ⁴² eeraga: “Eee! Peeno akalagahi wahnona mwa we weeka, dhego dhinavaha murenddele. Mbwenye dhiinova nda dhili dhologoheya vameentoni vaawo. ⁴³ Vowi enodha malabo amwiiddani aawo enoorijiwa ni miliddi dhothawelamo, ni waapeliha dhipaddi dhatedhene yuthiyelelena. ⁴⁴ Eneere wutolosa we ni anaawo ateene. Vowi kandha niiyiyiwa nibwe nimohi vadhulu va nibwe nimohi, mwaha wi kunonile mudhidhi olene wadhiile Mulugu wi ovolumuse.”

Yesu Onowomihedha Nyuba ya Mulugu (Mt 21.12-17; Mr 11.15-19)

⁴⁵ Vano, Yesu avolowaga vathaddo va nyuba ya Mulugu, ahambeelaga wawiigara yagulihaga. ⁴⁶ Ahawaaddelaga: “Dhihilebiwa: ‘Nyuba yaaga enakale nyuba ya malobeloo.²’ Mbwenye nyo muhusaddula okala nikungu na ambava.³”

⁴⁷ Yesu oosuuzihesa munyuba ya Mulugu malabo mateene. Mbwenye apogo a anamakutha, anamasuuziha a malamulo, ni asogoleli a athu yoo-funa empe. ⁴⁸ Mbwenye kayanna yowiira, vowi athu ateene yoodhiveliwa vanjinjivene yavuruwanaga madhu aaye.

20

Yesu Onokohiwa dha Othonga Waaye (Mt 21.23-27; Mr 11.27-33)

¹ Nlabo nimohi mwa mudhidhi, Yesu, asuuzihaga nlogo munyuba ya Mulugu, alaleyaga Muselu Wapama, yahimudheelaga apogo a anamakutha ni anamasuuziha a malamulo, vamohi ni makolo a mutugumano. ² Yahimukohaga, wiira: “Onaaddele, odhiilena waani othonga? Wuvahile othonga wula baani?”

³ Yesu ahaakulaga, wiira: “Miyo teto Ginowukohani yego emohi. Mugaddele: ⁴ Amvahile owodha Zhuwawu dha obathiza aali Mulugu, yaali athu?”

⁵ Vano aliwa yegi waaddelana mmohi ni mmohiwa, yiiraga “Neera: ‘Mulugu,’ Oliye onowiira: ‘Mwaha mudhe muhumurumeedhege?’ ⁶ Vano nehi niire: ‘Waali wa athu,’ athu ateene enofiyedha onipa ni mabwe, vowi mmurimani mwewewa enolibihedha wi Zhuwawu aali namavuhulela.”

⁷ Omamalelowa, yahaakulaga, wiira: “Kannonile.”

⁸ Vano, Yesu ahawaakulaga: “Miyo teto kaginowaaddelani ni othonga baani Gineerimina dhego nda.”

Musibe wa Anamalima (Mt 21.33-46; Mr 12.1-12)

¹ 19:38 Sal 118.26 ² 19:46 Es 56.7 ³ 19:46 Zher 7.11

⁹ Nuwindo, Yesu ahawogelaga athu ale musibe ola: “Mulobwana mmohi ahilima mudda aaye wa mvidera, ahaahiyedha anamalima, oliye ovenya veelaboni vale odhowa elabo emohiwa, ahikala wewule mudhidhi woolapelen. ¹⁰ Ogaifyile mudhidhi wovaha furuta, ahimuruma mwiimeleli aaye wa anamalima ale wi yamvahewo furuta dha mmuddani mule. Mbwenye anamalima ale yahimuddwadhaba, omuweleliha mundduli ahinna yego. ¹¹ Nuwindo ala ahimuruma mwiimeleli mmohiwa, mbwenye teto ni olena yahimuddwadha, omwiirela dhabure, omuweleliha mundduli ahinna yego. ¹² Nuwindo ahimuruma anethaaruya, teto ni olena yahimporsa, omvokedha okwibi.

¹³ “Vano, muliba mudda ole ahiira: ‘Gineere ddi? Gimurume mwaanaga ginamudhivelimi, mwaagahi ola kimuriha?’

¹⁴ “Anamalima ayo egamoonile, yahaddelanaga mmohi ni mmohiwa. Yiiraga: ‘Ola di namavolowa mba, nimpeni, wi dhoreeladha dhidhe dhikale dheeuhu.’ ¹⁵ Yahimvokedhaba ode, ompa. *

“Muliba mudda, onawiirena avi? ¹⁶ Oliye onodha, aatolose anamalima ale, aavahe amoheene muddaya.”

Athus egeewile nda, yahiraga: “Dhi kadhinapadduwa!”

¹⁷ Vano, Yesu ahaasugwaga, wiira: “Yootapulelaya siddi maleba ala eni: ‘Nibwe nenddo nakooddile anamamaga nyuba,
ndda nihidha osadduwa okala nibwe nohiddeela nyuba?’†

¹⁸ Olene onatongwele nibwe nddi, onogwaddanyeya; vano ole nnammore-liwa nibwe nddi, onotaateleya.”

¹⁹ Wora emohive elene, anamasuuziha a malamulo, ni apogo a ana-makutha yoomusayelaga wi emwihidde, vowi yahiiwaga wi musibe ole, aasibaga aliweene. Mbwenye yowawoovaga athu.

Opeleka Musoko wa Sezari (Mt 22.15-22; Mr 12.13-17)

²⁰ Vano yoomuhara-hara, yahaaruma athu yanna mukalelo woona oo-har-ihamo, wi yamuwage muwanu, emwihidde, yampeleke mu othongi wa kuminadori. ²¹ Vano, yahimukohaga, wiira: “Namasuuziha, nihinona wi munowoga, munosuuziha mowogowamwene, kamwinna nsakulo wi ola baani, munosuuziha dila ya Mulugu ni ebaribari. ²² Dhinorumedheya, naari kadhinarumeedheya wi nipelekege musoko wa Sezari?”

²³ Mbwenye Yesu vonona onaabure weewa, ahawaakulaga:
²⁴ “Mugoonihe korowa ya gwingwi emohi. Kove elivo sa wani? Ki ndina nilebiwevo tha wani?”

²⁵ Vano, yahaakulaga: “Ya Sezari.”
Yesu ahawiirelaga: “Mumvahege Sezari eli ya Sezari, Mulugu eli ya Mulugu.”

²⁶ Kayoonile yomwihibitedana mmadhuni vameentoni va athu. Vano motikiniheya ni dhowaakula dhaaye, yahimaalaga.

Ebaribari Yovenyihiiwa Muukwani (Mt 22.23-33; Mr 12.18-27)

²⁷ ASaduseyi amohiwa, ayene yaharumeedha wi ohukalawo ovenyihiiwa muukwani, yahimwaaddamela Yesu. ²⁸ Yahimukohaga, wiira: “Namasuuziha, Mozezi ohunilebelaa nlamulo niiriliye wi akwa ddibila ammohiwa, akala

* ^{20:15} Mukalelo wa aZhudewu yalima mudda yoowabela cinga.

† ^{20:17} Sal 118.22

ahitela amwihiya mwihiyana, ahibalana ahima; ddibilaye amutele maa-mukweleya wi ambalihedhe aana a addibilaye ole.²⁹ Vowi yahikalawo addibila atanu ni abiili. Owambeela otela, okwa, ahibalilena ahima.³⁰ Anabiili,³¹ anethaaru, emodha-modhave atanu ni abiili ala yahikwa ehimbalihedhe ahima.³² Teto omakuthulowa mwihiyana ole okwa.³³ Mwihiyana ola nlabo novenyihiwa muukwani, onaakale mwadha wani, vowi atanu ni abiili ala yahimutela?”

³⁴ Yesu ahawaakulaga, wiira: “Athu eli elabo ya vativano enotela, enoteliwa.³⁵ Mbwenye ale enakale oofwanelela ofiya elabo enadha eyo, vovenyihiwa muukwani kawuli otela naari oteliwa.³⁶ Vowi kinaakwege, enaakale woona angero. Vano enakala ahima a Mulugu, mwaha wovenyihiwa muukwani.³⁷ Mozezi ahiwoga wi anookwa enovenyihiwa, vawogiliye thalako ya nikupu nahiddaga munddo, veriliye wi Nabwiya di, ‘Mulugu a Abarahamu, Mulugu a Ezaaki, Mulugu a Yakobo.’³⁸ Mulugu kahuwo Mulugu anookwa, di Mulugu athu ookalawo. Vowi wa Oliye ateene ehikanna egumi.”

³⁹ Vano, amohiwa mwa anamasuuziha a malamulo yahiira: “Namasuuziha, muhaakula pama!”⁴⁰ Egeere ndo, yowoovaga omukoha dhimohidhiwa.

Kirixtu di Nabwiya a Davidi

(Mt 22.41-46; Mr 12.35-37)

⁴¹ Vano Yesu ahaakohaga, wiira: “Dhinawogeliwa ddi wi Kirixtu di mwaana a Davidi?⁴² Vowi mwinyeene Davidi ohuwoga mManiivuruni a Masaalimu wiira:

“Nabwiya ohuwoga
wa Nabwiya aaga:
Okaraati omoononi-waaga-wooja,
⁴³ ofiyedha Gaasaddule
amwiiddani aawo
ekale vonyingala
manyalo aawo. §”

⁴⁴ Ki akala Davidi onowiithana ‘Nabwiya.’ Onadha addi okala mwaanaye?”

⁴⁵ Athu ateene emvuruwanaga, Yesu ahawaaddelaga anamasuza aaye:
⁴⁶ “Pole-pole ni anamasuuziha a malamulo. Aliwa enodhiveliwa owara dhoowara dhoolapa,* enodhiveliwa vajinjivene olojeliwa mmamisika. Munyuba dha malobel, enothamagela dhittengu dhowambeela, mburo dhowambeela mmathangani.⁴⁷ Aliwa enowaaka mowaaguva nyuba dha amaamukwele aahiyana, ni wawiiyela dhookalana dheewa mohukalana manyazo, enolobel a moolapiha, mowapela malango. Athu ala enodha yoonihiwe goyi yulubale waakwaranya amohi.”

21

Yoovaha ya Maamukwele a Mwihiyana

(Mr 12.41-44)

¹ Yesu ahisugwaga, wawoona aliba oreela evokedhaga yoovaha mukaxani mwa korowa ya nyuba ya Mulugu.² Ahimoonaga maamukwele a mwihiyana oorabula, ahivokedhagamo korowa biili dhing'onong'ono.

³ Vano ahiiraga: “Ebaribareene, Ginowuwaaddelani wi maamukwele a

‡ 20:37 Ex 3.6 § 20:43 Sal 110.1 * 20:46 Naari mukanjo

mwihiyana oorabula ola, ohuvaha vajinji waakwaranya ateene. ⁴ Mwaha wi ala ehivaha woona yoovaha mothapa. Mbwenye ola, moorabulani mwaaye, ohuvaha dhatedhene dhanniyena dhafuniya wiikamihedhana.”

*Etonyihedho ya Makuthulo wa Mudhidhi
(Mt 24.1-35; Mr 13.1-31)*

⁵ Anamasuuza amohiyo yoowogaga dha mukalelo womageya nyuba ya Mulugu, moowomihedhela ni mabwe apama ni mivaho dha nyuba ya Mulugu. Yesu ahiraga: ⁶ “Nyo munooona dhego nda? Enofiya malabo oneeriwa ohukale nibwe vadhlulu va nibwe, nikwe nihinabidhuliwe.”

⁷ Yahimukohaga, wiira: “Namasuuziha, dhinapadduwa alini dhedhi? Ki etonyihedho baani enadhe ekalewo, dhego nda, dhadha dhaakwanelihi-waga?”

⁸ Yesu ahawaakulaga, wiira: “Pole-pole wi munadha munyengethiwe. Ajinji enodha edheege mundina naaga, yiiraga: ‘Miyo gili oliyeene,’ teto enodha yiirege: ‘Mudhidhi ohaaddamela.’ Ala, munadha mwahare! ⁹ Mudha mwiliwaga dha koddo, ovenyedhana; muhoove. Enofuneya vowambeela dhipadduwe dhego nda, mbwenye omagomelo kunafiye.”

¹⁰ Vano ahawaaddela: “Mulogo onodha ovenyedhane ni mulogo mmohi, omwene ni omwene omohi. ¹¹ Onodha okalewo othikeya wulubale wa elabo, ni dala ni dhiredda woona thoba mburo dhohiyana-hiyana, dhoopaduwa dhowoopiha dhulubale, ni dhitonyihedho dhulubale dhodheela odhulu.

¹² “Dhhineereye dhego dhatedhene nda, enodha yuhiddegeni ni wurabulihani. Yuuthukulelegeni omuladduni munyuba dha malobel^{*} ni wufugelani mukaambura. Munodha mpelekiwege vameentoni va amwene ni makuminadoro, mwaha wa ndina naaga. ¹³ Nda dhinodha dhupadduweleleni wihina mugirele onamoona. ¹⁴ Mulibe murima kamukathamiheyeye yoofuna waakula. ¹⁵ Vowi Miyo Ginodha Guvaheni madhu ni ononelamo wi amwiiddani eenyu kidha ekooddha naari ovaanya. ¹⁶ Ababiinyu, addibiliinyu, amudhiinyu ni akwiinyu enodha yuupelekegeni. Amohiwa mwa nyo enodha epiwe. ¹⁷ Ateene enodha yuwiiddegeni mwaha wa ndina naaga. ¹⁸ Mbwenye kamudha myeleta naari nthithi nimohi na mmuruni mweenyu. ¹⁹ Mwelibihedhagave, munodha mpure egumi yeenyu.

²⁰ “Teto, mudha mmoona Zheruzalemi arijiwa ni anyakoddo, munone wi obwanyuliwa waaye ohaaddamela. ²¹ Vano, ale enakale muZhudeya, ethhawelege mmwangoni; ale enadha ekale muluwani, ekumemo; ale enadha ekale mmamidda, enadha evolowe muluwani mwa. ²² Vowi malabo ayo enadhe, ekale malabo agoyi wi dhaakwanele dhatedhene dhilebiwe. ²³ Malabo ayo enodha ekale owoophia wa ahiyana alene enakalena wari, ni owaamwiha! Vowi onodha okale goyi, okubanya wulubale mwilaboni ya vati, ni owali wa Mulugu wa athu ala. ²⁴ Enodha epiwege ni masupadda, amohi enodha ecedheliwege dhilabo dhatedhene. Athu oode enodha emuyingalele Zheruzalemi ofiyedha waakwanelia mudhidhi wa athu oode ale.

²⁵ “Onodha wooneye dhitonyihedho vanduwani, vamweerini, ni vattenderini. Veelaboni ya vati vinodha vikale masoso, ni makattamiho wa athu a milogo, othusiwa ni okukuma wa mahinje a mbara ni kuluzi.

* ^{21:12} nyuba dha malobel^{*} nda, dheeriwa sinagoga, mabasa eewa kayaali olobelaamove, naari osuuzamo malamu, mbweye teto yowathongamo athu yahaharihamo malamulo e aZhudewu

26 Athu ateene enodha ehileyege ni woova yubuwelelaga dhinafuna opad-duwa mwiilaboni, vowi kopolo dhoodhulu dhinodha dhithikeye. **27** Vano, munodha mmoone Mwaana a Muthu adhaaga vamuraboni ni owotha ni nthithimihio nuulubale. **28** Mwadha moona dhipadduwaga dhego dhedhi libani mirima, muthukule kove dheenyu vowi wooboliwa weenyu ohaad-damela.”

29 Yesu ahawaaddela musibe mmohi, wiira: “Mwamoona namutambwi† ni mithanko dhimohi. **30** Dhambeela opwedheya, nyo munonona wi elimwe ehaaddamela. **31** Mwadha moona dhego dhedhi dhiireyaga, munone wi Omwene wa Mulugu ohaaddamela.

32 “Ebaribareene dhatedhene dhedhi dhineere opadduwa, athu amohiwa eliwo mudhidhi olena ehnakwe. **33** Odhulu ni elabo ya vati dhinodha dhimale, mbwenye madhu aaga kidha emala.

34 “Pole-pole, mirima dheenyu dhhikale dholodhowa ni mathanga, olezelia ni ozuzumela dha elabo ya vati, wihina nlabo nenddo nnodheeleni morurumusa woona musapa. **35** Vowi nnodha nadheele athu enakala elabo yateene ya vati. **36** Mwiyig’anele mudhidhi wateene, ni olobela mwaha wi mukalenka kopolo dhorabelana dhego dhatedhene dhineereyege, ni wiimela vameentoni va Mwaana a Muthu.”

37 Yesu oosuuziha malabo mateene munyuba ya Mulugu. Mbwenye vakala mahiyu ookuma, odhowa okalaga oMwangoni wa Olivera. **38** Vano athu ateene yoodhowa bebeheene wi yakale ni Oliye munyuba ya Mulugu wi yamwiiwege.

22

Wiiwananeliwa

1 Mudhidhi wa mathanga a mikaathe dhohukanna emela, yeeriwa Paxkwa waaddamelaga. **2** Apogo a anamakutha ni anamasuuziha a malamulo yoosayelaga mukalelo wowi empe Yesu, mbwenye yowawoova athu. **3** Vano Sathana ahivolowa mmurimani mwa Zhuda, eeriwa Esikariyothi, mmohi wa kumi ni abiili. **4** Oliye ahidhowa wa apogo a anamakutha, ni ale yaang’anelia nyuba ya Mulugu wi yeewananele mukalelo wompeleka Yesu. **5** Aliwa yahidhiveliwa, wiiwananelia omvaya korowa. **6** Oliye orumeedha, osayelaga mudhidhi wompeleka anamwinji ehilivo.

Yooja ya Nabwiya

(Mt 26.17—35; Mr 14.12—31; Zhu 13.18—30; Zhu 13.36—38)

7 Vano nigafiyile nlabo na mathanga a mikaathe dhohukanna emela, vapiwa mwaana nibila a mukutho wa Paxkwa. **8** Yesu ahimiruma Peduru ni Zhuwawu, eeraga: “Kaweni mwasasanyedhe dhooja dha Paxkwa wi nije.”

9 Aliwa yahimukohaga, wiira: “Munafuna nasasanyedhe dhoojadha waani?”

10 Yesu ahawaakula, wiira: “Mwavolowaga muluwani, muneere omfwanya mulobwana mmohi agathukulile muno wa mahinje. Mmuharege vade vineeriye avolowe. **11** Mmukohe mwiinya a vade, mwiire: ‘Namasuuziha wiire: Suubi owi Gijelemo mathanga a Paxkwa ni anamasuza aaga oli waani?’ **12** Oliye onowuwoonihani suubi mulubale a vadhlulu, mwemo muli dhatedhene dhoofuneya vamathangani. Musasanyedhemu dhoojadha.”

13 Aliwa edhowaga yahifwanya dhatedhene woona mwawaaddelege Yesu, osasanyedha mathanga a Paxkwa. **14** Vano mudhidhi ogaakwanile,

† 21:29 Naari namutambu

Yesu ahikaratigi vameeza vamohi ni arumiwi aaye. ¹⁵ Ahiwogaga, wiira: “Ginofuna vajinjivene wi nimuje vamohi Paxkwa ola dhihinafiye dhoovoreya dhaaga. ¹⁶ Ginowuwaaddelani wi kagidha Gimuja mmohi ofiyedha aakwanelihive muMweneni wa Mulugu.”

¹⁷ Ageere ndo, ahithukula nakoma a vinyu, ovahedha mahala, wiira: “Mwaakeleni, mmugawane mwateene mukaleliinyu. ¹⁸ Ginowuwaaddelani wi kagidha Ging'wa, dhoovaha dha muthanko wa uuva* dila emohi ofiyedha odha Omwene wa Mulugu.”

¹⁹ Vano ahithukulaga mukaathe, ovahedha mahala, ogwaddanya, waavaha, wiira: “Ola bu mwili waaga onavahiwa wa nyo; mwiiregena ndo moogubuwelela.”

²⁰ Ni mukalelo wankeene, egamalile oja, ahimuthukulaga nakoma, wiira: “Ola di nakoma owaandana wuxa wa mwazi waaga, onavuuvela wa nyo.

²¹ “Mbwenye moone muthu ole onafuna ogiguliha oli ni miyovano vameeza veva. ²² Ebaribareene, Mwaana a Muthu, oneere opiwa woona mwafuneyeliwa, mbwenye oneere woona muthu oyene onagigulihe!”

²³ Vano arumiwi yahambeelaga okohana vakaleligisu, yiiraga mwa aliwa, wi eerena dhendo baani.

²⁴ Teto wahikalaga ovaanyihana vakaleligisu, yiiraga wi mwa aliwa aali oofuneya baani. ²⁵ Yesu ahawaaddela, wiira: “Mamwene a athu oode enowaathonga athu eewa; ale enaathonga eneeriwa anameerana dhapama.

²⁶ Mbwenye, nyo kamunaakale ndo. Mohiyanika, mpogo mwa nyo onaakale woona mung'ono. Vano ole onasogolela onakala woona ole oneemelela.

²⁷ Ki oofuneya baani: di ole oli vameeza naari ole oneemelela? Kahuwo ole onaja vameeza? Mbwenye Miyo Gili vaari va nyo woona ole oneemelela.

²⁸ Nyo muli alene munakalave ni Miyo moweehiwani mwaaga. ²⁹ Woona ababa egisakulele Omwene, Miyo Ginowusakulani; ³⁰ wi mujje, mung'we vameeza vaaga muMweneni mwaaga, muneere okaraati mwiittenguni, wi mwaathonge malogo kumi ni meenddi a Ezarayeli.”

³¹ Teto Yesu ahiwogaga, wiira: “Simawu, Simawu, woone, Sathana ohuwaddihedha wi oveetteni woona tirigu.[†] ³² Mbwenye Miyo Guhuulobelela wi nroromelo naawo nihithime. Wadha otthwaruwa, waalibihe addibili.”

³³ Mbwenye Peduru ahaakula, wiira: “Gili owimeleene odhowa ofugeliwa ni nyo, ofiyedha okwa.”

³⁴ Mbwenye Yesu ahaakula, wiira: “Miyo Ginowuwaaddela Peduru, peeno veva, mutubi ahineebi ‘kokoliko,’ onogikoodda dila thaaru wiiraga wi kuginonile.”

³⁵ Vano, Yesu ahaakohaga anamasuuza aaye, wiira: “Voorumilimini voolenddoni Giiraga wi kamuthukule thumba na korowa, naari thumba na olenddo, naari sapatho; yahikalavo yohaleeleni?”

Aliwa wiira: “Kanahaleeliwe yego.”

³⁶ Oliye wawaaddela, wiira: “Mbwenye dhiinova, winna thumba na korowa, athukule; ni thumba na voolenddoni; ole ohinna supadda, agulihe yowiikunelana yaaye wi agulena naaye. ³⁷ Ginowuwaaddelani, enofuneya dhigipadduwele dhendo dhilebiwe: ‘Wi oliye oneere otaganyihediwa ni anameerana dhabure.’[‡] Ebaribareene dhatedhene dhinawoga dha Miyo dhinofuneya dhaakwanelihive.”

* ^{22:18} Yovaha eng'onong'ono ela enowiliha wi asasanyiwe vinyu. tirigu, ofwanafwana woona ovethiwa wa mbuga.

† ^{22:31} Ovethiwa woona

‡ ^{22:37} Es 53.12

³⁸ Aliwa yahimwiireлага: “Nabwiyani, nihikanna masupadda meenddi ala!” Waakula, wiira: “Baahi, ehaakwana.”

*Yesu Onoolobela va Mwaangoni wa Olivera
(Mt 26.36-46; Mr 14.32-42)*

³⁹ Vano ahivenyaga odhowa oMwangoni wa Olivera, woona molemeelela, ni anamasuuza aaye vamohi. ⁴⁰ Egafiyile mburo, wasakuliwe, ahiiraga: “Lobelani, mulobaga wi munamorele moweehiwani.” ⁴¹ Ahisusaga vang'ono, olapelawa woona vinamorela nibwe muthu avoka, ahikokoraga, wambeela olobela. ⁴² Alobelagave, ahiiraga: “Babani, mwafuna Girabeliheni nakoma a masoso ola; mbwenye ohiireye ofuna waaga, wiireye ofuna weenyu.” ⁴³ Vano mungero oodhulu ahimoneyela wi amulibihe mmurimani. ⁴⁴ Yesu agali immasosoni, oolobelagave ni kopolو. Nikurumela naaye naaligi woona mathotho a mwazi waddonddelaga vati. §

⁴⁵ Agamalile olobela, ahivenyaga, owelawo omburoni waaligi anamasuuza; aafwanyilege egonaga, vowi okubanya weewa wahithabwaga. ⁴⁶ Oliye wiira: “Munagonela ddi? Mvenye, mulobele wi munamorele moweehiwani!”

*Ohiddiwa wa Yesu
(Mt 26.47-56; Mr 14.43-50; Zhu 18.1-11)*

⁴⁷ Yesu awogagave, yahifiyaga athu ajinjeene ni mmohi wa anamasuuza kumi ni abili, eeriwa Zhuda, aaligi vasogolo. Ahisusedhaga vaaligi Yesu wi amulojele ni bezhu. ⁴⁸ Yesu owoga ni oliye, wiira: “Zhuda, onafuna omugulihe Mwaana a Muthu ni ombezhari?*”

⁴⁹ Vano anamasuuza a Yesu yamwapelelege vevale yoonaga dhafunaga opadduwa, yahimukohaga: “Nabwiya, munofuna naaporose ni masupadda eehu athu ala?” ⁵⁰ Mmohi ahikumihaga supadda, omporosa mwiimeleli a mpogo a anamakutha. Ompadha nibaru na omoononi wooja.

⁵¹ Yesu waahiha, wiira: “Baahi! Iyanil!” Oliye okahinya nibaru ovoliha.

⁵² Vano Yesu ahiwogaga ni apogo a anamakutha, anamaang'anela a nyuba ya Mulugu ni makolo a mutugumano, yadhiilege wi emwihidde, wiira: “Nyo munadha ni masupadda, ni golomonddo wi mugihidde. Wiirege Gili mbava? ⁵³ Malabo mateene Gakala ni nyooovo nyuba ya Mulugu, mbwenye kamugihiddile. Mudhidhi ola bweenyu. Si kopolو dha mwipipini.”

*Peduru Onomukoodda Yesu
(Mt 26.69—75; Mr 14.66—72; Zhu 18.15—18; Zhu 18.25—27)*

⁵⁴ Vano egamwihiddile Yesu, yahimudhowana vade va mpogo a anamakutha. Peduru egi waahara voolapelavene. ⁵⁵ Yahitubaanyaga muunddo vaari vattaddo egakaraatile ateene, Peduru ahifiyaga mburo olene, okeraati ni aliwa. ⁵⁶ Mwiimeleli mmohi amwihiyana ahimoonaga Peduru vakaratiliyiye vooneyelaga muundd. Omusugwesesa Peduru, wiira: “Mulobwana ola akala ni’Oliyeene!”

⁵⁷ Mbwenye Peduru okooddaga, eeraga: “Asaa! Mwihiyana we, miyo kagimunile.”

⁵⁸ Vigavirile mudhidhi vang'onove, mwiimeleli mmohi agamoonile, ahiiraga: “Teto we oli mmohi mwa aliwa.”

Peduru wiira: “Mulobwana we miyo kagili.”

§ **22:44** Dhoolebiwa nimada dhimohi, kadhinadhana verisikulu nda 43 ni 44. * **22:48** Olojela omohi

59 Vigavirile mudhidhi wowaakwana wora emohi, muthu mmohiya ahikaleлага ntidi, eeraga: “Ebaribareene ola aali ni Oliyeene, vowi mu-Galileya.”

60 Mbwenye Peduru ahikaleлага ntidi okoodda, eeraga: “Mulobwana we, miyo dhinawogiiwe, kaginonile!” Awogagave ndo, mutubi ahiibaga.

61 Nabwiya ahirugunuwaga, omusugwesa. Peduru wuubuwela madhu yamwaaddelile Nabwiya: “Owi peeno veva mutubi ahineeb, onogikoodda dila thaaru.” **62** Vano Peduru ahivenyagavo, odhowa wuunddaga ni okubanya wulubale.

Anyakoddo Enombedda Yesu.

63 Alobwana yamwaang'anelaga Yesu yoombeddaga emuddwadhaga.

64 Yoomukuneelaga meento, yiiraga: “Ovuhulele! Wuddwadhile baani?”

65 Yoomuwogelaga dhego dhijinjidhene emunyemulaga.

Yesu Agali va Pilatu ni Heroddi

66 Ode ogasile bebeheene, makolo a mutugumano a mulogo wa Ezarayeli, apogo a anamakutha, ni ale yasuuziha malamulo yahitugumanaga, omuthukula Yesu omudhowana omuthegoni weewa. **67** Omukohaga, yiiraga: “Akala oli Kirixtu, onaaddele.”

Oliye wawaakula, eeraga: “Naari Guwaaddeleni, kamunarumeedha.

68 Naari Guukohani, kamunagaakula yego. **69** Okuma dhiinoveva munomoona Mwaana a Muthu agakaratile omoononi wooja wa Mulugu winna kopolo dhatedhene.”

70 Athu ateene wiira: “We oli Mwaana a Mulugu?”

Oliye waakula, eeraga: “Nyoovo dinawoga wi Gili.”

71 Yahiiraga: “Ki ninafunelege ddi onamoona? Vowi nihiwa weekihu dha muwano mwaaye.”

23

1 Nikuru nateene nahivenyaga vamutugumanoni omwihsa Yesu, omudhowana wa Pilatu. **2** Vano wewule yahambeelaga omusumela, yiiraga: “Muthu ola nimfwanyile aholosaga nlogo neehu. Ahihaga wi kipelekege musoko wa Sezari, onawoga wi Oliye di Kirixtu, mwene.”

3 Pilatu ahimukohaga, wiira: “We oli mwene a aZhudewu?” Yesu ahimwaakula, wiira: “Onawoga di nyo.” **4** Vano Pilatu ahawaaddela apogo a anamakutha ni anamwinji wiira: “Kagimfwanyilena muladdu.”

5 Mbwenye aliwa yahikaleлага ntidi, yiiraga: “Onowaadugurula athu asuuuzihaa Zhudeya ateene; obaja oGalileya, ofiya wuno.”

6 Pilatu ageewile nde, ahikohaga akala muthu ole aali muGalileya.

7 Aganonile wi mwene aaye di Heroddi, ahimusukumela wa Heroddi. Mudhidhi oyene, Heroddi akalaga oZheruzalemi.

8 Heroddi agamoonile Yesu, ahihagalala vajinjivene vowi ofunesesa omoona wambeela wale. Mooligana ni dhewiye dhooliye, oojejhedha wi oneere wiirana ntikiniho. **9** Ahimukohaga mohiyana-hiyana, mbwenye Yesu kamwaakulilege yego. **10** Apogo a anamakutha ni ale yasuuziha malamulo yaaligi vevale, yegi omusumela dhijinji. **11** Vano Heroddi ni anyakoddo aaye yegi omvevusa embeddaga. Yahimuwarihaga yowara ya omwene, omuwelihedha wa Pilatu. **12** Nlabo nenddo Pilatu ni Heroddi, yahandanaga vowi wale yahiiddana.

¹³ Vano Pilatu ahaatugumanyaga apogo a anamakutha ni asogoleli ni nlogo, ¹⁴ wawiirela: “Nyo munogidheelana muthu ola woona namaholosa nlogo. Gigamukohile vameentoni veenyu kagimfwanyilena muladdu omusumeleliinyu. ¹⁵ Naari vang'onong'ono Heroddi, kamfwanyilena muladdu, wofwaneelela opiwa, bu mwahaya omuweliheliye wa hiyo.” ¹⁶ Vano, miyo ginomuwaxuliha, gendo gimutapule. ¹⁷ [Mudhidhi wa Paxkwa ahilemeelela omutapula oomagiwa mmohi.]*

¹⁸ Anamwinji ateenee yookuwaga: “Muumpo ola, mmutapule Baraba?” ¹⁹ (Baraba ola afugeleliwe ni mwaha woovuruvuru muluwani teto ni ompa muthu.)

²⁰ Pilatu afunagave wi amutapule Yesu, ahikalelaga ntidi owoga ni aliwa.

²¹ Mbwenye aliwa yegi okuwa: “Mukomeleni! Mukomeleni vamuraddini!”

²² Vano dila ya nethaaru ahaakohaga, eeraga: “Yabure wiiriliyena ddi? Ebaribareene kagimfwanyilena muladdu wofwaneelela okwa; ginomuwaxuliha, vano gendo gimutapule.”

²³ Aliwa yoolibihedhaga okuwa vajinjivene, wi mukomeleni vamuraddini. Okuwa weewa wahambeela ogonjiha. ²⁴ Pilatu orumeedha yooloba yeewa. ²⁵ Omutapula ole yamulobigiisu afugeleliwe mwaha woovuruvuru ni ompa muthu, vano ompeleka Yesu moofuna mweewa.

Okomeliwa wa Yesu

(Mt 27.32-44; Mr 15.21-32; Zhu 19.16-27)

²⁶ Emudhowagana Yesu, yahimwhihiddaga muSirine, eeriwa Simawu, akumaga mmavade, omuthukuliha muraddi veefuddi, wi amuharegena Yesu. ²⁷ Yegi omuhara athu ajinjeene, a nlogo ni ahiyana yakukuthaga vathimaramani emunddelaga. ²⁸ Mbwenye Yesu ahirugunuwaga, wiira: “Ahiyana oZheruzalemi kamugunddele Miyo; Mwiyunddele wekiinyu, vamohi ni aniiinyu! ²⁹ Vowi malabo enodha eneeriwege: ‘Oreelihiwa baale ehinabala, ehibalile, naari ehaamwihile!’

³⁰ “Malabo ayene enodha yambreele wiirela mwango: ‘Nibidhuwele hiyo!’ Vano, epathakala: ‘Nikuneele hiyo!† ³¹ Ki akala muthanko mukiiti onowiriwana ndo, wowuuma onadha wiiriwena havi?’

³² Yahithukuliwaga amohiwa abiili, yaaligi anameerana dhabure, vamohi ni Yesu wi yoonihiwe goyi yoopiwa. ³³ Egafiyile mburo weerawa “Egari-gadhi,” vevale yahakomelaga Oliye ni ale abiili, mmohi omoononi wooja, mmohi wung'otoni. ³⁴ Vano, Yesu ahiiraga: “Babani, alevaleleni, vowi kinonile dhineeriisu.”‡ Yahombezelaga gari, voogawana dhoowara dhaaye.

³⁵ Nlogo naaligi vevale negi, woona dhatene. Apogo yegi ombedda, yiiraga: “Mowaavulumusa amohi wiivulumuse weeka, akala ebaribareene oli Kirixtu, oosakuliwa a Mulugu.”

³⁶ Teto anyakkoddo yoomunyemulaga, yahimwaaddamelaga wi emvahe vinyu onyuunya, yahiiraga: ³⁷ “Akala We oli mwene a aZhudewu wiivulumuse weeka.”

³⁸ Vadhulu vamuraddi vahilebiwa: OLA DI MWENE A AZHUEDEWU.

³⁹ Mmohi wa anameera dhabure yakomeliwigiyena oomunyemulaga Oliye, eeraga: “We kuli Kirixtu? Wiivulumuse weeka, vamohi ni hiyoya.”

⁴⁰ Mmohiya ahimwaakulaga, omusumulula, wiira: “Hiyo nigali othongiwa vamohi ni Oliye, we kunamoova Mulugu? ⁴¹ Hiyo nihiwfwaneelela

* ^{23:17} Dhoolebiwa dhawale kadhinadhana verisikulu ela † ^{23:30} Os 10.8 ‡ ^{23:34} Dhoolebiwa dha wale kadhinadhana epaddi “yowi kinonile dhineeriisu.”

orabula mwaha wi nnalivela dhabure dheerihu. Vano ola keerile yego yabure."

⁴² Ahenjedhedhaga, eeraga: "Yesu, Mwaguubuwele, Mwavolowa mmweneni mweenyu."[§]

⁴³ Yesu ahimwaakula, wiira: "Ebaribareene, Ginowuwaaddela peeno veva onakala vamohi ni Miyo mburo wohagalala."

Okwa wa Yesu Kirixtu

(Mt 27.45-56; Mr 15.33-41; Zhu 19.28-30)

⁴⁴ Mudhidhi wa kumi na biili waaddamelaga, nduwa nahithimaga, elabo yateene yahikalaga yiihi, ofiyedha mudhidhi wa nethaaru wa ciguwo.* ⁴⁵ Guwo yagawa nyuba ya Mulugu, yahitaleyaga vaari ni vaari, ng'eee! ⁴⁶ Yesu ahikuwaga ni ndhu notaama, eeraga: "Babani, Ginopeleka mmadadan mweenyu muneba waaga." Nuuwoga madhu ala, okwa.

⁴⁷ Mpogo anyakoddo a aRoma aaligi vevale vovoona nde, ahimutamalaga Mulugu, eeraga: "Ebaribareene, muthu ola aali ooharihamo." ⁴⁸ Muthithi wagumanilege wooneлага dhowiireya nde, wahivenyagavo nuwikubanyiha ekukuthaga vathimarimaneeva. ⁴⁹ Vano ale yamunonilege Yesu, vamohi ni ahiyana yamuharaga okumela oGalileya, yahikalagave voolapela vene yoонelaga dhowiireya nde.

Ovitiwa wa Yesu

(Mt 27.57-61; Mr 15.42-47; Zhu 19.38-42)

⁵⁰ Ahikalawo mulobwana mmohi, eeriwa Zhuuze. Aali muthu apama, ooharihamo, mmohi a anamathonga a aZhudewu. ⁵¹ Kadhibeliwena dheerile nikuru ndde. Aali mukadda Arimateya mudhi mulubale wo Zhudeya. Oojehedha Omwene wa Mulugu. ⁵² Ahidhowa wa Pilatu, omuloba muruthu wa Yesu. ⁵³ Ovenyihavo vamuraddini, ohuruwedha ni guwo ya musawo wa linyu. Ohela munsiyeni natopiwe vanibweni woona nikungu. Nsiye ndde mwaali muhunaheliwege muruthu. ⁵⁴ Naaligi nlabo noosasanyedha, omambeelelo wa Sabuddu.

⁵⁵ Ahiyana yakumilege oGalileya ni Yesu, yahidhowaga woona nsiye ni ovitiwa wa muruthu wa Yesu. ⁵⁶ Yahivenyaga, odhowa osasanyedha dhoonukwela ni makura. Nlabo na Sabuddu yahivumaga, mooligana mwa malamulo.

24

Ovenyihowi Muukwani wa Yesu

(Mt 28.1-10; Mr 16.1-8; Zhu 20.1-9)

¹ Nlabo nowambeela na sumaana ebembe mbee, ahiyana yahidhowaga onsiyeni. Yahithukulaga dhoonukwela dhasasanyedhigiis. ² Yafwanyilege nibwe nigapigiriswi vansiyen. ³ Egavolowilemo, kayafwanyilegemo muruthu wa Nabwiya Yesu. ⁴ Aliwa kayanonaga dhafungiisu wiira, yahisimwelaga. Yubuwelagave, yahikumelefaga alobwana abiil, dhoowara dheewa dhegi ozherimela. ⁵ Ahiyana ale yahikkannaga woova. Yahiworomihedhaga kove vati. Allobwana ale yahawaaddelaga, wiira: "Munamusayelela ddi mugumi vaari va anookwa? ⁶ Oliye mu kalimo! Ohuvenyihowi! Mubuwelele madhu yowogiliyenani mukalaga oGalileya. ⁷ Yeeriliye Mwaana a Muthu oneere opelekiwa mmadadan mwa athu

§ 23:42 Dhoolebiwa ni madada dhijinji dhini mwadha mowodha ni omwene mweenyu. * 23:44 eGerego: Mudhidhi waaddamelaga wora kumi na biili ofiyedha wora ya nethaaru ya ciguwo.

othega, akomeliwe vamuraddini, nlabo na nethaaru avenyihwi.” ⁸ Vano, yahuubuwelela madhu aaye.

⁹ Egawelilewo onsiyeni, yahisorihaga dhego dhatedhene wa anamasuuza kumi ni mmohi ni wa ale ateene yaaligi ni aliwa. ¹⁰ Ahiyana ala aaligi Mariya Madalina, ni Zhuwana, ni Mariya amaaye a Tiyago, teto ni ahuyana amohi yaaligi ni aliwa yahisorihaga dhego dhatedhene wa arumiwi. ¹¹ Madhu ala yaali woona ebeweene, aliwa kayarumeedhilege ahuyana ale. ¹² Mbwenye Peduru ovenya othamagela onsiyeni agafiyile ahiturumelagamo oonilege guwoove baahi dha linyu. Peduru ahiwelelaga vade vaaye otikiniheya mwaha wa dhende dheereyile.

Dhowiireya Mundila ya Emawu

¹³ Nlabo nimohive nenddo anamasuuza abiili yaharaga dila ya murudda mung'onong'ono weeriwa Emawu; olapelanawa waali makilometru kumi na mmohi,* ofiya oZheruzalemi. ¹⁴ Yegi othapanedyeda dhego dhatedhene dheereyile. ¹⁵ Ethapanyagave, Yesu mwiinyene ahawaaddamelaga, othaananganan ni aliwa. ¹⁶ Meento eewa yahithitheyaga, kayamudidelilege.

¹⁷ Yesu ahaawogagana, wiira: “Yego ddi yukathamihileni enathapanedyihiny mweeddaga?”

Aliwa wiimela, ni okubanya. ¹⁸ Namasuuza mmohi eeriwa Kelopa ahaakulaga, eeraga: “We oli muleddo oZheruzalemi wuno onatikina dhiireyile malabo alena evirile?” ¹⁹ Oliye ahaakohaga aliwa: “Epadduwile ddi?”

Vano, yahimwaaddelagamo dhende: “Dhampadduwele Yesu muNazareti. Oyene aali mulobwana namavuhulela owodha mmabasani ni mmadhuni vameentoni va Mulugu ni vameentoni va athu ateene. ²⁰ Vano, woona apogo a anamakutha ni asogoleli eehu yahimpeleka wi akoniwe ni opiwa ni omukomela vamuraddini. ²¹ Mbwenye hiyo noojejihedha wi aakale oliy-eene oobole nlogo na Ezarayeli teto mwa dhatedhene, ala malabo maraaru dhego nda dhipadduwiwa. ²² Mbwenye teto ahuyana amohiwa yaali ni hiyo ehintikiniha voomaruwa njijiji nomaselio edhwaga onsiyeni. ²³ Vano kifwanyilemo muruthu wa Yesu. Owelawo, yiiraga: ‘Nihifwanyiwa maroho a angero, ayene esorihile wi Oliye mugumi.’ ²⁴ Ebaribareene, amohiwa a mwa hiyo yahidhowa onsiyeni, woona ebaribariya dhawogile ahuyana ale mbwenye kiyamoonile.”

²⁵ Yesu ahiwoga, wiira: “Nyo muli woona oolodhowa onyemela mirima, wi muroromele ni orumeedha dhiwigile anamavuhulela! ²⁶ Kamunonile wi yaali yoofuneya Kirixtu oonihiwe goyi, avolowe munthithimihoni naaye?” ²⁷ Vevale ahambeela waatapulela dhilebiwe dha Oliye mmalebani mateene wambeela niivuru na Mozezi ofiyedha mmaniivuru a anamavuhulela ateene.

²⁸ Yaaddamelaga murudda wadhowigiisu, Yesu eeddaga woona onafuna akwaranye. ²⁹ Mbwenye aliwa yaiiraga: “Kamukwaranye vowi ohuriba. Nduwa nihidhowa.” Oliye ovolowa okala ni aliwa.

³⁰ Egakaratile vameeza, ahithukulaga mukaathe, otamala, opadhula, waagawela. ³¹ Mowaaguva meento eewa yahifuguwaga, omudidela wi di Yesu, ahinanelaga vameentoni veewa. ³² Yegi owoga, mmohi ni mukwaaye yiiraga: “Mirima dheehu, kadhathamaga awogiye mundila antapulelaga

* **24:13** eGerego: Masitadiyu makumi matanu na mmohi. Nsitadiyu nimohi nnaakwana mameturu zana ni makumi matanu ni maraaru ni matanu.

Maleba, kahi ndo?” ³³ Mudhidhi mmohive olene, yahimaruwaga, owelela oZheruzalemi. Waafwanya arumiwi kumi ni mmohi egatugumane ni amo-hiwa. ³⁴ Yahawaaddelaga, wiira: “Ebaribareene, Nabwiya ohuvenyihija ohukumelela wa Simawu.” ³⁵ Vano alobwana abiili ale, yahisorihaga dhawiireyele mundila, voomudidela ni vopadhlula mukaathe ni wagawela.

*Yesu Onowooneyela wa Anamasuuza Aaye
(Zhu 20.19-23)*

³⁶ Ewogagave dhego nda, Yesu ahikumelelaga vaari veewa, wiira: “Murenddele okale ni nyo.”

³⁷ Aliwa yahirurumuwaga ni woova, yeesaga enoona ntowa. ³⁸ Oliye waakoha, wiira: “Mukalele ddi owukuuwa ni wanganyedha mmiriman?

³⁹ Moone madada aaga, ni manyalo aaga. Di Miyeene. Mugaababele, mugooone. Vowi ntowa kannakanna mwiiili, naari makuva, munagoneliinyu Miyo Gihikanna.”

⁴⁰ Awogagave nda, ahaawonihaga madada ni manyalo. ⁴¹ Vano, aliwa kayarumeedhile, mwaha wohagalala ni otikina, Yesu ahiiraga: “Muuhkan-navo yooja?” ⁴² Nuwindo, yahimvahaga epaddi ya somba yowoosa [ni nikandda na nwii].[†] ⁴³ Waakela oja vameentoni veewa.

⁴⁴ Nuwindo, wiira: “Miyo, ngalive ni nyo Gahiwoga wi; dhineere dhaak-wanele dhatedhene dhilebiwe dhodheela wa Miyo mmalamuloni a Mozezi, mmaniiuvuru a anamavuhulela, ni mMasaalimuni.”

⁴⁵ Vano, Yesu ahaafugulaga moobuwelelo eewa wi yiwelelemo Maleba Otaleleya. ⁴⁶ Wawaaddela, wiira: “Dhilebiwe sowi; Kirixtu oneere orabulihiwa, ni ovenyihiwa muukwani nlabo na nethaaru. ⁴⁷ Wi mwa ndina naaye, nlaleyeliwe wi athu ethwaruwe mwa dhoothegha dheeewa wi eleveleliwe. Nda, dhineere dhilaleyeliwe milogo dhatedhene wambeela oZheruzalemi. ⁴⁸ Nyo muli anamoona a dhego nda. ⁴⁹ Moone, Miyo Ginowurumihedhani nroromeliha na aBaba; mukalegeve muluwani mwemuno ofiyedha muwar-ihiwe kopololo dhodheela odhulu.”

Ogwela wa Yesu

⁵⁰ Nuwindo, Yesu ahasogolela okuma muluwani mule, odhowa oBetaniya. Ahathukulela madada wareeliha. ⁵¹ Areelihagave, yahimwalanaga, othukuliwa odhowaga odhulu. ⁵² Egamwebedhile, yahiwelelaga oZheruzalemi ni ohagalala wulubale. ⁵³ Yookalave nyuba ya Mulugu, emutamalaga Mulugu.

[†] 24:42 Dhoolebiwa nimada dhijinji kadhinna madhu ala nikandda na nwii.